

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

गनती

मूसा इस्राएल क मनईयन क गनत ह

१ यहोवा मूसा क संग मिलापवाला तम्बू में बात किहस। इ बात सीने रेगिस्तान में भइ। इस्राएल क मनइयन जब मिस्र तजि दिहन ओकरे पाछे इ बात दूसर बरिस क दूसर महीना क पहिले दिन क रही। यहोवा मूसा स कहस, २ “इस्राएल क सब मनइयन क गना। हर मनई क सूची ओकर परिवार अउ ओकर परिवार-समूह क संग बनावा। ३ तू अ हारून इस्राएल क सबहिं मनइयन क गनब्या। ओन मनसेधुअन क गना जउन बीस बरिस या ओसे जिआदा उमर क अहई। (इ सबइ उ पचे अहई जउन इस्राएल क फउज में सेवा करत हीं।) एनकइ सूची एनके समूह प बनी तइयार करा। ४ हर परिवार दल स एक मनई तोहार मदद करी। उ मनई आपन परिवार दल क अगुआ होइ। ५ तोहरे साथे रहइ अउ तोहार मदद करइ वाला मनइयन क नाउँ इ अहई :

- रूबेन क परिवार समूह में स सदेऊर क पूत एलीसूर;
- ६ सिमोन परिवार समूह स सूरीसद्वै क पूत सलूमीएल;
- ७ यहूदा क परिवार समूह स अम्मीनादाब क पूत नहसोन;
- ८ इस्साकार क समूह में स सूआर क पूत नतनेल;
- ९ जबूलून क परिवार समूह स हेलोन क पूत एलीआब;
- १० यूसुफ क सन्तानन स, एप्प्रेम क परिवार समूह स अम्मीहूद क पूत एलीसामा अउ मनस्से क परिवार समूह स पदासूर क पूत गमल्लिएल;
- ११ बिन्ध्यामीन क परिवार समूह स गिदोनी क पूत अबीदान;
- १२ दान क समूह में स अम्मीसद्वै क पूत अहीएजेर;
- १३ आसेर क परिवार समूह स आक्रोन क पूत पगीएल;
- १४ गाद क परिवार समूह स दूएल क पूत एल्यासाप;
- १५ नप्ताली क परिवार समूह स एनाम क पूत अहीरा दल क।”

१६ इ सब मनइयन आपन लोगन क जरिए आपन परिवार समूह क अगुआ चुना गएन। इ

पचे आपन मनइयन क जरिए परिवार समूह क नेता चुना गएन। इ सबइ आपन परिवार समूह क नेता अहई। १७-१८ ए बरे मूसा अउर हारून उ मनइयन क लिहस जे नाउँ दुआरा चुना गएस अउ एह बरे दूसर महीना क पहिले दिन रहा। मूसा अउ हारून इ मनइयन अउ इस्राएल क लोगन क एक संग बोलाएस। तब मनइयन क सूची ओन कई परिवार अउ परिवार समूह क मुताबिक बनी। बीस बरिस या ओसे जिआदा उमर क सबहिं मनइयन क सूची बनी। १९ मूसा ठीक वइसा ही किहेस जइसा यहोवा क हुकुम रहा। मूसा मनइयन क तब गनेस जब उ पचे सीने क रेगिस्तान में रहेन।

२० रूबेन क परिवार समूह क गना गवा। (रूबेन इस्राएल क पहिलौटी पूत रहा।) ओन सबहिं मनइयन क जउन फउज में सेवा करइ क जोगग अहइ सूची बनी जेकर उमिर बीस बरिस या ओसे जिआदा रहेन। ओनकइ सूची ओनके परिवार अउ ओनकइ परिवार समूह क संग बनी। २१ रूबेन क परिवार समूह स गना भए मनसेधुअन क गनती ४६,५०० रही।

२२ सिमोन क परिवार समूह क गना गवा। बीस बरिस या ओसे जिआदा उमर अउर फउज में सेवा करइ क जोगग सबहिं मनसेधुअन क सूची बनी। ओनकइ सूची ओनके परिवार अउ ओनकइ परिवार समूहन क संग बनी। २३ सिमोन क परिवार समूह क गने प सारे मनसेधुअन क गनती ५९,३०० रही।

२४ उ पचे गाद क परिवार समूह क गनेन। बीस बरिस या ओसे जिआदा उमर क सबइ मनइयन जउन कि फउज में सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। २५ गाद क परिवार समूह क गने प मनसेधुअन क सब गिनती ४५,६५० रही।

२६ यहूदा क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग मनसेधुअन क नाउँ क सूची बनी। ओनकइ सूची ओनकइ परिवार अउ ओनके परिवार समूहन क संग बनी। २७ यहूदा क परिवार समूह क गने प सब क गनती ७४,६०० रही।

२८ इस्साकार क परिवार समूह क गना गवा। बीस बरिस या ओसे जिआदा उमर अउ फउज में सेवा करइ क जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनकइ परिवार समूहन क संग

- बनी। २९ इस्साकार क परिवार समूह क गने प मनसेधुअन क गनती ५४,४०० रही।
- ३० जबूलून क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ ओनके परिवार समूहन क संग बनी। ३१ जबूलून क परिवार समूह क गने प मनसेधुअन क सब गनती ५७,४०० रही।
- ३२ यूसुफ क पूतन स एप्रैम क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार अउ परिवार समूहन क संग बनी। ३३ एप्रैम क परिवार समूह क गने प सब गनती ४०,५०० रही।
- ३४ मनस्से क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकइ सूची ओनके परिवार समूहन क संग बनी। ३५ मनस्से क परिवार समूह क गने प मनसेधुअन क सब गनती ३२,२०० रही।
- ३६ बिन्यामीन क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। ३७ बिन्यामीन क परिवार समूह क गने प मनसेधुअन क सब गनती ३५,४०० रही।
- ३८ दान क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। ३९ दान क परिवार अउ ओनका परिवार समूहन क गने प सब गनती ६२,७०० रही।
- ४० आसेर क परिवार समूह क गना गवा। बीस बरिस या ओसे जिआदा उमर अउ फउज मँ सेवा करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ परिवार समूहन क संग बनी। ४१ आसेर क परिवार समूह क गने प मनसेधुअन क सब गनती ४१,५०० रही।
- ४२ नफ्ताली क परिवार समूह क गना गवा। बीस बरिस या ओसे जिआदा उमर अउ फउज मँ सेवा

करइ जोगग सबहिं मनसेधुअन क नाउँ क सूची बनी। ओनकी सूची ओनके परिवार अउ ओनके परिवार समूहन क संग बनी। ४३ नफ्ताली क परिवार समूह क गने प मनसेधुअन क सब गनती ५३,४०० रही।

४४ मूसा, हारून अउ इस्राएल क बारह नेता लोग इ सब मनसेधुअन क गनेन। (हर परिवार समूह स एक ठु नेता रहा।) ४५ इस्राएल क हर एक मनसेधु जउन बीस बरिस या ओसे जिआदा उमर अउ फउज मँ सेवा करइ जोगग रहा, गना गवा। इ मनसेधुअन क सूची ओनके परिवार क संग बनी। ४६ मनसेधुअन क सब गनती ६,०३,५५० रही।

४७ लेवी क परिवार समूह स परिवारे क सूची इस्राएल क दूसर मनसेधुअन क संग नाही बनी। ४८ यहोवा मूसा स कहे रहा : ४९ “लेवी क परिवार समूह क मनइयन क जिन गना। उ क गन्ती इस्राएल क बचा भवा लोगन क संग जिन करा। ५० लेवी क मनइयन स कहा कि उ पचे करार क पवित्तर तम्बू क जिम्मेदार अहइँ। उ पचे ओकर अउर ओहमाँ स जउन चीजन अहइँ, ओनका देखा-भाला। उ पचे पवित्तर तम्बू मँ अउ ओकर सबहिं चीजन लइके चलिहीं। उ पचे आपन सिबिर ओकरे चारिहुँ कइँती डइहीं अउ ओकर देख भाल करिहीं। ५१ जब कबहुँ भी पवित्तर तम्बू क जात्रा पइ लइ जावइ जाइ तउ लेवी क मनइयन क ही तम्बू क निचे उतारइ चाही। जब कबहुँ पवित्तर तम्बू क उनो ठउरे प लगाइ जाइ तउ लेवी क मनसेधुअन क ही तम्बू क लगाइ चाही। उ पचे अइसा ही लोगन अहइँ जउन पवित्तर तम्बू क देख-रेख करत हीं। जदि कउनो अइसा दूसर मनई जउन कि लेवी नाही अहइ, पवित्तर तम्बू क निअरे ओका देख-रेख करइ बरे आवत ह तउ उ मारि डावा जाइ चाही। ५२ इस्राएल क मनइयन आपन तम्बू आपन समूहन क अनुसार लगइहीं। हर एक मनई क अनुसार आपन सिबिर आपन परिवार समूह क झण्डा क लगे लगावइ चाही। ५३ मुला लेवी क मनइयन क आपन सिबिर पवित्तर तम्बू क चारिहुँ कइँती डावइ चाही। लेवी क मनई करार क पवित्तर तम्बू क रच्छा करिहीं। उ पचे पवित्तर तम्बू क रच्छा करिहीं उ पचे पवित्तर तम्बू क रच्छा करिहीं जेसे इस्राएल क मनइयन क कछू बुरा न होइ।”

५४ एह बरे इस्राएल क मनइयन ओन सबहिं बांतन क किहेन जेकर हुकुम यहोवा मूसा क दिहन

सिबिर क सरंजाम

१ यहोवा मूसा अउ हारून स कहेस,
२ “इस्राएल क मनइयन क मिलापवाला तम्बू क चारिहु कइती आपन तम्बू लगावइ चाही। हरेक दल क आपन झण्डा होइ अउ हरेक मनई क आपन समूह क झण्डा क लगे आपन तम्बू लगावइ चाही।

३ “यहूदा क सिबिर झण्डा क पूरब में होइ जेहर सूरज निकरत ह। यहूदा क मनई हुवई सिबिर लगइहीं। यहूदा क मनइयन क अगुआ अम्मीनादाब क पूत नहसोन अहइ। ४ इ दल में ७४,६०० मनसेधू रहेन।

५ “इस्साकार क परिवार समूह यहूदा क मनइयन क ठीक पाछे होइ। इस्साकार क मनइयन क नेता सूआर क पूत नतनेल अहइ। ६ इ दल में ५४,४०० मनसेधू रहेन।

७ “जबूलून क परिवार समूह भी यहूदा क परिवार समूह स ठीक आगे आपन सिबिर लगाइ। जबूलून क मनइयन क नेता हेलोन क पूत एलीआब अहइ। ८ इ दल में ५७,४०० मनसेधू रहेन।

९ “यहूदा क सिबिर में १,८६,४०० मनसेधू रहेन। इ सबइ आपन अलग-अलग परिवार समूहन में बँटा भवा रहेन। यहूदा पहिला समूह होइ जउन उ टेमें अगवा चली। जब लोग एक ठउर स दूसर ठउर क जात्रा करिहीं।

१० “रूबेन क झण्डा पवित्रर तम्बू क दक्खिन में होइ। हरेक समूह आपन झण्डा क लगे आपन सिबिर लगाइ। रूबेन क लोगन क प्रधान सदेऊर क पूत एलीसूर बाटइ। ११ इ दले में ४६,५०० मनसेधू रहेन।

१२ “सिमोन क परिवार समूह क रूबेन क परिवार समूह क ठीक पाछे आपन सिबिर लगाइ। सिमोन क मनइयन क अगुआ सुरीसदल क पूत सलूमीएल अहइ। १३ इ दले में ५९,३०० मनसेधू रहेन।

१४ “गाद क परिवार समूह भी रूबेन क मनइयन क ठीक पाछे आपन सिबिर लगाइ। गाद क लोगन क प्रधान रूएल क पूत एल्यासाप अहइ। १५ इ दले में ४५,६५० लोगन रहेन।

१६ “रूबेन क सिबिर में सब दलन क १,५१,४५० मनसेधू रहेन। रूबेन क सिबिर दूसर समूह होइ जउन उ समइ चली। जब

मनई एक ठउर स दूसर ठउर क जात्रा करिहीं।

१७ “जब मनई जात्रा करिहीं तउ लेवी क सिबिर ठीक ओकरे, पाछे चली। मिलापवाला तम्बू दूसर सिबिरन क बीचउ बीच ओनके संग रही। मनइयन आपन सिबिर उहइ सिलसिला में लगइहीं जउने क्रम में उ पचे चलिहीं। हरेक मनई आपन परिवार क झण्डा क संग रही।

१८ “एप्रैम क झण्डा पच्छिम कइती रही। एप्रैम क परिवार-दलन हुवई सिबिर लगइहीं। एप्रैम क लोगन क प्रधान अम्मीहूद क पूत एलीसामा अहइ। १९ इ दल में ४०,५०० लोगन रहेन।

२० “मनस्से क परिवार समूह एप्रैम क परिवार क ठीक पाछे आपन सिबिर लगाइ। मनस्से क मनइयन क नेता पदासूर क पूत गम्लीएल अहइ। २१ इ दल में ३२,२०० मनसेधू रहेन।

२२ “बिन्यामीन क परिवार समूह भी एप्रैम क परिवार क ठीक आगे आपन सिबिर लगाइ। बिन्यामीन क लोगन क नेता गिदोनी क पूत अबीदान अहइ। २३ इ दले में ३५,४०० मनसेधू रहेन।

२४ “एप्रैम क सिबिर में १,०८,१०० मनसेधू रहेन। इ तीसर परिवार होइ जउन तब चली जब मनई एक ठउर स दूसर ठउर क जात्रा करिहीं।

२५ “दान क सिबिर क निसान उत्तर कइती होइ। दान क परिवार दलन हुवई सिबिर जमाई। दान क मनइयन क प्रधान अम्मीसहै क पूत अहीएजेर अहइ। २६ इ दले में ६२,७०० मनसेधू रहेन।

२७ “आसेर क परिवार समूह दान क परिवार समूह क ठीक पाछे आपन सिबिर डाइ। आसेर क मनइयन क नेता ओकरान क पूत पगीएल बाटइ। २८ इ दले में ४१,५०० मनसेधू रहेन।

२९ “नप्ताली क परिवार समूह दान क परिवार समूह क ठीक पाछे आपन सिबिर लगाइ। नप्ताली क मनइयन क प्रधान एनान क पूत अहीरा अहइ। ३० इ दले में ५३,४०० मनसेधू रहेन।

३१ “दान क सिबिर में १,५७,६०० मनसेधू रहेन। जब मनइयन एक ठउर स दूसर ठउर क जात्रा करिहीं तउ इ काफिला आखिरी

परिवार समूह होइ। हर एक मनई आपन झण्डा क अनुसार आपन परिवार क संग होइ।”

३२ सबहि डेरन मँ अलग-अलग दलन क सब परिवारन क मनसेधुअन क समूचइ गिनती रही ६,०३,५५०। ३३ मूसा इस्राएल क दूसर मनइयन मँ लेवी क मनइयन क नाही गनेस। इ यहोवा क हुकुम रहा।

३४ यहोवा मूसा क जउन कछु करइ क कहेस उ सब क इस्राएलियन मान लिहेन। इस्सर क कहइ क मुताबिक इस्राएल क मनइयन आपन झण्डा तरे आपन सिबिर लगाएन। यहोवा क कहे क मुताबिक इस्राएल क मनइयन जात्रा किहन। हरेक मनई आपन परिवार अउ आपन परिवार समूह क संग रहा।

हारून क याजकन परिवार

३ १ जउन समइ यहोवा सनै पहाडे प मूसा स बात किहस उहइ समइ क हारून अउ मूसा क परिवार क इतिहास इहइ अहइ।

२ हारून क चार पूत रहेन। नादाब पहिलौटा पूत रहा। ओकरे पाछे अबिहू, एलीआज़ार अउ ईतामार रहेन। ३ इ सबइ अभिसेक करा भवा याजकन रहेन। एनका याजकन क रूप मँ यहोवा क सेवा क खास काम सउँपा गवा रहा। ४ मुला नादाब अउ अबीहू यहोवा क सेवा करत टेमँ प पाप करइ क कारण मर गएन। उ पचे यहोवा क भेट चढ़ाएन, मुला उ पचे उ आगी क बइपरेन जेकरे बरे यहोवा हुकुम नाही दिहे रहेन। इ सनै क रेगिस्तान मँ भवा। इ तरह नादाब अउ अबिहू हुवाँ मरि गएन। ओनके पूत नाही रहेन। एह बरे एलीआज़ार अउ ईतामार याजक बनेन अउर यहोवा क सेवा करइ लागेन। उ पचे उ टेमँ करत रहेन जब ओनकइ बाप जिअत रहा।

लेवी बंस क याजकन क सहायक

५ यहोवा मूसा स कहेस, ६ “लेवी क परिवार समूह क सबहि मनइयन क याजक हारून क अगवा लिआवा। उ पचे ओनका सेवा करइ ही। ७ लेवी बंस क हारून क उ समइ मदद करिही जब उ मिलापवाला तम्बू मँ सेवा करी अउर लेवी बंसे क इस्राएल क सब मनइयन क उ टेमँ मदद करिही जउने टेमँ उ पचे पवित्तर तम्बू मँ आराधना करइ अइही। ८ इस्राएल क मनइयन

मिलापवाला पवित्तर तम्बू क हर एक चीज क रच्छा करिही, इ ओनकइ कर्तव्य अहइ। मुला इ चीजन क देख-भाल कइके ही लेवी बंस क लोग इस्राएल क मनइयन क सेवा करिही। पवित्तर तम्बू मँ आराधना करइ क ओनका इहइ तरीका होइ।

९ “इस्राएल क सब मनइयन मँ स लेवी बंसे क मनई चुना गएन। इ पचे लेवी बंस क हारून अउ ओकरे पूतन क मदद बरे चुना ग रहेन।

१० “तू हारून अउ ओकरे पूतन क याजकन तइनात करव्या। उ पचे आपन फरज पूरा करिही अउ याजकन क रूप मँ सेवा करिही। कउनो दूसर मनई जउन निअरे आवइ क कोसिस करत ह मारि दीन्ह जाइ चाही।” *

११ यहोवा मूसा स इहइ कहेस, १२-१३ “मई तोसे कहेउँ कि इस्राएल क हरेक परिवार आपन पहिलौटी क जन्मा पूत मोका देइ-मुला अब मई लेवी बंस क आपन सेवा बरे चुनत हउँ। उ पचे मोर होइही। एह बरे इस्राएल क सब मनइयन क दूसर सबहि लोगन क आपन पहिलौटी क पूत मोका नाही देइ क होइ। जब तू मिस्र मँ रह्या, मई मिस्र क पहिलौटी क पइदा भवा लरिकन क मार डाए रहा। उ समइ मई इस्राएल क सबहि पहिलौटी क गदेलन क अपने बरे लीन्ह। सबहि पहिलौटी क पइदा भवा गदेलन अउ सबहि पहिलौटी क जन्मा गोरू मोर अहइ। मुला अब मई तोहरे पहिलौटी क जन्मा गदेलन क तोहका वापस करत अहउँ अउर लेवी बंसे क आपन बनावत हउँ। मई यहोवा अहउँ।”

१४ यहोवा फुन सनै क रेगिस्तान मँ मूसा स बात किहस। यहोवा कहेस, १५ “लेवी बंस क सबहि परिवार समूहन अउ परिवार समूह क गना। हरेक मनसेधू या गदेलन जउन एक महीना या ओसे जिआदा क होई ओनका गना।” १६ एह बरे मूसा यहोवा क आग्या मानसे। उ ओन सबहि क गनेस।

१७ लेवी क तीन पूत रहेन। ओनकइ नाउँ रहेन: गेसोन, कहात अउ मरारी।

१८ हरेक पूत परिवार समूहन क प्रधान रहा।

गेसोन क परिवार समूहन रहेन लिब्नी अउ सिमी।

१९ कहात क परिवार समूहन रहेन: अम्राम, यिसहार, हेबरोन, उज्जीएल।

२० मरारी क परिवार समूहन रहेन: महली अउ मूसी।

*३ :१० कउनो ... चाही याजक क रूप मँ सेवा करई चाहत ह।

उ सबइ उ कुल परिवार रहेन जउन लेवी क परिवार समूहन स जुड़ा रहेन ।

२१ लिब्नी अउ सिमियन क परिवार गोसोन क परिवार स जुड़ा रहेन । उ सबइ गोसोन बंस क परिवार समूहन क रहेन । २२ इ दुइनउँ परिवार समूहन मँ स एक महीना स जिआदा उमर क लरिकन या मनसेधू ७,५०० रहेन । २३ गोसोन बंस क परिवार समूहन क पच्छिउँ मँ सिबिर डावइ क कहा गवा । उ पचे पवित्र तम्बू क पाछे आपन सिबिर लगाएन । २४ गोसोन बंस क परिवार समूहन क प्रधान लाएल क पूत एल्यासाप रहा । २५ मिलापवाला तम्बू मँ गोसोन बंस क लोग पवित्र तम्बू, बाहरी तम्बू अउ पर्दन क देख-रेख क जिम्मेदार रहेन । उ पचे मिलापवाला तम्बू क प्रवेस दुआर क पर्दा क देख-भाल करत रहेन । २६ उ पचे आंगन क पर्दा क देख-रेख करत रहेन । इ पर्दा जउन पवित्र तम्बू अउ वेदी क चारिहुँ कइती फइला रहा । उ पचे रस्सी अउ पर्दा बरे काम मँ बइपरइ वाली हर एक चिजियन क देख-रेख करत रहेन ।

२७ अमरामियन, यिसहारियन, हेबरोनियन अउ उज्जीएल क परिवार कोहात क परिवार स जुड़ा रहेन । उ पचे कोहात बंसी परिवार समूहन क रहेन । २८ इ परिवार समूह मँ एक महीना या ओसे जिआदा उमर क गदेलन अउ मनसेधू ८,६०० रहेन । कोहात बंस क मनइयन क पवित्र ठउर क देख-रेख क काम सउँपा गवा । २९ कोहात बंस क परिवार समूहन क “पवित्र तम्बू” क दक्खिन पहुँटा दीन्ह गवा । इ उ पहुँटा रहा जहाँ उ पचे सिबिर लगाएन । ३० कोहात बंस क परिवार समूहन क प्रधान उज्जीएल क पूत एलीसापान रहा । ३१ ओनकइ काम पवित्र सन्दूख, मेज, डीबट, वेदी अउ पवित्र ठउर क कामे मँ आवइवाला सामान क देख-रेख करब रहा । उ पचे पर्दा अउ ओनके संग प्रयोग मँ आवइवाली सबहिं चीजन क देख-रेख करत रहेन ।

३२ लेवी बंस क नेता लोगन क मुखिया एलीआज़ार रहा । उ याजक हारून क पूत रहा । एलीआज़ार पवित्र चीजन क देख-रेख करइवालन सबहिं मनइयन क कोतवाल रहा ।

३३-३४ महली अउ मुसी परिवार समूहन मरारी परिवारे स जुड़ा रहा । एक महीना या ओसे जिआदा उमर क लरिकन अउ मनसेधू परिवार समूह मँ ६,२०० रहेन । ३५ मरारी समूह क नेता अबीहेल

क पूत सूरीएल रहा । इ परिवार समूह क पवित्र तम्बू क उत्तर क पहुँटा दीन्ह ग रहा । इ उहइ पहुँटा अहइ जहाँ उ पचे सिबिर लगाए रहेन । ३६ मरारी लोगन क पवित्र तम्बू क ढाँचा क देखभाल क काम सौंप दीन्ह गवा । उ पचे सबहिं छुड़न, खंभन अउ आधार अउ पवित्र तम्बू क ढाँचा मँ जउन कछू लगा रहा उ सब कछू क देख-भाल करत रहेन । ३७ पवित्र तम्बू क चारिहुँ कइती आंगन क सबहिं खंभन क देखरेख करत रहेन । एहमाँ सबइ आधार, तम्बू क खूँटी अउ रस्सियन जुड़ी रहिन ।

३८ मूसा, हारून अउ ओकर लरिकन मिलापवाला तम्बू क समन्वा पवित्र तम्बू क पूरब कइती सिबिर लगाएन । उ पचन क पवित्र ठउर क देख-भाल क काम दीन्ह गवा । उ पचे इस्राएल क सबहिं मनइयन बरे इ किहन । कउनो दूसर मनई जउन पवित्र ठउर क निचके आवत, मार दीन्ह जाइ क रहा ।

३९ यहोवा लेवी परिवार समूह क एक महीना या ओसे जियादा उमर क गदेलन अउ मनसेधुअन क गनइ क हुकुम दिहस । सब गिनती २२,००० रही ।

लेवी बंसी पहिलौटी क लरिकन क जगह लेत हीं

४० यहोवा मूसा स कहेस, “इस्राएल मँ सब एक महीना या ओसे जियादा उमर क पहिला पइदा भवा लरिकन अउ मनसेधुअन क गना । ओनके नाउँ क एक अनुसार सूची बनावा । ४१ अब मई इस्राएल क सबहिं पहिलौटी क पइदा भवा लरिकन अउ मनसेधुअन क नाहीं लेबा अब मई यानी यहोवा लेवी बंसियन क ही लेब । इस्राएल क दूसर सबहिं मनइयन क पहिलौटी क पइदा भवा जनावरन क लेइ क ठउर प अब मई लेवी बंस क मनइयन क पहिलौटी क जनावरन क ही लेब ।”

४२ इ तरह मूसा उ किहस जउन यहोवा हुकुम दिहस । मूसा इस्राएल क पहिलौटी क सतान क गनेस । ४३ मूसा सबहिं पहिलौटी क पइदा भवा एक महीना या ओसे जियादा उमर क लरिकन अउ मनसेधुअन क सूची बनाएस । उ सूची मँ २२,२७३ नाउँ रहन ।

४४ यहोवा मूसा स इ भी कहेस, ४५ “मई यानी यहोवा इ हुकुम देत हउँ: इस्राएल क दूसर परिवारन क पहिलौटी क पइदा भवा मनसेधुअन क जगह प लेवी बंस क मनइयन क ल्या । अउर मई दूसर मनइयन क जनावरन क ठउर प लेवी-

३:२३ पवित्र तम्बू या “टाबरनाकेल” तम्बू परमेस्वर आपन मनइयन क बीच रहइ आवा रहा ।

बंस क जनावरन क लेब । लेवी बंसी मोरउ अहइ ।
 ४६ लेवी-बंस क मनई २२,००० अहइ अउर दूसर
 परिवारन क २२,२७३ पहिलौटी क पइदा भवा पूत
 अहइ । इ तरह सिरिफ २७३ पहिलौटी क पइदा
 पूत लेवी बंस क मनइयन स जियादा बाटेन ।
 ४७ इइ सौ तेहतर पहिलौटी मनइयन मँ स हर
 एक बरे पाँच सेकेल चाँदी जमा करा । (पवित्र
 स्थान क सेकेल क अनुसार एक सेकेल बीस गेरा
 होत ह) ४८ उ चाँदी हारून अउ ओकरे पूतन क
 द्या । इ इस्राएल क २७३ मनइयन बरे भुगतान
 अहइ ।”

४९ मूसा २७३ जियादा मनइयन बरे रूपिया
 बटोरेस । इ सबइ उ पचे २७३ मनई अहइ जेनकइ
 जगह लेवी बंस परिवार समूह नाही लइ सका ।
 ५० मूसा इस्राएल क पहिलौटी क पइदा भवा
 मनइयन स चाँदी बटोरेस । उ १,३६५ सेकेल चाँदी
 पवित्र स्थान क सेकेल क अनुसार बटोरेस ।
 ५१ मूसा यहोवा क आग्या मानेस । मूसा यहोवा
 क आग्या क मुताबिक उ चाँदी हारून अउ ओकरे
 पूतन क दिहस ।

कोहात परिवार क सेवा करब

४ यहोवा मूसा अउ हारून स कहेसः
 २ “कोहात परिवार समूह क मनसेधुअन क
 गना । (कोहात परिवार समूह लेवी परिवार समूह
 क एक हींसा अहइ) ३ तीस स पचास बरिस क
 उमर वाले मनइयन क गना जउन फउज मँ सेवा
 करइ सकत ह । इ मनइयन मिलापवाला तम्बू मँ
 कामकाज करिही ।

४ “ओनकइ कामकाज सबन त जियादा पवित्र
 ठउर क देखभाल करब अहइ ।

५ “जब सिबिर नवा ठउर क जात्रा करइ ।
 हारून अउ ओनके पूतन क चाही कि उ पचे
 मिलापवाला तम्बू मँ जरूर जाइँ अउ पर्दा उतारइँ
 अउ करार क पवित्र सन्दूखे क ढाँपइँ । ६ तब उ
 पचे इ सबन्क बढ़िया चाम स बना भवा ढकना
 स ढाँपि देइँ । तब उ पचे पवित्र सन्दूखे प बिछा
 भवा खाल प एक ठु नीला ओढ़ना फइलइहीँ अउ
 पवित्र सन्दूखे प लगा भवा कड़ा मँ डंडा डइहीँ ।

७ “तब उ पचे एक ठु नीला ओढ़ना पवित्र मेजी
 प फइलइहीँ । तब उ सबइ ओह पइ थाली, चम्मच,
 खोरा अउ पयेबलि बरे गगरी धरिहीँ । उ पचे खास
 रोटी ओकर ऊपर धरइ सकत ह । ८ तब तू पचे इ

सबहिँ चीजन प एक ठु लाल ओढ़ना डउब्या । तब
 हर एक चीज क बढ़िया चाम स ढाँपि द्या । तब मेज
 क छल्ला मँ डंडा डावा ।

९ “तब डीबट अउ दिया क नीला ओढ़ना स ढकि
 द्या अउ साथ ही साथ दिया क गुल काटइवाला
 कैची, गुल रखइवाला थाली अउर दिया बरे
 प्रयोग मँ आवइवाला तेल क मेटिया क ढकि द्या ।
 १० तब सबहिँ चीजन क नीक चाम मँ लपटावा अउ
 एँका ढोवइ बरे प्रयोग मँ आवइवाला डंडन प
 एँका धरा ।

११ “सुनहरी वेदी प एक नीला कपड़ा फइलावा ।
 ओका नीक चाम स ढका । तब वेदी क ढोवइ बरे
 ओहमाँ लगा भवा छल्लन मँ डंडा डावा ।

१२ “पवित्र ठउर मँ आराधना क प्रयोग मँ
 आवइवाली खास चीजन क एक साथे बटोरा ।
 एँका एक संग बटोरा अउ एँका नीला ओढ़ना
 मँ बटोरा । तब एँका बढ़िया चाम स ढका । इ चीजन
 क लइ जाइ बरे एँका एक ढाँचा प धरा जिस प इ
 लइ जाइ ।

१३ “काँसावाली वेदी स राख क झार द्या अउ
 एँकरे ऊपर एक बैगनी रंग क ओढ़ना फइलावा ।
 १४ तब वेदी प आराधना बरे प्रयोग मँ आवइवाली
 आगी क गोस्सी, काँटा, बेल्ला अउ खोरा आदी
 सब चीजन क बटोरा । इ चीजनक काँसा क वेदी
 प धरा । तब वेदी क ऊपर नीक चाम क ओढ़ना
 फइलावा । वेदी मँ लगा कड़न मँ एँका लइ
 जाइवाला डंडा डावा ।

१५ “जब हारून अउ ओकर पूत पवित्र ठउर
 क सबहिँ पवित्र चीजनक ढकना पूरा करि लेइँ
 तब कोहात परिवार क मनई अन्दर आइ सकत हीँ
 अउर उ चीजनक लइ जाब सुरु कइ सकत हीँ । इ
 तरह उ पचे पवित्र चीजनक छुइहीँ नाही । तउ उ
 पचे मरिहीँ नाही ।

१६ “याजक हारून क पूत एलीआज़ार पवित्र
 तम्बू बरे जिम्मेदार होइ । उ पवित्र ठउर अउ
 एँकर हर चीज बरे जिम्मेदार होइ । उ डीबट क तेल,
 महकउआ सुगन्धवाली अगरबत्ती अउ हमेसा
 दीन्ह जाइवाली भेंट ।” †

१७ यहोवा मूसा अउ हारून स कहेस,
 १८ “होसियार रहा, इ कोहात बंसी मनइयन क
 लेवी मनसेधुअन क बीच स बरबाद जिन होइ
 द्या । १९ तोहका इ एह बरे करइ चाही कि कोहात
 बंसी महा पवित्र ठउर ताई जाइँ अउ मरइँ

† ४:१६ हमेसा दीन्ह जाइवाली भेंट जइतून क तेल जउन याजक, देवपुरुस या राजा क मँडे प डावा
 जात रहा । इ बतावत रहा कि यहावा क जरिये आपन खास काम बरे चुना ग रहन ।

नाहीं। हारून अउ ओकरे पूतन क अन्दर जाइ चाही अउ हरेक कोहात बंसी क बतावइ चाही कि उ का करइ। ओन पचन क हर एक मनई क चीज देइ चाही जउन ओका लइ जाइ क अहइ। २० जदि तू अइसा नाहीं करत्या तउ कोहात बंसी अन्दर जाइ सकत हीं अउ पवित्तर चीजन क लखि सकत हीं। जदि उ पचे एक छिन बरे भी ओन पवित्तर चीजन कइती निहारत हीं तउ ओनका मरइ क होइ।”

गेसॉन परिवार क सेवा

२१ यहोवा मूसा स कहेस, २२ “गेसॉन परिवार क सबहिं मनइयन क गना। ओनकइ सूची परिवार अउ परिवार समूह क मुताबिक बनावा। २३ आपन सेवा क कर्तव्य कइ चुकइवालन तीस बरिस स पचास बरिस तक क मनसेधुअन जउन सबइ सेवा करइ बरे जाइ सकत ह क गना। इ सबइ लोग मिलापवाला तम्बू क देख-भाल करिहीं।

२४ “गेसॉनी परिवार क इहइ करइ चाही अउ इ चीजन क लइ चलइ चाही। २५ एँका पवित्तर तम्बू क पर्दा, मिलापवाला तम्बू, एकर ओढावन अउ नीक चाम स बना ओढावन लइ चलइ चाही। ओनका मिलापवाला तम्बू क दुआर क पर्दा भी लइ चलइ चाही। २६ ओनका अंगने क ओन पर्दन क भी जउन पवित्तर तम्बू अउ वेदी क चारिहुँ ओर लगा वाटेन, लइ चलइ चाही। ओनका आंगन क प्रवेस दुआर क पर्दा भी लइ चलइ चाही। ओनका सब लसुरी अउ पर्दा क संग प्रयोग मँ आवइवाली सबहिं चीजन क लइ चलइ चाही। गरसान बंस क मनई उ कउनो भी चीज बरे जिम्मेदार होइहीं जउन इ चीजन स कीन्ह जात हीं। २७ हारून अउ ओकर पूत इ सबहिं कामन क निगरानी करिहीं। गेसॉनी बंस क मनई जउन कछू लइ जइहीं अउ जउन दूसर काम करिहीं ओकर पइ हारून अउ ओकर पूत नजर राखिहीं। तोहका ओन लोगन क उ सबइ चीज सोंप देइ चाही जेनका ढोवइ बरे उ पचे जिम्मेदार होइहीं। २८ इहइ काम अहइ जेका गेसॉन बंस क परिवार समूह क लोगन क मिलापवाला तम्बू बरे करइ क अहइ। हारून क पूत ईतामार याजक ओनके काम बरे जिम्मेदार होइ।”

मरारी परिवार क सेवा

२९ “मरारी परिवार समूह क परिवार अउ परिवार समूहन क मनसेधुअन क गना। ३० तीस स पचास बरिस क सबहिं मनसेधुअन क जउन सेवा करइ

बरे जाइ सकत ह क गना। उ पचे मनइयन मिलापवाला तम्बू बरे खास काम करिहीं। ३१ जब तू जात्रा करव्या तब ओनकइ इ काम अहइ कि मिलापवाला तम्बू क फरेम (ढाँचा) लइ चला। ओनका पट्टी, खाभा अउ आधार क लइ चलइ चाही। ओनका ओन तम्बू क खुँटियन क लइ चाही ३२ अउर ओका आंगन क चारिहुँ कइती क खम्भा, ओका खुँटियन क साथ, आधार अउ रस्सी क लइ चाही। सब नाउँ क सूची बनावा अउ हरेक मनई क बतावा कि ओका का का चीज लइ जाइ क अहइ। ३३ इहइ बात अहइ जेका मरारी बंस क लोग मिलापवाला तम्बू क कामे मँ सेवा बरे करिहीं। हारून क पूत ईतामार याजक एँके बरे जिम्मेदार होइ।”

लेवी बंस परिवार

३४ मूसा, हारून अउ इस्राएल क मनइयन क अगुआ लोग कोहती-बंस क मनइयन क गनेन। उ पचे एँका परिवार अउ परिवार समूहन क मुताबिक गनेन। ३५ उ पचे तीस स पचास बरिस क उमर क मनइयन क जउन सेवा करइ बरे जाइ सकत ह गनेन। इ पचन क मिलापवाला तम्बू बरे खास काम करइ बरे दीन्ह गएन।

३६ कहात परिवार समूह मँ जउन इ काम करइ क जोगता रखत रहेन, २,७५० मनसेधू रहेन। ३७ इ तरह कोहात परिवार क इ मनइयन क मिलापवाला तम्बू क खास काम करइ बरे जिम्मेदारी दीन्ह गएन। मूसा अउ हारून एँका वइसा ही किहेन जइसा यहोवा मूसा स करइ क कहे रहा।

३८ गेसॉनी परिवार समूह क भी ओकर परिवारन अउ ओकर परिवार समूहन क अनुसार गना गवा। ३९ तीस स पचास बरिस क उमर क सबहिं मनइयन क जउन सेवा करइ बरे जाइ सकतेन क गना गएन। इ मनइयन क मिलापवाला तम्बू मँ खास काम करइ क सेवा-काम दीन्ह गवा। ४० गेसॉन परिवार समूह क परिवारन मँ जउन जोगग रहेन उ पचे २,६३० मनसेधू रहेन। ४१ इ तरह इ मनसेधुअन क जउन गेसॉन परिवार समूह क रहेन, मिलापवाला तम्बू मँ खास काम करइ क सेवा-काम सोंपा गवा। मूसा अउ हारून एँका वइसा ही किहेन जइसा यहोवा मूसा क करइ क कहे रहा।

४२ मरारी परिवार क परिवार अउ परिवार समूहन क भी गना गवा। ४३ तीस स पचास बरिस क उमर क सबहिं मनसेधू जउन सेवा करइ बरे जाइ सकतेन क गना गएन। इ मनइयन क मिलापवाला

तम्बू बरे खास काम करइ क सेवा-काम दीन्ह गवा ।
 ४४ मरारी परिवार समूह क परिवारन मँ जउन लोग
 जोगग रहेन, उ पचे ३,२०० मनई रहेन । ४५ इ तरह
 मरारी परिवार समूह क इ मनइयन क खास काम
 दीन्ह गवा । मूसा अउ हारून एंका वइसा ही
 किहेन जइसा यहोवा मूसा स करइ क कहे रहा ।

४६ मूसा, हारून अउ इस्राएल क मनइयन क
 नेता लोग लेवी-बंस क सबहिं निअम्बर क गनेन ।
 उ पचे हर एक परिवार अउ हर एक परिवार समूह क
 गनेन । ४७ सब मनइयन जउन आपन सेवा कर्तव्य
 क निभाइ चुका रहेन अउर जउन तीस बरिस स
 पचास बरिस उमर क रहेन, गना गएन । इ मनइयन
 क मिलापवाला तम्बू बरे खास काम करइ क सेवा-
 काम दीन्ह गवा । उ पचे मिलापवाला तम्बू क
 चलइ क काम तब किहेन जब उ पचे जात्रा
 किहेन । ४८ मनसेधुअन क सारी संख्या ८,५८०
 रही । ४९ यहोवा इ आदेस मूसा क दिहेन । हर एक
 मनई क आपन काम दीन्ह ग रहा । अउ हरेक
 मनसेधु स कहा गवा रहा कि ओका का का लइ
 चलइ चाही । एह बरे यहोवा जउन हुकुम दिहे रहा
 उ चीजन क पूरा कीन्ह गवा । सबहिं मनइयन क
 गना गवा ।

सफाई क बारे मँ नेम

५ यहोवा मूसा स कहेस, २ “इस्राएल क
 मनइयन क हुकुम द्या कि उ हर एक व्यक्ति
 क चाहे उ मनसेधु या मेहरारू जउन चाम रोग स
 पीड़ित ह या जेकर सरीर स पीप बहत ह या जउन
 कि कउनो ल्हासे क छुअइ क करण असुद्ध होइ
 गवा अहइ छाउनी स दूर भेज द्या । ३ उ पचन्क
 छाउनी स बाहर भेज दीन्ह जाइ चाही ताकि उ
 छाउनी क जउन कि मोरे निवास अहइ क उ पचन्क
 असुद्ध नाहीं कइ देइ । मई तोहरे छाउनी मँ तू
 लोगन क बीच रहत हउँ ।”

४ एह बरे इस्राएल क मनइयन परमेस्सर क
 हुकुम मानेन । उ पचे ओन मनइयन क सिबिर क
 बाहर पठइ दिहन । उ पचे अइसा एह बरे किहन
 काहे की यहोवा मूसा क हुकुम दिहस ।

अपराध बरे जुर्माना

५ यहोवा मूसा स कहेस, ६ “इस्राएल क लोगन
 क इ बतावा, अगर कउनो मनई अउ मेहरारू
 कउनो अइसा पाप करत ह जेका लोग करत,
 (कउनो पाप जेका दूसर क खिलाफ कीन्ह गवा ह
 तउ उ असल मँ परमेस्सर क खिलाफ पाप अहइ)
 तउ उ तरह क मनसेधु या मेहरारू अपराधी अहइ ।

७ एह बरे उ मनई लोगन क खिलाफ आपन कीन्ह
 पाप क कबूलइ । तब उ मनई ओका जरूर सुधार
 करइ चाही जेका उ किहस ह उ भुगतान मँ पांचवाँ
 हीसा जोरइ अउ ओकर भुगतान ओका करइ जेकर
 बुरा उ किहस ह । ८ मुला जउन मनई क उ बुरा
 किहा ह जदि उ मनई मरि जात ह अउर ओकर
 कउनो निचके क नातेदार भुगतान लेइ बरे न होइ
 तउ इ हाल मँ, बुरा करइ वाला मनई यहोवा क
 भुगतान करी । उ मनई पूरा भुगतान याजक क
 करी । भुगतान क बरे ओका एक टू भेंडा क बलि
 अभिसेक क रूप मँ जरूर देइ चाही । याजक ओका
 बलि ओका अभिसेक करइ बरे देब्या । मुला याजक
 बचा भुगतान क आपन लगे रख सकत ह ।

९ “जदि इस्राएल क कउनो मनई परमेस्सर क
 खास भेंट चढ़ावत ह तउ उ याजक जउन ओका
 अंगीकार कइ सकत ह ओका अपने लगे रख सकत
 ह । इ ओकर बाटइ । १० एक मनइ क पवित्तर चीज
 ओका अपना अहइ (उ ओका दइ सकत ह या
 ओका आपन बरे रखइ सकत ह) । मुला जदि उ
 ओनका देत ह तउ उ याजक क होइ जाइ ।”

सक्की भतार लोग

११ तब यहोवा मूसा स कहेस, १२ “इस्राएल क
 लोगन स इ कहा कउनो मनई क मेहरारू पतिव्रता
 नाहीं भी होइ सकत । १३ उ दूसर मनइयन क संग
 सोइ सकत ह अउ एंका आपन भतारे स छुपाइ
 सकत ह । ओकर भतार ओका कबहुँ जान भी नाहीं
 सकत जउन बुराई उ किहस ह होइ सकत ह
 कि कउनो गवाह भी नाहीं अहइ अगर उ आपन
 हरकत स नाहीं पकड़ा जाइ । अउर उ मेहरारू भी
 आपन भतार स आपन पाप क बारे मँ नाहीं कही ।
 १४ मुला भतार संका करब सुरु कइ सकत ह कि
 ओकर मेहरारू ओकरे विरुद्ध पाप किहस ह । उ
 ओकरे बरे जलन रख सकत ह, चाहे उ कउनो बुरा
 काम नाहीं किहस ह जेकर कारण उ अविस्वासी
 होइ जाइ । १५ जदि अइसा होत ह तउ उ आपन
 मेहरारू क याजक क लगे लइ जाइ । भतार एक
 भेंट भी लइ जाइ । इ भेंट एपा क दसवाँ भाग जौ क
 आटा होइ । ओका जौ क आटे प तेल या सुगन्धि
 नाहीं ड़ावइ चाही । इ जौ क आटा यहोवा क अन्न
 भेंट अहइ । इ एह बरे दीन्ह जात कि भतार ईश्यालु
 अहइ । इ भेंट इ संकेत करी कि ओका बिस्वास
 अहइ कि ओकर मेहरारू पतिव्रता नाहीं अहइ ।

१६ “याजक मेहरारू क यहोवा क समन्वा लइ
 जाइ अउ मेहरारू यहोवा क समन्वा खड़ी होइ ।
 १७ तब याजक कछू खास पानी लेइ अउ ओका

माटी क काँड़ा मँ डाई। याजक पवित्तर तम्बू क फर्स स कछू माटी पानी मँ नाई।^{१८} याजक मेहरारु क यहोवा क समन्वा खड़ी रहइ बरे मजबूर करी। तब उ ओकर बार उधारी अउ ओकरे हाथे मँ अन्नबलि देइ। इ जौ क आटा होइ जउन जेका भतार जलन क कारण ओका दिहे रहा। उहइ टेमें याजक उ खास करुआ पानीवाला माटी क काँड़ा धरे रही। इ जल ही अहइ जउन मेहरारु क परेसानी पइदा करत ह (सिरिफ अगर उ पाप किहेस ह।)

^{१९} “तब याजक मेहरारु क हिदायत देइ कि ओका झूठ नाहीं बोलइ चाही। ओका फुरइ बोलइ क बचन देइ चाही। याजक ओसे कही: ‘जदि तू दूसर मनई क संग नाहीं सोई अहा अउर तू आपन भतार क खिलाफ पाप नाहीं किहे अहा, जबकि तोहार बियाह ओकरे संग हुआ अहइ, तउ इ सराप जल तोहका नोस्कान न पहुँचाइ।’^{२०} मुला जदि तू आपन भतार क खिलाफ पाप किहा ह, जदि तू कउनो दूसर मनई क संग सोई अहा तउ तू सुद्ध नाहीं अहा। काहे? काहेकि जउन तोहरे संग सोवा इ बरे अहइ तोहार भतार नाहीं अहइ अउर उ तोहका असुद्ध बनाएन ह।^{२१} एह बरे जब तू इ खास जल क पिउबू तउ तोहका बहोत परेसानी होइ। तोहार पेट फूलि आइ अउर तू कउनो लरिका पइदा नाहीं कइ सकबिउ। जदि तू गोड़वा स भारी होबिउ तउ तोहार लरिका मरि जाइ। तब तोहार लोग तोहका तजि देइहीं अउर उ पचे तोहरे बारे मँ बुरी बात करिहीं।’

“तब याजक क मेहरारु स यहोवा क विसेस बचन देइ बरे कहइ चाही। मेहरारु क अंगीकार करइ चाही कि इ सबइ बुरी बातन ओका होइहीं, जदि उ झूठ बोली।^{२२} याजक क कहइ चाही, ‘तू इ जले क लेबिउ जउन तोहरे तन मँ परेसानी पइदा करी। जदि तू पाप किहा ह तउ तू लरिका क जनम नाहीं दइ सकबिउ अउर जदि तोहार कउनो लरिका गरभ मँ अहइ तउ उ जन्मइ स पहिले मरि जाइ।’ तब मेहरारु क कहइ चाही: ‘मइँ उ अंगीकार करत हँ उ जउन आप कहत हीं।’

^{२३} “याजक क इ चिताउनियन क चाम-पत्र प लिखइ चाही। फुन ओका इ लिखावट क पानी मँ धोवइ चाही।^{२४} तब मेहरारु उ पानी क पिई जउन परेसानी पइदा करत ह। उ पानी ओहमा जाइ अउर जदि उ अपराधी अहइ तउ ओका बहोत परेसानी पइदा करी।

^{२५} “तब याजक उ अन्नबलि जउन जलन बरे भेंट अहइ क ओहसे लेइ। उ ओका यहोवा क समन्वा उठाई अउर ओका वेदी तलक लइ जाइ।^{२६} तब याजक आपन अंजुरी मँ अन्न भरी अउ ओका वेदी प धरी। तब उ ओका बारी। ओकरे पाछे उ मेहरारु स पानी पिअइ क कही।^{२७} जदि मेहरारु भतार क खिलाफ पाप किहे होई तउ पानी ओका परेसान करी। पानी ओकरे सरिरे मँ जाई अउर ओका बहोत कस्ट होइ। अउर कउनो बच्चा जउन ओकरे गरभ मँ होइ, पइदा होइ स पहिले मरि जाई अउर उ कबहुँ बच्चा क जन्म नाहीं दइ सकी। उ आपन लोगन क बीच अभिसाप होइ जाब्या।^{२८} मुला जदि मेहरारु पति क खिलाफ पाप नाहीं किहे अहइ तउ उ पवित्तर अहइ। फुन याजक घोसणा करी कि उ अपराधी नाहीं अहइ। अउर लरिकन क जन्म देइ बरे जोग्ग होइ जाई।

^{२९} “इ तरह इ ईसा क बारे मँ कानून अहइ। तोहका इहइ करइ चाही जदि कउनो बीही मेहरारु आपन पति क खिलाफ पाप करत ह।^{३०} या जदि कउनो मनई जलन करत ह अउ आपन मेहरारु क बारे मँ संका करत ह कि उ ओकरे खिलाफ पाप किहे अहइ तउ मनई क इहइ करइ चाही। याजक क कहइ चाही कि उ मेहरारु यहोवा क समन्वा खड़ी होइ। तब याजक इ सबहिँ काम क करी। इहइ कनून बा।^{३१} भतार कउनो बुरा करइ क अपराधी नाहीं होइ। मुला मेहरारु कस्ट उठाइ, जदि उ पाप किहे अहइ।”

नाज़ीरी बंस

^१ यहोवा मूसा स कहेस,^२ “इ बातन इस्राएल क मनइयन स कहा: कउनो मनसभू या मेहरारु कछू निश्चित समइ बरे आपन आप क परमेस्वर क अपर्ण कइ क कसम खाइ सकत ह। उ मनई नाज़ीरी कहा जाई।^३ उ टेम मँ मनई क कउनो दाखरस या कउनो जियादा नसीली चीज नाहीं पिअइ चाही। मनई क सिरका जउन दाखरस स बना होइ या कउनो जियादा नसीला पिअनी नाहीं पिअइ चाही। उ मनई क अंगूरे क रस नाहीं पिअइ चाही अउर न ही अंगूर या किसमिस खाइ चाही।^४ उ पवित्तीकरण क काल मँ उ मनई क अंगूर स बना कउनो चीज नाहीं खाइ चाही। उ मनई क अंगूरे क बिया या बोबला भी नाहीं खाइ चाही।

^{१५}: २१ पेट फूलि तोहार गरभ गिरि जाइ अउ पेट फूलि आई।

५ “पवित्रीकरण क काल मैं उ मनई क आपन बार नाही काटइ चाही। उ मनइ क उ टेमें तलक सुद्ध रहइ चाही जब तलक पवित्रीकरण क काल खतम न होइ। ओका आपन बार क लम्बा होइ देइ चाही। उ मनई क बार परमेस्सर क दीन्ह गवा पवित्रीकरण क बचन क एक खास हीसा अहइ। उ ओन बारन क परमेस्सर क भेंट क रूप मैं देई। एह बरे उ मनई आपन बारन क तब तलक लम्बा होइ देइ जब तलक अलग होइ क टेमें खतम होई।

६ “इ पवित्रीकरण क काल मैं इ कउनो नाज़ीर क कउनो ल्हासे क लगे नाही जाइ चाही। काहेकि उ मनई आपन क पूरी तरह स यहोवा क अर्पित कइ दिहे अहइ। ७ जदि ओकर आपन बाप, आपन महतारी, आपन भाई या आपन बहिन भी मरि जाइँ तउ भी ओका ओनका छुवइ न चाही। इ ओका अपवित्तर करी। ओका इ देखावइ चाही कि ओका अलग कीन्ह ग अहइ अउर आपन क पूरी तरह परमेस्सर क अर्पित कइ चुका अहइ। ८ जउन पूरा टेमें मैं उ अलग कीन्ह गवा उ पूरी तरह आपने यहोवा क अर्पित किहे रहा अहइ। ९ इ होइ सकत ह कि नाज़ीर कउनो दूसर मनई क संग होइ अउ दूसर मनई एकाएक मरि जाइ। जदि नाज़ीरी मरे भए मनई क छुई तउ उ अपवित्तर होइ जाइ। जदि अइसा होत ह तउ नाज़ीरी क मूँड स बार कटवावइ चाही। इ सबइ बार ओकरे खास दीन्ह गए बचन क हीसा रहेन। ओका आपन बारन क सतएँ दिन काटइ चाही काहे की उ दिन उ पवित्तर कीन्ह जात ह। १० तब अठवें दिन ओका दुइ फाखता या कबूतरी क दुइ बच्चा याजक क लगे लइ आवइ चाही। ओका याजक बरे ओनका मिलापवाला तम्बू क दुआरे देइ चाही। ११ तब याजक एक क कबूतरी पापबलि क रूप मैं भेंट करी। उ दूसरे कबूतरी क होमबलि क रूप मैं भेंट करी। अउर याजक उ मनई क ओकरे पाप बरे प्रायश्चित्त करब्या। (उ पाप किहेस काहे की उ ल्हास क लगे रहा।) उ समइ उ मनई फुन बचन देइ कि मूँडे क बारन क यहोवा बरे भेंट करी। १२ एकर इ अरथ भवा कि उ मनई क फुन पवित्रीकरण क काल मैं दूसर समइ बरे आपन आप क यहोवा क अर्पित कइ देइ चाही। उ मनई क एक बरिस क नर मेमना लावइ चाही। उ एँका दोखबलि क रूप मैं देइ। ओकरे पवित्रीकरण क सब दिन बिसराइ दीन्ह जात अहइ। उ मनई क नवा अलग होइके टेमें सुरु करइ क होइ। इ जरूर कीन्ह जाइ काहे की उ पवित्रीकरण पहिले काल मैं एक ल्हास क छुए रहा।

१३ “जब मनई क अलग होइ क टेमें पूरा होइ जाइ तउ ओका इ जरूर करइ चाही। ओका मिलापवाला तम्बू क दुआर प जाइ चाही। १४ हुवाँ उ आपन भेंट यहोवा क देइ। ओकर भेंट होइ चाही :

होमबलि बरे बिन दोखे क एक बरिस क नर मेमनापापबलि क भेंट खातिर

बिन दोखे क एक बरिस क मादा मेमना।

मेलबलि बरे बिन दोखे क एक नर भेड़ा।

१५ बे खमीरे क बनी भइ रोटिन-नीक आटा मैं साना भवा तेले स बना केक-एँके ऊपर लावइ चाही। अउर दूसर अन्नबलि अउ पयेबलि जउन इ भेंटन क एक हीसा अहइ।

१६ “तब याजक इ चीजन क यहोवा क देइ। याजक पापबलि अउ होमबलि चढ़ाई। १७ याजक बे खमीरे क रोटी क टोकरी यहोवा क देइ। तब उ यहोवा क मेलबलि क रूप मैं भेड़ा क मारी। उ यहोवा क अन्नबलि अउ पयेबलि क संग एँका देइ।

१८ “नाज़ीर क मिलापवाला तम्बू क दुआर प जाइ चाही। हुवाँ ओका आपन बार कटवावइ चाही जेका उ यहोवा बरे बढ़ाए रहा। ओन बारन क मेलबलि क नीचे आगी क ऊपर रखई चाही।

१९ “जब नाज़ीर आपन बारन क काटि चुकी तउ याजक ओका भेड़ा क एक टु उसना भवा काँध अउ टोकरी स एक टु बड़वार अउ एक टु नान्ह क केक देइ। इ दुइनउँ केक बे खमीरे क बना होइहीं। २० तब याजक इ चीजन क यहोवा क अगवा हलाई। इ एक टु उत्तोलनबलि अहइ। इ चीजन पवित्तर अहइँ अउ याजक क अहइँ। भेड़ा क छाती अउ जाँध भी यहोवा क समन्वा हलावा जइहीं। इ चीजन भी याजक क बाटिन। एँकरे पाछे नाज़ीरी दाखरस पी सकत ह।

२१ “जदि कउनो मनई नाज़ीर होइ चाहत ह तउ ओका यहोवा क इ सबहिं भेंट देइ चाही। इ नेमें ओन मनइयन बरे अहइँ जउन नाज़ीर होइ क बचन लेत हीं। जदि कउनो मनई जियादा देइ क बचन देत ह तउ ओका आपन बचन क निभावइ बरे नाज़ीर क नेमें क मुताबिक करइ चाही।”

याजक क आसीबाद

२२ यहोवा मूसा स कहेस, २३ “हारून अउ ओकरे पूतन स कहा। इस्राएल क लोगन क आसीबाद देइ क तरीका इहइ अहइ, ओनसे कहा :

२४ यहोवा तोहका आसीस देइ अउ तोहार रच्छा करइ।

२५ यहोवा क कृपा-दृष्टि तोहे प उजागर होइ ।
उ तोहसे पिरम करइ ।

२६ यहोवा क दृष्टि तोह प होइ ।

उ तोह पइ दायी करी उ तोहका सान्ति क साथ
आसीबाँद देइ ।

२७ इ तरह हारून अउ ओकर पूत इस्राएल क
मनइयन क समन्वा मोर नाउँ लेइहीं अउ मई
ओनका आसीबाँद देब ।”

पवित्तर तम्बू क समर्पण

१ जउने दिन मूसा पवित्तर तम्बू क लगाउब
समापन किहेस, उ एँका यहोवा क अर्पण
किहेस । मूसा तम्बू अउ एहमाँ प्रयोग मँ
आवइवाली चीजन, अउर वेदी अउ एहमाँ प्रयोग
आवइवाली चीजन अउर वेदी अउ एहमाँ प्रयोग
आवइवाली चिजियन प खास तेल डाएस इ ओन
सबइ चीजन क पवित्तर किहेस ।

२ तब इस्राएल क नेता लोग भेंट चढ़ाएन ।
इ पचे आपन-आपन परिवारे क मुखिया रहे रहेन
जउन आपन परिवार समूहन क नेता रहेन । इ नेता
लोग मनइयन क गनेन । ३ इ सबइ नेता यहोवा बरे
भेंट लइ आएन । उ पचे चारिहुँ ओर स ढँकी छू : टु
गाड़ी अउ बारह टु बर्धा क लइ आएन । (हर एक
नेता क जरिये एक टु बर्धा दीन्ह गइ रही । अउर
दुइ नेता क जरिये एक टु गाड़ी दीन्ह गइ रही)
नेता लोग पवित्तर तम्बू मँ यहोवा क इ चीजन क
दिहेन ।

४ यहोवा मूसा स कहेस, ५ “नेता लोग क इ
चीजन क अंगीकार करा । इ चीजन क लेवि-बंस
क मनइयन क द्या । इ ओनका मिलापवाला तम्बू
प काम करइ मँ सहायक होइ ।”

६ एह बरे मूसा चारिहुँ कइँती स ढकी भइ
गाड़ियन अउ गइयन क लिहस । उ इ चीजन क
लेवी-बंस क लोगन क दिहस । ७ उ दुइ गाड़ी अउ
चार टु गाड़ गोर्सेन बंसी लोगन क दिहस । ओनका
आपन काम बरे ओन गाड़ियन अउ गइयन क
जरूरत रही । ८ तब मूसा चार टु गाड़ी अउ आठ टु
गइया मरारी बंस क मनइयन क दिहस । ओनका
आपन काम बरे गाड़ी अउ गइयन क जरूरत रही ।
याजक हारून क पूत ईतामार इ सबहिँ मनइयन
क काम बरे जिम्मेदार रहा । ९ मूसा कोहात बंसी
मनइयन क कउनो गाड़ या कउनो गाड़ी नाहीं
दिहस । इ मनइयन क पवित्तर चीजन आपन काँधे

प ढोउब रहा इहइ कारज ओनका करइ बरे सौँपा
ग रहा ।

१० जउन दिन मूसा वेदी प तेल डाएस, उहइ दिन
नेता लोग वेदी क अर्पण बरे आपन भेंट चढ़ावइ
बरे लइ आएन । उ पचे आपन भेंट वेदी क समन्वा
यहोवा क भेंट किहेन । ११ यहोवा पहिले स ही मूसा
स कहे रहा, “हर दिन एक एक नेता वेदी प भेंट
चढ़ावइ लइ जाइ ।”

१२-८३ श्वारहु-नेतन मँ स हर एक नेता आपन-
आपन भेंट लइ आवा ।

उ सबइ भेंट इ अहइँ : हर एक नेता चाँदी क
एक टु थाली लइ आवा जेकर वजन एक सौ तीस
सेकेल अउर एक चाँदी क खोरा जेकर वजन सत्तर
सेकेल रहा । इ दुइनउँ उपहार क पवित्तर स्थान
क सेकेल क अनुसार भवा बटखरा स तउला गवा
रहा । हर खोरा अउ हर थाली मँ तेल महीन आटा
भरा रहा । इ अन्नबलि क रूप मँ प्रयोग मँ लइ
जात रहा । हर नेता सोना क एक बड़का कलछुला
भी लइ आवा जेकर वजन दस सेकेल रहा । इ
कलछुला मँ धूप भरी रही ।

हर नेता एक टु बछ्वा, एक भेड़ा अउ एक बरिस
क नर मेमना भी लइ आवा । इ गोरुअन होमबलि
बरे रहेन । हर नेता पापबलि क रूप मँ बड़परइ बरे
एक बोकरा भी लावा । हर नेता दुइ गाड़, पाँच भेड़ा,
पाँच बोकरा अउ एक-एक बरिस क पाँच मेमना
लिआवा । इ सबन क एक मलेबलि बरे बलि दीन्ह
गइ ।

पहिले दिन अम्मीनादाब क पूत नहसोन, जउन
यहूदा क परिवार समूह स रहा, आपन भेंट
लिआवा ।

दूसर दिन सूआर क बेटवा नतनेल जउन
इस्साकार क नेता रहा, आपन भेंट लिआवा ।

तीसरे दिन हेलोन क बेटवा एलीआब जउन
जबूलून क नेता रहा, आपन भेंट लिआवा ।

चउथे दिन सदेऊर क पूत एलीसूर जउन
रूबेनियन क नेता रहा, आपन भेंट लिआवा ।

पँचए दिन सूरीसद्वै क पूत सलुनीएल जउन
सिमोनियन क नेता रहा, आपन भेंट लिआवा ।

छठएँ दिन दूएल क बेटा एल्यासाप जउन
गादियन क नेता रहा, आपन भेंट लिआवा ।

सतएँ दिन अम्मीहूद क बेटवा एलीसामा जउन
एप्रैम क नेता रहा, आपन भेंट लिआवा ।

१७ : १२-८३ पद १२-८३ मूल पाठ मँ हर एक नेता क सूची अलग-अलग दीन्ह गइ अहइ । मुला हर एक
भेंट क लिखा भवा पाठ एक समान अहइ । यह बरे सुविधा क धियान देत भए पद-गनती १२ से ८३ ताई
हिआँ एक साथेन दिआइके अनुसार कीन्ह ग रहा ।

अठएँ दिन पदासूर क पूत गम्लीएल जउन मनस्से क मनइयन क नेता रहा, आपन भेंट लिआवा।

नवें दिन गिदोनी क पूत अबीदान जउन विन्यामीन क मनइयन क नेता रहा, आपन भेंट लिआवा।

दसएँ दिन अम्मीसद्दे क बेटवा अहीयाजर जउन दान क लोगन क नेता रहा, आपन भेंट लिआवा।
ग्यारहवें दिन ओक्रान क बेटवा पजीएल जउन आसेर क लोगन क नेता रहा, आपन भेंट लिआवा।

अउर फिन बारहवें दिन एनान क बेटवा अहीरा जउन नप्ताली मनइयन क नेता रहा, आपन भेंट लइके आवा।

५४ इ तरह इ सबहिं चीजन इस्राएली मनइयन क नेता लोगन क भेंट रही। इ चीजन तब लाइ गइन जब मूसा खास तेल वेदी प एका अर्पण बरे डाएस। उ पचे बारह चाँदी क तस्तरी, बारह चाँदी क खोरा अउ बारह सोना क चम्मच लाएन।
५५ चाँदी क हर तस्तरी क वजन लग भग एक सौ सेकेल रहा। अउर हरेक खोरा क चाँदी क वजन लगभग सत्तर सेकेल रहा। चाँदी क तस्तरियन अउ चाँदी क खोरन क कुल माना गवा वजन **दुइ हजार चार सौ सेकेल रहा।
५६ धूप स लबालब सोना क चम्मच मैं स हर एक क माना गवा वजन चार औंस रहा। बारह सोने क चम्मचन क कुल वजन करीब करीब उ पौंड रहा।

५७ होमबलि बरे गोरुअन क कुल गनती बारह बर्धा, बारह भेड़ा अउ बारह एक बरिस क भेड़ी क नर बच्चा रहेन। हुवाँ अन्नबलि भी रहा। यहोवा क पापबलि क रूप मैं प्रयोग मैं आवइ वाला कुल बारह बोकरा भी रहेन। ५८ नेता लोग मेलबलि क रूप मैं प्रयोग अउ मारा जाइ बरे गोरुअन क दिहन। इ सबइ गोरुअन क एक साथ गनती चौबीस बर्धा, साठ भेड़ा, साठ बोकरा अउ साठ एक बरिस क भेड़ी क नर बच्चा भी रहेन। इ तरह उ पचे वेदी क इ चीजन अर्पण कई बरे भेंट किहेन। इ मूसा वेदी प खास तेल डाइ क पाछे भवा।

५९ मूसा मिलापवाला तम्बू मैं यहोवा स बात करइ गवा। उ टेमें उ आपन स बात करत भइ यहोवा क वाणी सुनेस। उ वाणी करार क सन्दूखे क ऊपर क बिसेख ढकना क दुइनउं करूब सरगदूतन

क बगल स आवत रही। इ तरह परमेस्सर मूसा स बात किहस।

डीबट

१ यहोवा मूसा स कहेस, २ “हारून स बात करा अउ ओसे कहा, उ ठउरन प सात दिया धरा जेका मई तोहका देखोएउँ ह। उ सबइ दियन डीबट क समन्वा क डेबरा क रोसन करिहीं।”

३ हारून इ किहेस। हारून ओनें दियन क ठीक ठउर प धरेस अउ ओनकइ मुँह अइसा कइ दिहस कि ओसे डीबट क समन्वा क पहुँटा उजियर होइ सकइ। उ मूसा क दीन्ह गवा यहोवा क हुकुम क मानेस। ४ डीबट सोने क पाटी स बना रहा। सोना क उपयोग पावा स लइ क उपर डीबट क सोना क फूल तलक कीन्ह गवा रहा। इ सब उहइ तरह बना रहा जइसा यहोवा मूसा क देखोए रहा।

लेवी बंस क मनइयन क समर्पण

५ यहोवा मूसा स कहेस, ६ “लेवी बंस क मनइयन क इस्राएल क दूसर मनइयन स अलग लइ जा। ओनें लेवी बंसी मनइयन क सुद्ध करा। ७ इ तोहका सुद्ध बनावइ बरे करइ क होइ। पापबलि स खास पानी ८ ओन प छिरका। इ पानी ओनका सुद्ध करी। तब उ पचे पूरा सरिर स बार उस्तरा स कटवइहीं अउ आपन आढना क धोइहीं। इ ओनके सरिर क सुद्ध करी।

९ “तब उ पचे एक नवा बर्धा अउ ओकरे संग प्रयोग मैं आवइवाली अन्नबलि लेइहीं। इ अन्नबलि तेले स साना भवा आटा होइ। तब दूसर बर्धा क पाप बरे भेंट क रूप मैं ल्या। १० लेवी बंस क मनइयन क मिलापवाला तम्बू क समन्वा पहुँटा मैं लिआवा। तब इस्राएल क सबहिं मनइयन क चारिहुँ कईती स बटोरा। ११ तब तोहका लेवी बंस क मनइयन क यहोवा क समन्वा लइ आवा। अउ इस्राएल क लोग आपन हाथ ओन प धरीहीं। १२ तब हारून लेवी बंस क लोगन क यहोवा क समन्वा लाइ। उ पचे यहोवा बरे उत्तोलनबलि क रूप मैं होइहीं। इ ढंग स लेवी बंस क लोग यहोवा क विसेस काम करइ बरे तइयार होइहीं।

१३ “लेवी बंस क लोगन स कहा कि उ पचे आपन हाथ बर्धा क मूँडे प धरिहीं। एक बर्धा यहोवा क पापबलि क रूप मैं होइ। दूसर बर्धा यहोवा क

**७ :८५ माना गवा वजान “पवित्तर सेकेल।” एक ठु पौंडे मैं चालीस सेकेल होत रहेन। पवित्तर तम्बू अउ मन्दिर मैं तउल क काम मैं आवइ वाला माना भवा बटखरा।

††८ :७ पापबलि स खास पानी इ पानी मैं लाल गइयन क राख रही जेका पाप बरे भेंट क रूप मैं वेदी प जरावा ग रहा।

होमबलि क रूप में काम आइ। इ भेंट लेवी-बंस क मनइयन क पाप बरे प्रायश्चित करी।^{१३} लवि बंस क मनइयन स कहा कि उ पचे हारून अउ ओकरे पूतन क अगवा खड़ा होइ। तब यहोवा क समन्वा लेवी बंस क मनइयन क उत्तोनबलि क रूप में अर्पण करा।^{१४} इ तरीका स लेवी बंस क लोग खास होइहीं। उ पचे इस्राएल क दूसर मनइयन स अलग होइहीं। अउर लेवी बंस क लोग हमार होइहीं।

^{१५} एह बरे लेवी बंस क मनइयन क सुद्ध करा। अउर ओनका यहोवा क समन्वा उत्तोलन बलि क रूप में हाजिर करा। जब इ पूरा हो जाइ तब उ पचे आइ सकत हीं अउर मिलापवाला तम्बू में आपन काम कइ सकत हीं।^{१६} इ सबइ लेवी बंसी इस्राएल क लोग अहीं जउन मोका दीन्ह ग अहइ। मइँ ओनका आपन लोग क रूप में अंगीकार किएउँ ह। बीते भए जमाना में हर एक इस्राएली परिवार में पहिलौटी क पइदा लरिका मोका दीन्ह जात रहा मुला मइँ लेवी बंस क मनइयन क इस्राएल क दूसर परिवारन क पहिलौटी क बेटवन क जगह प अंगीकार किहेउँ ह।^{१७} इस्राएल क हर मनई जउन हर एक परिवार में पहिले पइदा भवा ह, मोर अहइ। जदि उ मनई या गोरु अहइ तउ भी मोर अहइ। मइँ मिस्र में सबहिं पहिला पइदा गदेलन अउ जनावर क मारि डाएउँ रहा। एह बरे मइँ पहिला पइदा पूतन क अलग किहेउँ जेहँसे उ पचे मोर होइ सकई।^{१८} अब मइँ लेवी बंस क मनइयन क लइ लिहेउँ ह। मइँ इस्राएल क दूसर लोगन क परिवारन में पहिला पइदा भएन गदेलन क ठउर प एँका अंगीकार किहेउँ ह।^{१९} मइँ इस्राएल क सबहिं लोगन स लेवी बंस क मनइयन क चुनेउँ ह। मइँ ओनका हारून अउ ओकरे पूतन क एँका उपहार क रूप में दिहेउँ ह। मइँ चाहत हउँ कि उ पचे मिलापवाला तम्बू में काम करई। उ पचे इस्राएल क सबहिं मनइयन बरे सेवा करिहीं। अउर उ पचे ओन बलिदानन क देइ मँ मदद करिहीं जउन इस्राएल क लोगन क पापन क प्रायश्चित करिहीं। तब कउनो बड़ा रोग या कष्ट इस्राएल क लोगन क नाही होइ जब उ पचे पवित्रर ठउर क लगे अइहीं।^{२०} एह बरे मूसा, हारून अउ इस्राएल क सबहिं लोगन यहोवा क हुकुम मानेन। उ पचे लेवी बंस क खातिर वइसा ही किहेन, जइसा यहोवा ओनके बरे मूसा क हुकुम दिहे रहा।^{२१} लेवी लोग आपन क फछाँ किहेन अउ आपन ओढ़ना क धोएन। तब

हारून ओनका यहोवा क समन्वा उत्तोलन बलि क रूप में हाजिर किहेस। हारून उ भेंटन क भी चढ़ाएस जेका ओनकर पापन क प्रायश्चित करइ बरे चढ़ावा गवा रहा जउन ओनका पवित्रर कइ दिहे रहा।^{२२} ओकरे पाछे लेवी बंस क लोग आपन काम करइ बरे मिलापवाला तम्बू क आएन। हारून अउ ओकर पूतन ओनकइ देखरेख किहेन। उ पचे लेवी बंस क मनइयन क काम बरे जिम्मेदार रहेन। हारून अउ ओकर पूतन ओन आदेसन क मानेन जेका यहोवा मूसा क दिहे रहेन।

^{२३} यहोवा मूसा स कहेस, ^{२४} “लेवी बंस क मनइयन बरे इ विसेस आदेस अहइ : हर एक लेवी बंस क मनसेधू क, जउन पचीस बरिस या ओसे जिआदा उमर क अहइ, जरूर आवइ चाही अउ मिलापवाला तम्बू में क काम में हाथ बटावइ चाही।^{२५} जब कउनो मनई पचास साल क होइ जाइ तउ ओका रोजाना क कामे स छुट्टी लेइ चाही। ओका फुन काम करइ क जरूरत नाही अहइ।^{२६} पचास साल या ओसे जियादा उमर क लोग मिलापवाला तम्बू में आपन भाइयन क ओनके काम में मदद दइ सकत हीं। मुला उ पचे खुद काम नाही करिहीं। तोहका इ सब करइ चाही जब तू लेवि मनइयन क ओनका काम करइ क द्या।”

फसह त्यौहार

^१ यहोवा मूसा स सीने रेगिस्तान में कहेस। उ टेमें दूसर बरिस क पहिला महीना रहा। जब इस्राएल क मनइयन मिस्र स निकरा रहेन। यहोवा मूसा स कहेस, ^२ “लोगन क तय कीन्ह गवा टेमें पइ फसह क दावत जरूर मनावइ चाही।^३ उ तय कीन्ह गवा समइ इ महीना क चउदहवाँ दिन अहइ। ओनका गोधूरि क टेमें फसह क भोजन खाइ चाही। ओका इ सबइ कानून अउ नेम क पालन करइ चाही जेका त्यौहार में कीन्ह जात ह।”

^४ एह बरे मोसा इस्राएल क लोगन क फसह क त्यौहार मनावई बरे कहेस।^५ अउर लोग पहिला महीन क चउदहवाँ दिन वइसा ही किहेन। इस्राएल क मनइयन हर एक काम वइसन किहेन जइसा यहोवा मूसा क हुकुम दिहे रहेन।

^६ मुला कछू लोग फसह त्यौहार क भोज उ दिन नाही खाइ सकेन। उ पचे एक ल्हास क कारण सुद्ध नाही रहेन। एह बरे उ दिन उ पचे मूसा अउ हारून क लगे गएन।^७ उ पचे मूसा स कहेन, “हम पचे एक ल्हासे क छुअइ क कारण असुद्ध भवा अहेन। याजकन लोग तय कीन्ह ग टेमें प हमेका

यहोवा क चढ़ावा देइ स रोक दिहस। तउ हम पचे इस्राएल क दूसर मनइयन क संग फसह त्यौहार नाही मनाइ सकित। हमका का करइ चाही ?”

५ मूसा ओनसे कहेस, “मई यहोवा स पूछब कि उ एकरे बारे में का कहत ह।”

१ तब यहोवा मूसा स कहेस, १० “इस्राएल क लोगन स इ बातन कहा : इ विधि तोहार अउर तोहारे सन्तानन बरे होब्या। इ होइ सकत ह कि तू ठीक टेमें प फसह त्यौहार न मनाइ सका काहे की तू या तोहारे सन्तानन क कउनो मनई ल्हास क छुइ जाइ क कारण असुद्ध होइ या होइ सकत ह कि उ कउनो लम्बी जात्रा प गवा भवा अहा।”

११ उ फसह त्यौहार दूसर महीना क चउदहवाँ दिन गोधूरि क समइ मनावइ। उ मेमना, बे खमीरे क रोटी अउ करूआ सागपात खाइ। १२ दूसर दिन क भिन्सारे तलक ओका ओहमाँ स कउनो भी भोजन नाही तजइ चाही। ओका भेड़ी क कउनो हाइ क भी नाही तोइइ चाही। उ मनई क फसह क नेमें क मानइ चाही। १३ कउनो भी व्यक्ति जउन पवित्तर अहइ अउर लम्बी जात्रा पइ नाही अहइ तउ फसह त्यौहार ठीक समइ पइ ही मनावइ चाही। जदि उ मनई फसह त्यौहार ठीक समइ पइ नाही मनावत ह तउ ओका आपन मनइयन स अलगइ पठइ दीन्ह जाइ। उ अपराधी वा काहे की उ यहोवा क ठीक टेमें प भेंट नाही चढ़ाएस। तउ ओका जरूर सजा दीन्ह जाइ चाही।

१४ “तू सबइ क बीच बसइया गेर इस्राएली फसह त्यौहार में आवइ चाहइ तउ तोहारे संग हीसा लइ सकत ह। इ कनून में अहइ मुला उ मनई क फसह क सब नेमें मानइ चाही। उहइ नेमें सब बरे अहई।”

बादर अउ आगी

१५ जउने दिन पवित्तर तम्बू अउ करार क तम्बू लगावा गवा। यहोवा क बादर एका घेरि लिहस। रात में, उ बादर आगी क नाई देखाइ देत रहा। १६ बादर पवित्तर तम्बू प बराबर थमा रहा। अउर राति में बादर आगी क तरह देखाँत रहा। १७ जब बादर पवित्तर तम्बू प आपन ठउर स तम्बू प ठहरत रहा, इस्राएलियन एकर पाछा करत रहेन। जब बादर थमि जात रहा तब इस्राएल क लोग हुवई सिबिर डावत रहेन। १८ इहइ ढराँ रहा कि यहोवा मनइयन क देखाएस कि कब जात्रा करई, कब रुकि जाई अउ कब सिबिर डावई। अउ जबहि तबहि बादर पवित्तर तम्बू क ऊपर ठहरि जात, लोग उहइ ठउर प सिबिर दसाए

रहतेन। १९ कबहुँ कबहुँ बादर बहोत दिन तलक पवित्तर तम्बू प जमा रहत। इस्राएलियन यहोवा क हुकुम मनतेन अउ जात्रा नाही करत रहेन। २० कबहुँ कबहुँ बादर पवित्तर तम्बू प कछू दिन बरे ठहरत रहत रहा यहोवा क हुकुम क अनुसार उ ठहरत अउ यहोवा क हुकुम क अनुसार उ चलत। २१ कबहुँ कबहुँ बादर रात में ठहरि जात अउ दूसर दिन भिन्सारे चलि पड़त। तउ मनइयन आपन चीजन क बटोरतेन अउ एकर पाछा करतेन। या अगर बादर एक दिन अउ एक रात ठहरत अउर तब इ चलि सुरू करत तउ मनइयन ओकर साथ चलि रहत। २२ जदि बादर तम्बू क ऊपर दुइ दिन, या एक महीना या एक बरिस ठउरत तउ लोग यहोवा क हुकुम मनतेन। उ पचे उहइ सिबिर में ठउरतेन अउ तब ताई न चलतेन जब तलक बादर न चलत। जब बादर आपन ठउर स उठत अउ चलत रहत तबहि लोग चलतेन। २३ इ तरह लोग यहोवा क हुकुम क मनतेन। उ पचे हुवई सिबिर जमउतेन जहाँ यहोवा बतावत। उ पचे तब चलतेन जब यहोवा ओनका अइसा बतावत। लोग धियान स निहरतेन अउ यहोवा क हुकुम मूसा क जरिए मनतेन।

चाँदी क तुरहियन

१ यहोवा मूसा स कहेस, २ “तुरहियन बनवइ ३० बरे चाँदी क प्रयोग करा। चाँदी क पतरी बनाइके ओसे दुइ तुरहियन बनावा। इ सबइ तुरहियन क उपयोग मनइयन क एक संग बोलावइ अउ इ बतावइ बरे कि सिबिर क लइक कब चलइ चाही। ३ जब तू इ तुरहियन क बजउब्या, तउ सबहि मनइयन क मिलापवाला तम्बू क प्रवेस दुआर प बटुर जाइ चाही। ४ अगर तू एक ही तुरही दर तलक बजउब्या तब सिबिर नेता लोग अइहीं। (इस्राएल क बारहु परिवारे क मुखिया तोहरे समन्वा बटुर जइहीं।)

५ “जब तू तुरहियन क चेताउनी क रूप में बजाउब इ मनइयन क सिबिर क लेकइ चलइ चाही। जब तू पहिली दाई तू तुरहियन क चेताउनी क रूप में बजउब्या, तउ मिलापवाला तम्बू क पूरब कइती क परिवार दलन क चलब सुरू करइ चाही। ६ दूसरी दाई जब तू तुरहियन क चेताउनी क रूप में बजउब्या, मिलापवाला तम्बू क ढक्खिन कइती क परिवार दलन क सिबिर जमाए भए मनइयन क आगे चलब सुरू करइ क होइ। ७ जब तू कउनो खास सभा बरे मनइयन क बटोरइ चाहा, तउ तुरहियन क दूसरे ढंग स लम्बी धिरान अवाजे

मँ बजावा।^५ सिरिफ हारून क याजक बेटवन ही तुरहियन बजाइ सकत हीं। इ तू सब पचन बरे नेमँ अहइ जउन हमेसा अगवा क पीढ़ी दर पीढ़ी चलत रही।

^६ “जदि तू आपन देस मँ दुस्मन स लड़त रहा हवा तउ ओनसे लड़इ स पहिले तुरहियन क चेताउनी क रूप म बजावा। तब यहोवा तोहार परमेस्सर तोहार बात सुनी अउ तू सबन क दुस्मनन स बचाइ।^७ तू सबन क आपन खास बड़क, नवा चन्द्रमा क दिना पइ अउ खुसी क टेमें प तुरहियन बजावइ चाही। जब तू पचे होमबलि अउ मेलबलि द्या, तउ तुरहियन बजावा। इ यहोवा तोहार परमेस्सर बरे तोहका याद रखइ बरे खास तरीका होइ।”

इस्राएल क लोग सिबिर लइ जात हीं

^{११} जब इस्राएल क मनइयन मिस्र छोड़ी दिहेन ओकरे पाछे दूसर बरिस क दूसर महीना क बीसवाँ दिन करार क तम्बू क ऊपर स बादर उठा।^{१२} एह बरे इस्राएल क मनइयन आपन जात्रा सुरू किहेन। उ सबइ सीनै क रेगिस्तान तजि दिहेन अउ तब तलक जात्रा करत रहेन जब ताई बादर पारान क रेगिस्तान मँ नाहीं थमा।^{१३} इ पहिली दाई रही जब मनइयन सिबिर लइ गएन। जइसा यहोवा मूसा क हुकुम दिहेस वइसा सिबिर क चलाएन।

^{१४} सबसे पहिले यहूदा क सिबिर स तीन दल गएन। उ पचे झण्डा लइके जात्रा किहेन। पहिला समूह यहूदा क परिवार समूह क रहा। अम्मीनादाब क पूत नहसोन उ दल क नेता रहा।^{१५} ओकरे पाछे, इस्साकार क परिवार समूह आवा। सूआर क पूत नतनेल उ समूह क नेता रहा।^{१६} अउर तब जबलून क परिवार समूह आवा। हेलोन क पूत एलीआब उ समूह क नेता रहा।

^{१७} तब पवित्तर तम्बू उतारा गवा। गोर्सन अउ मरारी परिवार क मनइयन पवित्तर तम्बू क लइके चलेन। एह बरे इ परिवारे क लोग कतार मँ ठीक पाछे रहेन।

^{१८} तब रूबेन क सिबिर स तीन दल आएन। उ पचे आपन निसान लइके जात्रा किहेन। पहिला समूह रूबेन परिवार क रहा। सदेऊर क पूत एलीआजार इ समूह क नेता रहा।^{१९} ओकरे पाछे, सिमोन क परिवार समूह आवा। सूरीसद्वै क पूत सलूमीएल उ समूह क नेता रहा।^{२०} अउर तब गाद क परिवार समूह आवा। दूएल क पूत एलिअसफ इ समूह क नेता रहा।^{२१} तब कोहात परिवार क लोग

आएन। उ पचे ओन परित्तर चीजन क ढोएन जउन पवित्तर ठउर मँ धरी रहिन। अब पवित्तर तम्बू क इ समूहन क नवा सिबिर मँ पहुँचइ क पहिले लगाइ द्या।

^{२२} एँकरे पाछे, एप्रैम क सिबिर क तीन समूह आएन। उ पचे आपन झण्डा लइके जात्रा किहेन। पहिला समूह एप्रैम क परिवार समूह रहा। अम्मीहद क पूत एलीसामा उ समूह क नेता रहा।^{२३} ओकरे पाछे, मनस्से क परिवार समूह आवा। पदासूर क पूत गम्तीएल उ दले क नेता रहा।^{२४} तब बिन्यामीन क परिवार समूह आवा। गिदौनी क पूत अबीदान उ दले क नेता रहा।

^{२५} कतार मँ आखिरी तीन ठु परिवार समूह दूसर सबहिं परिवार समूह बरे पीछे रच्छे करहेन। इ सब समूह दान क सिबिर स रहेन। उ पचे आपन निसान क संग जात्रा किहेन। पहिला समूह दान क परिवार समूह क रहा। अम्मीसद्वै क पूत अहीएजेर उ समूह क नेता रहा।^{२६} ओकरे ठीक पाछे आसेर क परिवार समूह आवा। ओकुरान क पूत पजीएल उ समूह क नेता रहा।^{२७} तब नप्ताली क परिवार समूह आवा। एनान क पूत अहीरा उ समूह क नेता रहा।^{२८} इहइ तरह इस्राएल एक जगह स दूसर जगह पइ आपन समूहन क साथ, जब कबहुँ भी उ सिबिर लइ जाइ जात्रा करत रहेन।

^{२९} रुएल क पूत होबाब मिद्यानी रहा। (रुएल मूसा क ससुर रहा।) मूसा होबाब स कहेस, “हम पचे उ देस क जात्रा करत अही जेका यहोवा हम पचन क देइ क बचन दिहे अहइ। एह बरे हम लोगन क संग आवा। हम पचे तोहरे संग नीक बेउहार करब। यहोवा इस्राएल बरे नीक चीज देइ क बचन दिहे अहइ।”

^{३०} मुला होबाब जवाब दिहेस, “नाही; मई तोहरे संग न जाब। मई आपन देस अउ मनइयन क लगे जाब।”

^{३१} तब मूसा कहेस, “मेहरबानी कइके हमका जिन तजा। तू जानत अहा कि रेगिस्तान मँ हम पचन्क कइसा सिबिर लगाइ क होइ। तू हमार राह क देखइया होब्या।^{३२} अगर तू हमरे संग आवत ह्या तउ यहोवा जउन कछु नीक चीज देइहीं, हम तोहर संग हींसा बाँटब।”

^{३३} उ सबइ यहोवा क पहाड़े स जात्रा सुरू किहेन। याजक लोग करार क सन्दूख लिहनेन अउ मनइयन क अगवा चलेन। उ पचे सिबिर डावइ बरे उचित ठउर क निहारत निहारत तीन दिना तलक लोगन क आगे-आगे सन्दूख लइ चलत रहेन।^{३४} यहोवा क बदरा ओनके ऊपर मँडरात रहा।

अउर हर एक भिन्सारे जब उ पचे आपन सिबिर क तजि देत रहेन तउ ओनका राह देखावइ बरे बदरा हुवाँ रहत रहा।

३५ जब पवित्तर सन्दूख सिबिर स बाहर कइ जात रहा। मूसा हमेसा कहत रहा :

“परमेस्सर, उठा!

तोहार दुस्मनन छितराइ जाई

तोहार दुस्मन तोहरे समन्वा स पराइ जाई।”

३६ अउर जब पवित्तर सन्दूख आपन ठउर प धरा जात रहा, तब मूसा सदा कहत रहा,

“हे परमेस्सर इस्राएल क दसिहूँ

हजार बंस क लगे लउटि आवा।”

लोग फुन सिकाइत करत हीं

११ मनइयन आपन कस्ट क सिकाइत करब सुरु किहेन। यहोवा ओनकइ सिकाइत सुनेस। जब यहोवा इ बातन सुनेस तउ कोहाइ गवा। यहोवा क तरफ स आगी लोगन क बीच लग गइ। आगी सिबिर क कोना क कछू बाहरी भाग क भस्म कइ दिहस। २ एह बरे लोग मूसा क मदद बरे पुकारेन। मूसा यहोवा स बिनती किहेस अउ आगी क बरब बन्द होइग। ३ एह बरे उ ठउर क नाउँ तबेरा पड़ि गवा। मनइयन उ ठउर क इहइ नाम दिहन काहे की यहोवा ओनके बीच आगी बारे रहा।

सत्तर पुरनिया नेतन

४ गरीब लोगन क भीड़ अउर इस्राएलियन क बीच आम जन-समूह दूसर खाइ बरे इच्छा जाहिर किहेन। हाली ही इस्राएल क मनइयन फुन सिकाइत करब सुरु किहेन। मनइयन कहेंन, “हम पचे गोस खाइ चाहित ह। ५ हम पचे मछूरी क याद करित ह जउन हम मिस्र मँ खावा ह। उ मछूरियन क कउनो दाम नाहीं देइ क पड़त रहा। हम पचन क लगे ढेर क भाजी रहिन जइसे ककरियन, खरबूजा, चीव (एक किसिम क पियाज), पियाज अउ लहसुन। ६ मुला अब हम ताकत खोइ चुका अही। इ मन्ना क छोड़िके खाइ बरे हम कछू नाहीं लखइ सकत ह।” ७ (मन्ना धन्ना बिया क नाई रहा अउ पेड़ क गोदं क नाई देखात रहा। ८ लोग एँका बटोरत रहेन अउ तब एक पीसिके आटा बनवत रहेन। या उ पचे एँका खूँदइ बरे चक्की बइपरतेन, एँका बासन मँ पकउतेन या एँकर केक बनावत रहेन। “केक” क स्वाद जैतून क तेल स पकी भइ रोटी क तरह रहा। ९ हर रात क भुईया ओस स गीली होइ जात तउ मन्ना जमीने प टपकत रहा।)

१० मूसा हर एक परिवार क मनइयन क आपन-आपन तम्बू क दुआरे प खड़ा भएन सिकाइत करत सुनेस। यहोवा बहोत कोहाइ गवा। एँहसे मूसा बहोत हलाकान भवा। ११ मूसा यहोवा स पूछेस, “यहोवा! आप आपन सेवक लोगन प इ मुसीबत काहे डायल ह। मई का गलती किहेउँ ह? मई तोहका नाखुस करइ का किहे उँ ह? तू मोह प इ सबहिं मनइयन क जिम्मेदारी काहे ओढ़ायल ह? १२ तू जानत ह कि मई इ सबहिं मनइयन क बाप नाहीं अहउँ। तू जानत ह कि मई एँका नाहीं पइदा किहेउँ ह। मुला मोका एँकइ फिकिर करइ चाही जइसे धाई गदेलल क कोरा मँ लइ चलत ह। तू हमका अइसा करइ क काहे मजबूर करत ह? तू मोका काहे जबरियावत ह कि मई एँका उ देस क लइ चलउँ जेका देइ क बचन ओनके पुरखन क तू दिहा ह। १३ मोरे लगे इ मनइयन बरे जियादा गोस नाहीं अहइ। मुला उ पचे लगातार मोसे सिकाइत करत अहइ। उ सबइ कहत हीं, ‘हमका खाइके गोस द्या।’ १४ मई अकेल्ला इ सब मनइयन क देख-भाल नाहीं कइ सकित। इ मोरे बरे भारी बोझा अहइ। १५ जदि आप ओनके कस्ट क मोका देइ क काम चलावत रहइ चाहत हीं तउ आप मोका अबहिं मारि डारइ। जदि आप मोका सेवक मानत हीं तउ अबहिं मोका मरि जाइ देइ। तब मोर सबहिं कस्ट खतम होइ जइही।”

१६ यहोवा मूसा स कहेस, “मोरे लगे इस्राएल क सत्तर बुजुर्गन लइ आवा जउन मनइयन क अफसर अउ पुरनिया होइ। एँका मिलापवाला तम्बू मँ लिआवा। हुवाँ ओनाका आपन संग खड़ा करा। १७ तब मई आउब अउ तोहसे बात करब। अब तोह प आतिमा आइ बा। मुला मई ओनका भी उ आतिमा देब। तब उ पचे मनइयन क देख भाल करइ मँ मदद करिहीं। इ तरह तोहका इ मनइयन बरे अकेले बोझा नाहीं उठाइ क होइ।

१८ “मनइयन स कहा, भियान खातिर आपन क तइयार करा। भियान तू पचे गोस खाब्या। यहोवा सुनेस ह जबहिं तू सबइ रोया अउ चीख्या ह। यहोवा तू पचन क बातन सुनेस ह जब तू मनइयन स कहया, ‘हमका खाइ बरे गोस द्या। हम पचन क इ मिस्र मँ नीक रहा।’ तउ यहोवा अब तू पचन क गोस देइ। अउर तू पचे ओका खाब्या। १९ तू पचे सिरिफ ओका एक दिन नाहीं, दुइ, पाँच, दस या बीस दिन भी खाइ सकब्या। २० तू पचे उ माँस महीना भर खाब्या। तू पचे उ गोस तब तलक खाब्या जब तलक ओसे ऊब न जाब्या। इ होइ, काहे की तू पचे यहोवा क खिलाफ सिकाइत

किहा ह। यहोवा तू मनइयन मँ घूमत ह अउ तोहार जरुरत क समझत ह। मुला तू पचे ओकरे अगवा रोया, चिचियाया अउ ओराहना दिहा। तू मनइयन स कहा, 'हम पचे आखिर मिस्र काहे छोड़ि दीन्ह?'"

२१ मूसा कहेस, "यहोवा! हिआँ ६,००,००० मनसेधू साथ चलत अहई। अउर तू कहत ह, 'मई ओनका पूरा महीना भइ खाइके गोस देब।' २२ जदि हमका सबहिं भेड़ी अउ गोरु मारइ क होइ तउ भी एँतने बड़े तादाद मँ मनइयन क महीना भर खाइके भरपूर न होइ। अउर जदि हम समुदर क सारी मछरियन क धइ लेइ तउ भी ओनके बरे पूर्ति न होइ।"

२३ मुला यहोवा मूसा स कहेस, "यहोवा क सकती क जिन समेटा। तू देखब्या कि जदि मई कहत हउँ कि मई कछू करब तउ मई ओका कइ सकत हउँ।"

२४ एह बरे मूसा मनइयन स बैतयाइ बाहेर गवा। मूसा ओनका उहइ बताएस जउन यहोवा कहे रहा। तब मूसा सत्तर बुजुर्ग क बटोरेस। मूसा ओनसे पवित्तर तम्बू क चारिहुँ कइती खड़ा होइके कहेस। २५ तब यहोवा एक बादर मँ उतरा अउ उ मूसा स बांत किहस। आतिमा मूसा प सवार रही। यहोवा उहइ आरौतमा क सत्तर बुजुर्गन लोगन प डाल दिहस। जब ओन सबन मँ आतिमा आइ तउ उ पचे भविस्सबाणी करइ लागेन। मुला ओकर बाद उ पचे अइसा अउर कभी नाही किहस।

२६ सत्तर बुजुर्गन मँ स दुइ टु, एल्दाद अउ मेदाद तम्बू मँ स बाहेर नाही गएन। ओनकइ नाउँ बुजुर्गन क सूची मँ रहा मुला उ पचे सिबिर मँ रहन। मुला परम आतिमा ओन पइ भी आइ अउ उ पचे सिबिर मँ भविस्सबानी करइ लागेन। २७ एक टु जवान दउड़ा अउ मूसा क सूचना दिहस। उ मनई कहेस, "एल्दाद अउ मेदाद सिबिर मँ भविस्सबाणी करत अहई।"

२८ नून क पूत यहोसू मूसा स कहेस, "मूसा, तोहका ओनका रोकइ चाही।" (यहोसू मूसा क सहायक तब स रहा जब उ किसोर रहा।)

२९ मुला मूसा जवाब दिहस, "का तू मोह बरे जलन करत अहइ? मई चाहत हउँ कि यहोवा क सब लोग भविस्सबाणी करइ क जोगग होइ जाई। मई चाहत हउँ कि यहोवा आपन आतिमा ओन सबहिं प पठवइ।" ३० तब मूसा अउ इस्राएल क नेता सिबिर मँ लउटि गएन।

बटेरेन् आइन

३१ तबहिं यहोवा समुदर कइती स आँधी चलाएस। आँधी उ पहुँटा मँ बटेरेन क पटाएस। बटेरेन सिबिर क चारिहुँ कइती उड़इ लागिन। हुआँ एँतना बटेरेन रहिन कि भुईया ढँकि गइ। भुईया प बटेरेन क तीन फुट गहरी परत जमा होइ गइ। कउनो मनई एक दिन मँ ओतनी दूर जाइ सकत रहा जेतती दूर तलक चारिहुँ कइती बटेरे रहिन। ३२ मनई अहदकेन अउ बाहेर आएन। उ पचे सारा दिन अउ सारी रात बटेरेन क बटोरेन। अउर फिन अगला दिन भी उ सबइ बटेरेन क बटोरेन। हर मिला कम स कम साठ बसल या ओसे जियादा बटेरेन बटोरेस। तब मनइयन बटेरेन क आपन सिबिर क चारिहुँ कइती धूप मँ फइलाएन।

३३ मनइयन गोस खाब सुरु किहन, मुला यहोवा कोहाइ गवा। जब गोस ओनके मुँहना मँ रहा अउ एँकरे पहिले कि मनइयन लील लेई यहोवा ओनका बहोत बेराम कइ दिहस। ढेर लोगन हुवई मरि बिलाइ गएन अउर ओनका माटी दइ दीन्ह गइ। ३४ एह बरे मनइयन उ ठउरे क नाउँ किबरोथ-हत्तावा राखेन। उ पचे उ ठउर क उहइ नाउँ दिहेन। इ उहइ जगह बाटइ जहाँ उ पचे मनइयन क माटी दिहेन जउ स्वाद क भोजन क गहरी इच्छा धरत रहेन।

३५ मनइयन किबरोथ-हत्तावा स हंसेरोत क जात्रा किहेनन अउ हुवई ठहरि गएन।

मिरियम अउ हारून मूसा क सिकाइत करत हीं

१२ मरियम अउ हारून मूसा क खिलाफ बकइ लागीं। उ पचे ओकर अंगुस्तनुमाइ किहेन काहे की ओकर मेहरारु इथियोपिया क रही। उ पचे बिचारेन कि मूसा क इ नीक नाही कि इथियोपिया क मेहरारु स बियाह करइ। २ उ पचे आपुस मँ कहेन, "यहोवा मनइयन स बात करइ मूसा क बीच मँ डाए बा। मुला सिरिफ मूसा ही नाही। यहोवा हम पचन क जरिये भी कहेस ह।" यहोवा एका अनकेस। ३ (मूसा एक बहोतइ विनमर मनई रहा। उन तु डींग हाकत रहा अउर न सेखी बघारत रहा। उ धरती पइ के कउनो मनइयन स जियादा विनमर रहा।) ४ एह बरे यहोवा एकाएक आवा अउ मूसा, हारून अउ मिरियम स बोला। यहोवा कहेस, "तू तीनहुँ अब मिलापवाला तम्बू मँ आवा।"

एह बरे मूसा, हारून अउ मिरियम तम्बू मँ गएन। ५ यहोवा तम्बू क दुआर प खड़ा भवा। यहोवा हारून अउ मरियन क आपन लगे आवइ

क कहेस। जब दुइनउँ ओनके निअरे आएन तउ
 ६ परमेस्सर कहेस, “मोरउ सुना! अगर तोहरे बीच
 एक नबी अहइ, तउ मई, परमेस्सर खुद ओह
 पइ परगत होब या ओकर संग सपना मँ बात
 करव्या। ७ मुला मूसा दूसर तरह क अहइ। मूसा
 मोर बिस्सासी दास अहइ। ओका मोरे पूरा घराना
 क जिम्मेदारी सौपा गवा ह। ८ जब मई ओसे बात
 करत हउँ तउ मई ओकरे अमन्वा समन्वा बतियात
 हउँ। मई छिपा भवा अरथ क कहतूत क ओकरे
 संग नाही बइपरत। मई ओका सफ साफ बातन
 क बतावत हउँ जउन मई ओसे जानइ चाहत हउँ।
 अउ मूसा यहोवा क सरूप क साफ साफ निहारि
 सकत ह। तउ काहे तू पचे मोर दास मूसा क
 खिलाफ बोलइ क हिम्मत किहा ह?”

९ यहोवा ओन पइ कोहाइ गवा। यहोवा ओनका
 तजि दिहस। १० बादर तम्बू स उठा। हारून पाछे
 घूमा अउ मिरियम क लखेस। ओकर बदन क चाम
 कौढ़, सफेद बरफ क नाई होइ गइ। ओका भयानक
 चर्म रोग होइ गवा!

११ तबहिं हारून मूसा स कहेस, “महोदय! कृपा
 कइके छिमा करा जउन मूरखपना क पाप हम पचे
 किहे अही।” १२ ओकरी चमड़ी क रंग उ तरह न
 उड़ि जाइ देई जइसे मरा भवा लरिका क होत ह।
 (कबहुँ कबहुँ इ तरह क गदिला अधगला चमड़ी क
 साथ पइदा होइ जात ह।)

१३ एह बरे मूसा यहोवा स परार्थना किहेस,
 “परमेस्सर मेहरबानी कइके इ बीमारी स ओका
 नीक करा।” १४ यहोवा मूसा क उत्तर दिहेस, “जदि
 ओकर बाप ओकरे चेहरा प थूक देइ तउ उ सात
 दिना तलक लजाई रही। एह बरे ओका सात दिना
 तलक सिबिर स बाहेर राखा। उ टेमँ क पाछे इ
 वापस लउट सकत ह।”

१५ एह बरे उ पचे मिरियम क सात दिना तलक
 बरे बाहेर लइ गएन। तब तलक लोगन हुवाँ स
 नाही चलेन जब तलक उ फुन वापस नाही लाइ
 गइ। १६ ओकरे पाछे मनइयन हसेरथ क तजेन
 अउ उ सबइ पारान रेगिस्तान क जात्रा किहन।
 मनइयन उ रेगिस्तान मँ सिबिर डाएन।

सुफिया कनान क गएन

१३ यहोवा मूसा स कहेस, २ “कछू मनइयन
 क कनान देस क बारे मँ गहराई स जानइ
 बरे पठवा। इ उहइ देस अहइ जेका मई इस्राएल
 क मनइयन क देब। हर एक बारहु परिवार समूहन
 स एक नेता पठवा।”

३ एह बरे मूसा यहोवा क हुकुम मानेस। उ पारान
 क रेगिस्तान स नेता लोगन क पठाएस। ४ इ सबइ
 ओनकइ नाउँ अहइ:

जककूर क पूत सम्मू—रूबेन परिवार समूह स।

५ होरी क पूत सापात—सिमोन क परिवार समूह
 स।

६ योपुन्ने क पूत कालेब—यहूदा क परिवार समूह
 स।

७ योसेप क पूत यिगास—इस्साकार क परिवार
 समूह स।

८ नून क पूत होसे—एप्रैम क परिवार समूह स।

९ रापू क पूत पलती—बिन्यामीन क परिवार समूह
 स।

१० सोदी क पूत गद्दीएल—जबूलून क परिवार
 समूह स।

११ सूसी क पूत गद्दी—यूसुफ क (जउन मनस्से स)
 परिवार समूह स।

१२ गमल्ली क पूत अम्मीएल—दान क परिवार
 समूह स।

१३ मीकाएल क पूत सतूर—आसेर क परिवार समूह
 स।

१४ वोप्ती क पूत नहूबी—नप्ताली परिवार समूह
 स।

१५ माकी क पूत गूएल—गाद क परिवार समूह स।

१६ उ नाउँ ओन मनइयन क अहइ जेनका मूसा
 पहेँटा क लखइ अउ जाँच करइ बरे पठाएस। (मूसा
 नून क पूत होसे क दूसर नाउँ स पुकारेस। मूसा
 ओका यहोसू कहेस।)

१७ मूसा जब ओनका कनान क खोज-बीन बरे
 पठावत रहा, तब उ कहेस, “नेगेव स होइके जा
 तब पहाड़ी देस मँ जाब्या १८ इ लखा कि भूइयाँ
 कइसा अहइ अउर तब तू उ मनइ क बारे जानकारी
 ल्या जउन हुमाँ रहत हीं। उ पचे सक्तीवाला
 अहइ या कमजोर बाटेन। उ पचे तनिक अहइ या
 जियादा तदाद मँ बाटेन? १९ उ पहेँटा क बारे मँ
 जानकारी ल्या जेहमाँ उ पचे रहत हीं। का उ नीक
 पूरदेस अहइ या बुरा? कउने तरह क सहर मँ उ
 पचे रहत हीं? का उ नगरन क चहरदेवार बाटेन?
 क एन गाँव क देवारन नाही अहइ? २० पूरदेस क
 बारे मँ अउर जानकारी ल्या। का भूइयाँ उपज बरे
 नीक बाटइ या बंजर जमीन अहइ? का धरती प
 वृच्छ उगा बाटेन? साहसी बना अउ उ धरती स
 कछू फल लइ आवा।” (इ अंगूर क पहली फसल
 क टेम होइ।)

२१ तब उ पचे पहेँटा क छान-बीन किहेन। उ पचे
 जिन नाउँ क रेगिस्तान स रहोब अउ लेबो हमात

तलक गएन । २२ उ पचे नेगव स होइके तब तलक जात्रा करत रहेन जब तलक उ पचे हेबरोन नगर पहुँच गएन । (हेबरोन मिस्र मँ सोअन नगर क बसइ क सात बरिस पहिले बना रहा ।) अहीमन, सेसै अउ तलमै हुवाँ रहत रहेन । इ सबइ अनाक क सन्तानन रहेन । २३ तब उ पचे एस्कोल क घाटी मँ गएन । उ सबइ हुवाँ अंगूरे क बेल काटेन । उ साखा मँ अंगूर क गुच्छा रहा । मनइयन मँ स दुइ मनई आपन बीच एक डंडा प धइके ओका लइ आएन । उ पचे कछू अनार अउ अंजीर भी लइ आएन । २४ उ ठउरे क नाउँ एस्कोल क घाटी रहा । काहेकी इ उहइ ठउर अहइ जहाँ इस्राएल क मनइयन अंगूरे क गुच्छा काटेन ।

२५ उ मनइयन उ पहुँटा क छानबीन चालीस दिन तलक किहेन । तब उ पचे सिबिर क लउटेन । २६ उ पचे मूसा, हारून अउ दूसर इस्राएल क लोगन क लगे कादेस मँ लउटि गएन । इ पारान रेगिस्तान मँ रहा । तब उ पचे मूसा, हारून अउ सबहिँ मनइयन क, जउन कछू लखेन, सब कछू सुनाएन । अउर उ पचे ओनका उ प्रदेस क फल क देखाएन । २७ उ पचे मूसा स इ कहेन, “हम पचे उ पहुँटा मँ गए जहाँ आप हमका पठएन । उ प्रदेस बहोत नीक बाटइहिँ आँ दूध अउ मधु क नदी बहत हीँ । इ सबइ उ कछू फल अहइँ जेका हम पचे हुआँ पावा ह । २८ मुला हुवाँ जउन मनइयन रहत हीँ उ पचे बहोतइ सक्तीवाला अउ मजबूत वाटेन । ओनकइ सहर क मजबूती स रच्छा कीन्ह ग अहइ । हम पचे हुवाँ अनाक बंसी मनइयन क लखा । २९ अमालेकी लोग नेगेव मँ रहत हीँ । हित्ती, यबूसी अउ एमोरी पहाड़ी प्रदेस मँ रहत हीँ । कनानी लोग समुद्र क किनारे अउ यरदन नदिया क तीरे रहत हीँ ।”

३० तब कालेब मूसा क नचिके मनइयन क सान्त होइके कहेस । कालेब कहेस, “हम पचन क हुवाँ जाइ चाही अउ उ प्रदेस क आपन बरे लेइ चाही । हम पचे उ प्रदेस क आसानी स लइ सकित ही ।”

३१ मुला जउन मनई ओकरे संग गवा उ बोला, “हम पचे उ मनइयन क खिलाफ नाहीँ लड़ि सकित । उ पचे हम लोगन स जियादा सक्तीसाली अहइँ ।” ३२ अउर उ मनइयन सबहिँ इस्राएली लोगन स कहेन कि उ पहुँटा क लोगन क हरावइ बरे उ पचे जियादा ताकतवर नाहीँ रहेन । उ पचे कहेन, “जउने पहुँटा क हम पचे लखा उ ताकतवर मनइयन स भरा बाटइ । उ पचे एँतना जियादा सक्तीवाला अहइँ कि जउन कउनो मनई हुवाँ जाइ ओका आसनी स हराइ सकत हीँ । ३३ हम

सबइ हुवाँ देत्य नेपीलियन लोगन क लखा । (अनाक सन्तानन नपीली लोगन मँ स अहइ ।) उ पचे हम पचन क लखेन जइसे हम पचे टिड्डा रहेन । हाँ हम पचे झींगुर क नाई ओनकइ बरे रहे ।”

लोग फुन सिकाइत करत हीँ

१ उ रात सिबिर क सब मनइयन जोर स रोउब सुरु किहिन । २ इस्राएल क सबहिँ लोग हारून अउ मूसा क खिलाफ फुन सिकाइत किहिन । सब मनइयन एक संग आएन अउ मूसा अउ हारून स कहेन, “हम पचन क मिस्र या रेगिस्तान मँ मरि जाइ चाही रहा । आपन इ नवा देस मँ तरिवारि स मरि जाइ क बजाय इ बहोतइ नीक भवा होत । ३ का यहोवा हम पचन क इ नवा प्रदेस मँ मरइ बरे लइ आएन ? हमरी मेहररुअन अउ हमरे गदेलन क हम पचन स छीन लइ लीन्ह जाइ अउ हम तरिवारे स मारि डावा जाव । इ हम पचन बरे नीक होइ कि हम पचे मिस्र क लउटि जाइ ।”

४ तब मनइयन एक दूसर स कहेन, “हम पचन क दूसर नेता चुनइ चाही अउ मिस्र लउटि चलइ चाही ।”

५ मूसा अउ हारून हुवाँ बटुरा भवा सारे इस्राएली मनइयन क समन्वा भुइयाँ प गिरि गएन । ६ अउर उ दुइनउँ मनई जउन नवा पहुँटा का छानबीन करइ बरे गए रहेन आपन ओढ़ना क सोक परगट करइ बरे फाड़ दिहस । (उ पचे दुइनउँ नून क पूत यहोसू अउ यपुन्न क पूत कालेब रहन ।) ७ इ दुइनउँ हुवाँ बटुरा भए इस्राएलियन स कहेन, “जउने पहुँटा क हम पचे लखे अही, उ बहोतइ नीक बाटइ । ८ अउर जदि यहोवा हम पचन स खुस अहइ तउ उ हम पचन क उ पहुँटा मँ लइ चली । उ पहुँटा नीक अउ उपजाउ अहइ, अइसा बाटइ जइसन हुवाँ दूध अउ मधु क नदी बहत होइँ । अउर यहोवा उ पहुँटा क हम पचन क देइ बरे आपन सक्ती क बइपरी । ९ मुला हम पचन क यहोवा क खिलाफ नाहीँ जाइ चाही । हम पचन क उ पहुँटा क लोगन स नाहीँ सिबिरइ चाही । हम पचे ओनका आसानी स हराइ देब । ओनके लगे कछू सुरच्छा नाहीँ अहइ, ओनका सुरच्छित राखइ बरे ओनके लगे कछू नाहीँ अहइ । मुला हम पचन क संग यहोवा अहइ । एह बरे इ मनइयन स जिन सिबिर अ ।”

१० तब इस्राएल क सबहिँ लोग यहोसू अउ कालेब क पाथर मारि देइ क बात करइ लागेन । मुला यहोवा क तेज मिलापवाला तम्बू प आवा ।

इस्राएल क सबहि लोग एँका लखि सकत रहेन ।
 ११ यहोवा मूसा स कहेस, “इ पचे इ तरह मोका घिना स लखत रइहीं ? उ पचे परगट करत रहेन कि उ पचे मोह पइ बिस्सास नाहीं करतेन । उ सबइ परगट करत हीं कि ओनकइ मोहे प बिस्सास नाहीं अहइ अउर उ पचे देखाँवत हीं कि उ पचे मोरी सकती प बिस्सास नाहीं करतेन । उ सबइ मोहे प बिस्सास करइ स तब भी मना कइ देत हीं जबहि मइँ ओनका बहोत स सक्तिसाली संकेत दिहेउँ ह । मइँ ओनके बीच कइ बड़की चीजन किहेउँ ह । १२ मइँ ओनका नास एक महामारी स करब अउ मइँ ओका बेदखल कइ देब, अउ तोहार प्रयोग दूसर रास्टर बनवइ बरे करब । अउर तोहार रास्टर इ सब लोग स बड़ा अउ जियादा ताकतवर होइ ।”

१३ तब मूसा यहोवा स कहेस, “जदि आप अइसा करत हीं तउ मिस्र मँ लोग इ सुनिहीं कि आपन सबहिं मनइयन क मारि डाएन । आप आपन बड़की सकती स प्रयोग ओन मनइयन क मिस्र स बाहेर लइ आवइ मँ किहन । १४ अउर मिस्र क लोग इ भूइँया (कनान) मँ रहइवालन स तोहार महान सकती क बारे मँ कइहीं । हे यहोवा ! उ पचे पहिले स सुनि लिहेन कि । तू एँन लोगन (इस्राएलियन) क परमेस्सर अहइ । उ पचे सबइ जानत ह कि तू प्रत्येच्छ रूप स आपन लोगन क समन्वा परगट भवा । उ पचे तोहरे बादर क बारे मँ जानत ह जउन उ पचन्क ऊपर ठहरत ह । तू उ बादर क प्रयोग दिन मँ ओन लोगन क राह दिखावइ बरे किहा अउर राति मँ उ बादर लोगन क राह दिखावइ बरे आगी मँ बदल जात रहा । १५ एह बरे आप क अब मनइयन क मारइ नाहीं चाही । जदि आप ओनका मारत हीं तउ सबहिं रास्टर, जउन आपक सकती क बारे मँ सुनि चुका अहइँ, कइहीं, १६ यहोवा इ मनइयन क उ पहटा मँ लइ जाइ मँ समर्थ नाहीं रहेन जउने पहटा क उ पचे ओनका देइ क बचन दिहे रहेन । एह बरे यहोवा ओनका मरु भूमि मँ मारि दिहन ।

१७ “एह बरे सुआमी आपन सामर्थ देखावा ! देखावा वइसा ही जइसा देखाँवइ क कहे रह्या ! १८ तू कहे रहा, ‘यहोवा कोहाइ मँ धीरा करत हीं । यहोवा पिरम स भरपूर अहइँ । यहोवा पाप क छिमा करत हीं अउर ओन मनइयन क छिमा करत हीं जउन ओनके खिलाफ भी होइ जात हीं । मुला यहोवा ओन मनइयन क जरूर सजा देइहीं जउन अपराधी अहइँ । यहोवा पूत, पूतन अउ ओकर पूतहू क भी सजा देत हीं ।’ १९ एह बरे इ मनइयन क आपन बड़का पिरम देखावा । ओनके पाप क

छिमा करा । ओनका उहइ तरह छिमा करा जइसा तू मिस्र छोड़इ क टेमँ स अब तलक छिमा करत आवत ह ।”

२० यहोवा उत्तर दिहस, “मइँ मनइयन क तोहरे कहे क मुताबिक छिमा कइ दीन्ह ह । २१ मुला मइँ तोहसे फुरइ कहत हउँ काहे की मइँ जब तलक रहबूँ अउ मोर महिमा इ धरती प फइली अहइ । एह बरे मइँ तोहका इ बचन देत हउँ । २२ उ मनइयन मँ स कउनो भी मनई जेका मइँ मिस्र स बाहेर लइ आएँ, उ पचे कनान क भूइँया क कबहुँ नाहीं क लखिहीं । उ मनइयन मिस्र मँ मोर तेज अउ मोर संकेत क लखेन ह । अउर उ मनइयन उ महान कारज क निहारेन ह जउन मइँ रेगिस्तान मँ कीन्ह ह । मुला उ पचे मोर आग्या क नाहीं मानेन अउर दसहु बार मोर परीच्छा किहेन ह । २३ मइँ ओनके पुरखन क बचन दिहेउँ ह । मइँ प्रण किहेउँ रहा कि ओनका एक बड़का देस देब । मुला ओहमा स कउनो मनई जउन मोरे खिलाफ होइ चुका ह उ देस मँ घुस न पाइ । २४ मुला मोर सेवक कालेब एँन स अलग रहा । उ पूरी तरह मोर बात मानत रहा । एह बरे मइँ ओका उ देस मँ लइ जब जेका उ पहिले लखेस ह । अउ ओकर सन्तानन भी उ पहटा क उत्तराधिकार होइ जाब । २५ अमालेकियन अउ कनानी लोग घाटी मँ रहत अहइँ । भियान इ जगहिया क तजा अउ रेगिस्तान कइँती लउटि जा । लाल सागर स होइके जा ।”

यहोवा मनइयन क सजा देत हीं

२६ यहोवा मूसा अउ हारून स कहेस, २७ “इ पचे कब तलक मोरे खिलाफ सिकाइत करत रइहीं ? मइँ इ मनइयन क ओराहना अउ पीरा क सुन चुकेउँ ह । २८ एह बरे एनसे कहा, ‘यहोवा कहत ह उ फुरइ ही सबहि काम करी जेकरे बारे मँ तू पचे सिकाइत किहा ह । २९ तू मनइयन क इ सब होइ । तू मनइयन क देह इ रेगिस्तान मँ मरा भवा गिरिहीं । हर एक मनई जउन बीस बरिस या जियादा उमर क रहा । हमार मनइयन क निअंबर क रूप मँ गना गवा । अउर तू पचन मँ स हर कउनो मोरे यानी परमेस्सर क खिलाफ सिकाइत किहस । एह बरे तू मनइयन मँ स हर एक रेगिस्तान मँ मरी । ३० तू पचन मँ स कउनो भी कबहुँ उ देस मँ नाहीं घुसी जेका मइँ तोहका देइ क बचन दिहेउँ ह । सिरिफ युपुन्ने क पूत कालेब अउ नून क पूत यहोमू उ देस मँ परवेस करिहीं । ३१ तू पचे सिबिरइ गए रह्या अउ तू पचे ओराहना दिहा कि उ नवा देस मँ तोहार दुस्मनन तोहरे गदेलन क तोहसे छिनि लेइहीं । मुला मइँ

तोहसे कहत हउँ कि मई ओन गदेलन क देस मँ लइ जाब । उ पचे उ चीजन क भोग करिहीं जेनकइ भोग तू अंगीकार नाहीं किहा । ३२ जहाँ तलक तू पचन क बात बा, तू पचे इ रेगिस्ताने मँ मरि बिलाइ जाब्या ।

३३ “तोहार बेटवन हिआँ रेगिस्तान मँ चालीस बरिस तलक गडेरिया क रूप मँ आपन जिन्नगी बिताइ । उ पचे तोहार अबिस्सासी क कारण कस्ट झेलब । उ पचे इ रेगिस्तान मँ तब तलक कस्ट झेलिहीं जब तलक तू सबहिं मरि नाहीं जाब्या । ३४ तू पचे आपन पाप बरे चालीस बरिस तलक कस्ट झेलब्या । (तू पचे इ देस क छानबीन मँ चालीस दिन लगाया । ओकरे हर दिन बरे एक बरिस होइ ।) तू पचे जनब्या कि हमार तू पचन क खिलाफ होब केतना खतरनाक अहइ ।”

३५ “मई यहोवा अहउँ अउर मई इ घोसना करत हउँ । अउर मई बचन देत हउँ कि मई इ सबहिं बुरे मनइयन बरे इ करब । इ पचे मोरे खिलाफ एक संग आएन । एह बरे उ सबइ इ रेगिस्तान मँ मरिहीं ।”

३६ जउन मनइयन क मूसा नवा परदेस क छान-बीन करइ पठाएस ह उ पचे अइसा रहेन जउन लउटि आएन अउर सबहिं इस्राएलियन मँ सिकाइत करत भए सँचर गएन । उ मनइयन कहेन कि मनई उ परदेस मँ प्रवेस करइ खातिर जियादा बरिआर नाहीं रहेन । ३७ उ मनइयन उ भूइयाँ क बारे मँ बुरी खबर लइहीं । एह बरे यहोवा एक बेरामी पइदा कइके ओन सबहिं क मरि बिलाइ जाइ दिहस । ३८ मुला नून क पूत यहोसू अउ युपुन्ने क पूत कालेब ओन मनइयन मँ रहेन जेनका देस क छानबीन करइ पठवा गवा रहा । अउर यहोवा ओन दुइनउँ मनइयन क बचाएस । ओनका उ बेरामी नाहीं भइ जउन दूसर मनइयन क मारि डाएस ।

मनइयन कनान मँ जाइके जतन करत हीं ।

३९ मूसा इ सबइ बातन इस्राएल क मनइयन स कहेस । लोग बहोत जियादा दुखी भएन । ४० दूसर दिन बहोतइ तइके मनइयन ऊँचा पहाड़ी पढटा कइती बढब सुरु किहेन । मनइयन कहेन, “हम पचे पाप किहे अहेन । हम पचन क दुःख अहइ कि हम पचे यहोवा प बिस्सास नाहीं किहेन ह । हम पचे उ ठउरे प जाब जेका यहोवा देइ क बचन दिहे अहइ ।”

४१ मुला मूसा कहेस, “तू पचे यहोवा क हुकुम क काहे नाहीं मानत अहा ? तू पचे कामयाब न होइ सकब्या । ४२ उ देस मँ जिन जा । यहोवा तू पचन क संग नाहीं अहइ । तू पचे आसनी स आपन दुस्मनन

स हारि जाब्या । ४३ अमालेकी अउ कनानी लोग हुवाँ तोहरे खिलाफ लड़ीहीं । तू पचे यहोवा स खिलाफत किहा ह । एह बरे उ तोहरे संग न होइ जब तू पचे ओनसे लड़ब्या । अउर तू सबहिं लड़ाइ मँ मारा जाब्या ।”

४४ मुला मनइयन मूसा प बिस्सास नाहीं किहेन । उ पचे ऊँची पहाड़ी कइती गएन । मुला मूसा अउ यहोवा क करार क सन्दूख मनइयन क संग नाहीं गएन । ४५ तब अमालेकी अउ कनानी लोग जउन पहाड़ी देस मँ रहत रहेन, आएन अउ उ पचे इस्राएलियन प हमला बोलि दिहन । अमालेकी अउ कनानी लोग ओनका आसानी स हराइ दिहन अउ होर्मा तलक ओनका खदेरेन ।

बलि क नेमँ

१ यहोवा मूसा स कहेस, २ “इस्राएल क मनइयन स बात करा अउ ओनसे कहा : मई तू पचन क इ धरती घर क रूप मँ देत अहउँ । जब तू उ देस मँ घुसब्या, ३ जब तू परमेस्सर क होमबलि चाहे उ गइयन, भेड़िन अउ बोकरियन होइ क होमबलि क रूप मँ बलि क रूप मँ, मनौती भेंट क रूप मँ, बचनबलि क रूप मँ, मेलबलि क रूप मँ या खास पवित्र क रूप मँ चढ़ाउब्या तउ इ परमेस्सर बरे एक सुहावना सुगन्धित अहइ ।

४ “अउर उ टेमँ जउन आपन भेंट लइ आइ ओका यहोवा क अन्नबलि देइ क होइ । इ अन्नबलि एक चौथाई हीन जइतून क तेले मँ सनी भइ एपा क दसवाँ हीसा बढ़िया आटा क होइ । ५ हर दाई जब तू एक ठु मेमना होमबलि क रूप मँ या बलिदान क रूप मँ द्या तउ तोहका एक चौथाई हीन दाखरस पयेबलि क रूप मँ तइयार करइ चाही ।

६ “हर समइ जब तू भेड़ा क भेंट करइहीं तउ तोहका अन्नबलि क रूप मँ एक तिहाई हीन जइतून क तेले मँ सनी भइ एपा क दुइ दसवाँ हीसा बढ़िया आटा क जरूर भेंट करइ चाही । ७ अउर तोहका एक तिहाई हीन पेयबलि जरूर चढ़ावइ चाही । एनका परमेस्सर क भेंट करा । इ परमेस्सर बरे सुहावना सुगन्ध अहइ ।

८ “होमबलि, मेलबलि या कउनो मन्नत बरे यहोवा क एक भेंट क रूप मँ एक बछ्वा तइयार कइ सकत ह । ९ एह बरे तोहका बर्धा क संग अन्नबलि भी लइ आवइ चाही । अन्नबलि आधा हीन जइतून क तेले स सनी भइ एपा क तीन दसवाँ हीसा बढ़िया आटा क होइ चाही । १० आधा हीन दाखरस भी पयेबलि क रूप मँ लइ आवा । आगी

मँ वारी गइ इ भेंट परमेस्सर बरे महकउआ सुगन्ध अहइ।^{११} हर एक बछ्वा या भेड़ा या मेमना या बोकरी क बच्चा, जेका तू यहोवा क भेंट करा, उहइ तरह तइयार करइ चाही।^{१२} जनावरन क गनती क अनुसार तू परमेस्सर क भेंट करा, हर एक एकही तरीका स तइयार करा।

^{१३} “एह बरे इ तरीका स हर एक इस्राएली क होमबलि देइ चाही जेकर गंध परमेस्सर क प्रसन्न करी।^{१४} तोहरे बीच बिदेसी रहब। अगर उ पचे होमबलि देइ चाहत ही तउ ओनका वइसे ही देइ चाही जइसे तू करत ह। ताकि इ परमेस्सर बरे सुहावना सुगन्ध होइ।^{१५} उहइ नेमँ हर एक इस्राएली बरे होइ चाही अउ तोहरे बीच बसइया बिदेसी बरे भी होइ। इ नेमँ हमेसा लागू रही। तू अउ तोहरे बीच बसइया मनइयन यहोवा क समन्वा बराबर होइहीं।^{१६} एकर अरथ अहइ कि तू सबन क एक ही कनून अउ नेमँ क मानइ चाही। उ सबइ कनून अउ नेमँ इस्राएल क परिवार मँ पइदा भए तोहरे अउ जउन तोहरे बीच रहत ही, ओनके बरे अहइ।”

^{१७} यहोवा मूसा स कहेस, ^{१८} “इस्राएल क लोगन स इ कहा: मइँ तोहका दूसर देस मँ लइ जात हउँ।^{१९} जब तू उ भोजन करब्या जउन उ पहेँटा मँ पइदा होइ तउ भोजन क कछू हींसा यहोवा क भेंट क रूप मँ द्या।^{२०} तू अनाजे क बटोरब्या अउ एंका आटा क रूप मँ पिसब्या। तू आटा क रोटी बनवइ बरे गुँधब्या। तू पहिला गुँधा भाव आटा स बना रोटी परमेस्सर क अर्पित करब्या। उ अइसा अन्नबलि होइ जउन खरिहान स आवत ह।^{२१} इ नेमँ सदा बरे बा। एकर अरथ अहइ कि जउन अन्न क तू आटा क रूप मँ गुँधत ह ओकर पहिली रोटी यहोवा क देइ चाही।

^{२२} “अगर तू यहोवा क जरिये मूसा की दीन्ह गवा आदेस मँ स कउनो क मानव भूलि जा तउ तू का करब्या? मूसा क जरिये दीन्ह गए यहोवा क इ हुकुम अहइ।^{२३} इ आदेस उहइ दिन स सुरु होइ ग रहन जउने दिन यहोवा एंका तोहका दिहेस ह। अउर इ आदेस भविस्स मँ भी लागू रइहीं।^{२४} जदि समूदाय अनजाने मँ कि उ पचे पाप करत हीं तउ सब जने मिलिके एक होमबलि बर्धा क परमेस्सर क चढ़ावइ। इ परमेस्सर बरे सुहावना सुगन्ध अहइ। बर्धा क बलि क संग परमेस्सर क हिदायत क अनुसार अन्नबलि अउर पयेबलि चढ़ा। तोहका एक ठु बोकरी भी पापबलि क रूप मँ देइ चाही।

^{२५} “याजक क लोगन क पाप स सुद्धि बरे ओकर प्रायश्चित करइ चाही। उ इस्राएल क सब लोगन बरे अइसा करी। लोगन इ नाहीं जाने रहेन कि उ सबइ पाप करत बाटेन। मुला जब उ पचे इ जानेन तब उ पचे होमबलि अउ पापबलि लेइ बरे आएन। इ तरह मनइयन ओकर गलती बरे छिमा पाइ हीं।^{२६} इस्राएल क सब मनइयन अउ ओनके बीच रहइवाला सब लोग छिमा कइ दीन्ह जइहीं। उ पचे एह बरे छिमा कइ दीन्ह जइहीं कि उ सबइ नाहीं जानतेन कि उ पचे बुरा करत बाटेन।

^{२७} “मुला एक ठु मनई बिना इरादे स पाप करत ह तउ ओका एक बरिस एक ठु मादा बोकरी पापबलि क रूप मँ आपन पाप बरे लावइ चाही।^{२८} याजक यहोवा क समन्वा पाप बरे जउन उ मनइ गलती स किहेस ह प्रायश्चित करी अउ उ मनई छिमा पाइ।^{२९} इ हर मनई बरे कनून अहइ जउन पाप करत ह, मुला जानत नाहीं कि बुरा किहेस ह। इहइ कनून इस्राएल क परिवार मँ पइदा भए मनइयन बरे अहइ या दूसर मनइयन बरे जउन तोहरे बीच रहत हीं।

^{३०} “मुला कउनो मनई जउन पाप करत ह अउ जानत ह कि उ बुरा करत ह। उ मनई क आपन लोगन स अलग पटइ देइ चाही। इ इस्राएल क परिवार मँ जन्मा मनई अउ कउनो भी दूसर मनई बरे, जउन तोहरे बीच रहत ह, एक समान बाटइ।^{३१} उ मनई यहोवा क हुकुम क खिलाफ गवा अहइ। उ यहोवा क हुकुम क तिस्सकार करइ। उ मनई क तोहरे दले स अलगाइ दीन्ह जाइ चाही। उ मनई अपराधी ही रही अउ सजा भोगी।”

एक ठु मनई अराम क दिन काम करत ह।

^{३२} इ टेमँ इस्राएल क मनई अबहिं रेगिस्तान मँ रहेन। अइसा भवा कि एक मनई क बारइ बरे कछू काठ मिला। एह बरे उ मनई लकड़ी बटोरत रहा मुला उ सबित क दिन रहा। कछू दूसर मनई ओका इ करत लखेन।^{३३} जउन मनई ओका लकड़ी बटोरत करत देखेन। उ पचे ओका मूसा अउ हारून क लगे लइ आएन। अउर सबहिं लोग चारिहुँ कइँती बटुर गएन।^{३४} उ पचे उ मनई क हुवाँ राखेन काहे की उ पचे नाहीं जानत रहेन कि ओकर संग का करइ चाही।

^{३५} तब यहोवा मूसा स कहेस, “इ मनई क मरि जाइ चाही। पूरा धार्मिक सभा क ओका सिबिर स बाहेर लइ जाइ चाही अउर ओका पाथर स मार डावइ चाही।”^{३६} एह बरे सबइ लोगन ओका सिबिर स बाहेर लइ गएन। उ ओका तब तलक

पाथर मारेन जब तलक उ मरि नाही गवा । उ पचे इ वइसा ही किहेन जइसा मूसा क यहोवा हुकुम दिहे रहा ।

परमेस्सर नेमँ क सुमिरइ मँ
मनइयन क मदद करत ह

^{३७} यहोवा मूसा स कहेस, ^{३८} "इस्राएल क लोगन स बतियाअ अउ ओनसे इ कहा, 'मइँ तू सबन क आपन हुकुम क सुमिरइ क देब । धागा क कइउ खण्ड क एक साथ बाँधा अउ ओनका आपन बस्तर क कोना प धइ द्या । एक ठु नीला रंग क डोरा हर एक अइसे गुच्छा मँ नावा । अब एँका तू पहिरब्या अउ भविस्स क सबहिँ दिनन मँ पहिरब्या । ^{३९} तू पचे इ गुच्छन क लखत रहब्या अउ यहोवा जउन हुकुम तोहका दिहे अहइ ओका सुमरत रहब्या । तब तू हुकुम क मनब्या । तू पचे हुकुम क न बिसरब्या । अउर आपन आँखिन अउ जरुरत स बस मँ आइके कउनो पाप न करब्या । ^{४०} तू हमरे सब हुकुम मानइ क सुमिरब्या । अउर तोहका तोहार परमेस्सर क अपर्ण कीन्ह जाइहीं ।' ^{४१} मइँ तोहार परमेस्सर यहोवा अहउँ । उ मइँ अहउँ जउन तोहका मिस्र स बाहेर लइ आएँ ह । मइँ इ किहेँ ह । एह बरे मइँ तोहार परमेस्सर रहब । मइँ तोहार परमेस्सर यहोवा अहउँ ।"

कोरह, दातान अउ अबीराम
मूसा क खिलाफ होइ जात ही

१६ ^१ कोरह, दातान, अबीराम अउ ओनँ मूसा क खिलाफ होइ गएन । (कोरह यिसहार क पूत रहा । यिसहार कहत क पूत रहा । कहत लेवी क पूत रहा । एलीआब क पूत दातान अउ अबीराम भाई रहेन । अउर ओनँ पेलेत क पूत रहा । दातान, अबीराम अउ ओन रूबेन क सन्तानन रहेन ।) ^२ इ चार मनइयन इस्राएल क २५० मनइयन क एक संग बटोरेन अउर इ पचे मूसा क खिलाफ आएन । इ पचे नेता रहेन अउ जउन इस्राएलियन क जरिये चुना ग रहेन । सब मनइयन ओनका जानत रहेन । ^३ उ पचे एक ठु गुट क रूप मँ मूसा अउ हारून क खिलाफ बात करइ बरे आएन । इ मनइयन मूसा अउ हारून स कहेन, "हम लोगन क काबू करइ बन्द करा । इस्राएल क सब मनई पवित्तर अहइँ । यहोवा ओनके संग अहइ । तू सबइ अपने आप क काहे परमेस्सर क (दूसर) मनइयन स जियादा महत्वपूर्ण मानत बाटचा ?"

^४ जइसेन मूसा इ बात सुनेस तउ उ मुँहे क बले गिर गवा । ^५ तब मूसा कोरह अउ ओकरे मनवइयन

स कहेस, "काल्ह भिन्सारे यहोवा देखँइहीं कि कउन मनई फुरइ ओकर बाटइ । यहोवा देखँइहीं कि कउन मनई फुरइ पवित्तर अहइ । अउर यहोवा ओका आपन निअरे लइ जइहीं । यहोवा उ मनई क चुनी अउ ओका आपन निचके लइ जाइ । ^६ एह बरे कोरह, तोहका अउ तोहरे सबहिँ मनवइयन क इ करइ चाही । ^७ भियान कउनो खास अगियारी क गोरसी मँ आगी अउ धूप धरा अउ उ गोरसी क यहोवा क अगवा लिआवा । यहोवा उहइ मनई क चुनिहीं जउन फुरइ पवित्तर होइ । लेवी क पूतन रूका ! तू का करइ क कोसिस करत अहा ।"

^८ मूसा कोरह स इ भी कहेस, "लेवी बंसी लोगो ! मोरहु सुना । ^९ तू पचन क खुस होइ चाही कि इस्राएल क परमेस्सर तोहका चुनेस ह अउ खास बनएस ह । तू पचे बाकी इस्राएलियन स अलग अहा । यहोवा तोहका आपन लगे बोलाएस ह कि तू यहोवा क आराधना मँ इस्राएल क मनइयन क खास मदद बरे यहोवा क पवित्तर तम्बू मँ खास काम कइ सका । का इ तोहका बरे काफी नाही बा ? ^{१०} यहोवा तोहका अउ लेवी बंस क मनइयन क आपन निचके लइ आवा ह । मुला अब तू याजकन बनइ चाहत बाटचा । ^{११} तू अउ तोहार मनवइयन एक अउट ग अहा अउ यहोवा क खिलाफ आवा अहा ! का हारून कउनो बुरा किहे अहइ ? नाही ! तउ ओकरे खिलाफ काहे ओराहना देत अहा ?"

^{१२} तब मूसा एलीआब क पूत दातान अउ अबीराम क बोलाएस । मुला दुइनँ मनइयन कहेन, "हम पचे न आउब । ^{१३} तू हमका उ देस स निकारि लिआया ह जउन धनवाद रहा । जहाँ दूध अउ सहद क धारा बहत रहिन । तू हम पचन क हिआँ रेगिस्तान मँ मारइ बरे लिआया ह । का अब तू अपने आप क हम पइ राजकुमार बनबू चाहत अहइ ? ^{१४} हम पचे तोहार पाछा काहे करी ? तू हम पचन क नवा देस मँ नाही लइ आया ह-जउन भरपूर अहइ जहाँ दूध अउ सहद की नदी बहत रहत हीं । तू हम पचन क उ देस नहीं दिए रहा जेका देइ क परमेस्सर बचन दिहे रहा । तू हम पचन क खेत या अंगूर क बगिया नाही दिहे रहा । का तू इ लोगन क आँखन क अंधा करब्या ? नाही, हम पचे तोहार लगे न आउब ।"

^{१५} एह बरे मूसा बहोतइ कोहाइ गवा । उ यहोवा स कहेस, "एँकइ भेंट जिन ल्या । मइँ एँसे कछु नाही लीन्ह-एक गदहा तलक नाही । मइँ इ मनइयन मँ स कउनो क बुरा नाही कीन्ह ।"

^{१६} तब मूसा कोरह स कहेस, "तोहका अउ तोहरे मनवइयन क भियान यहोवा क समन्वा खडा होइ

चाही। अउर हारून तोहरे संग यहोवा क समन्वा खड़ा होइ।^{१७} तू सबन मँ स हर कउनो क एक टु आग-दान रखइ चाही अउर ओहमा आगी अउ धूप होइ चाही अउर एका यहोवा क समन्वा चढ़ावइ चाही। इ सारी आगी क गोरसी २५० नेता लोगन क होइ चाही। तोहका अउर हारून क आपन गोरसी क संग हुवाँ रहइ चाही।”

^{१८} तउ हर एक मनई एक-एक टु आगी क गोरसी लिहस अउ ओहमाँ सुलगन धूप धरेस। तब उ पचे मिलापवाला तम्बू क दुआरे खड़ा भएन। मूसा अउ हारून भी हुवाँ खड़ा भएन।^{१९} कोरह आपन सबहि लोगन क एक संग मिलापवाला तम्बू क दुआरे बटोरेस। तब यहोवा मोजूदगी सबइ जमा लोगन क दुआरा लखइ जाइ।

^{२०} यहोवा मूसा अउ हारून स कहेस, ^{२१} “इ मनइयन स दूर हटा। मई अब ओनकर नास करइ चाहत हउँ।”

^{२२} मुला मूसा अउ हारून भुइयाँ प निहुरेन अउ चिचियानेन, “परमेस्सर! तू जानत ह कि मनइयन क सोचत हीं। तू सब प्राणी क आतिमा क परमेस्सर। का एक मनई क पाप क कारण सारा किरोध मण्डली प होइ। एक मनई फुरइ पाप किहे अहइ।”

^{२३} तब यहोवा मूसा स कहेस, ^{२४} “मनइयन स कहा कि उ पचे कोरह, दातान अउ अबीराम क सिबिर स दूर हटि जाइ।”

^{२५} मूसा खड़ा भवा अउ दातान अउर अबीराम क लगे गवा। इस्राएल क सबहि बुजुगन ओकरे पाछे चलेन।^{२६} मूसा धामिक सभा स कहेस, “इ बुरा लोगन तम्बू स दूरि हटि जा। एँनकइ चीज क जिन छुआ। जदि तू पचे छूब्या तउ एँनके पापन क कारण बिलाइ जाब्या।”

^{२७} एह बरे मनइयन कोरह, दातान अउ अबीराम क तम्बू स दूर परानेन। दातान अउ अबीराम आपन तम्बू क बाहेर आपन मेहरारु, लरिकन अउ गदेलन क संग खड़ा रहेन।

^{२८} तब मूसा कहेस, “मई तोहका परमान देब कि यहोवा मोका ओन चीजन क करइ क पठए बाटइ जउन मई तोहका केहउँ ह। मई देखाउब कि उ सबइ मोर बिचार नाहीं रहेन।^{२९} इ मनइयन हिआँ मरिहीं। मुला इ पचे साधारन रीति स मरत ह जउने तरह आदमी हमेसा मरत ह तउ इ परगट होइ कि यहोवा फुरे मोका नाहीं पटाएस।^{३०} मुला जदि यहोवा एँनका दूसर रीति स मरइ देत ह तउ तू पचे जनब्या कि इ मनइयन सचमुच यहोवा क खिलाफ पाप किहे अहइ। इहइ प्रमाण बाटइ :

भुइयाँ फाटि जाइ अउ इ मनइयन क डकार जाइ। उ सबइ आपन कबरन मँ जितत जइहीं। अउर एँनकइ हर चीज एँनके संग जाइ।”

^{३१} तब मूसा इ बातन क कहब खतम किहेस। मनइयन क गोडे क तरे जमीन फाटि गइ।^{३२} इ अइसा रहा कि मान ल्या धरती आपन मुँह बाएस अउ एँनका खाइ लिहस अउ ओनके सारा परिवार अउ कोरह क सबहि मनइयन अउ ओनकइ सब चीजन धरती मँ चली गइन।^{३३} उ पचे जितत भ कबर मँ चला गएन। ओनकइ हर एक चीज ओनके संग गइ। तब धरती ओनके ऊपर बन्द होइ गइ। उ पचे मर बिलाइ गएन अउ उ सबइ सभा स लोप हो गएन।

^{३४} इस्राएल क मनइयन नास कीन्ह जात मनइयन क रोउब चिचियाब सुनेन। एह बरे उ सबइ चारिहुँ कइती दौडेन अउ कहइ लागेन, “धरती हम लोगन क लील जाइ।”

^{३५} तब्बइ यहोवा स आगी आइ अउ २५० मनइयन क, जउन धूप भेंट करत रहेन, माटी मँ मिलाइ दिहस।

^{३६} यहोवा मूसा स कहेस, ^{३७-३८} “याजक हारून क पूत एलीआज़ार स कहा कि उ आगी क गोरसी क बटोरइ। सिबिर स दूर क पहुँटा मँ ओस कोइला अउ राखी क छितरावइ क कहा। इ मनइयन मोरे खिलाफ पाप किहेन ह अउर ओनकइ पाप क दाम जिन्नगी खतम होइ गइ। मुला धूप क गोरसी अबहुँ पवित्तर बाटइ। इ गोरसियन पवित्तर अहइँ काहे की उ पचे यहोवा क दिहन ह। धूप गोरसी क पीटि पीटि क पत्तर मँ बदलि द्या। तब इ धातु क पत्तर क उपयोग वेदी क ढाँपि बरे करा। इ पत्तरन इस्राएल क लोगन बरे चिताउनी क रूप मँ रहइ द्या।”

^{३९} तब याजक एलीआज़ार काँसा क उ सबइ तसला बटोरेस जेनका उ पचे लइ आए रहेन। उ सबइ मनई जरि गएन, मुला बासन तब भी हुवाँ रहेन। तब एलीआज़ार कछू मनइयन क बासन क धातु क चपटी पीटइ क कहेस। तब उ धातु क चपटी चादर क वेदी प धरेस।^{४०} उ एँका वइसेन ही किहेस जइसा यहोवा मूसा क जरिये हुकुम दीन्ह ग रहा। इ चीन्हा रहा कि जेकाँ इस्राएल क लोग सुमिर सकइ कि सिरिफ हारून क परिवार क मनई क यहोवा क समन्वा सुगन्धि देइ क अधिकार बाटइ। जदि कउनो दूसर मनई परमेस्सर क समन्वा सुगन्धि बारत ह तउ उ मनई कोरह अउ ओकर मनवइयन क तरह होइ जाइ।

हारून मनइयन क रच्छा करत ह

११ अगले दिन इस्राएल क मनइयन मूसा अउ हारून क खिलाफ ओराहना दिहेन। उ पचे कहेन, “तू सबइ यहोवा क मनइयन क मारि डाय ह।”

१२ मूसा अउ हारून मिलापवाला तम्बू क दुआर प टाइ रहेन। मनई उ ठउर प मूसा अउ हारून क खिलाफ सिकाइत बरे बटुर गएन। मुला जब उ पचे मिलापवाला तम्बू क लखेन कि बदरा ओका ढाँकि लिहेस, अउर यहोवा हुआँ परगट भवा। १३ तब मूसा अउ हारून मिलापवाला तम्बू क समन्वा गएन।

१४ तब यहोवा मूसा स कहेस, १५ “उ मनइयन स दूरि हटि जा जेका अब मई नास करब।” मूसा अउ हारून भुइँया प भहराइ पडेन।

१६ तब मूसा हारून स कहेस, “वेदी क आगी आपन काँसा क बासन मँ ल्या। तब एहमाँ सुगन्धि नावा। लोगन क भीड़ मँ ओनके पापन क प्रायस्चित करइ बरे हाली जा। यहोवा ओन पइ कोहान बा। महामारी ओन लोगन क बीच मँ फैलइ सुरू होइ गवा अहइ।”

१७-१८ तउ हारून वइसे किहस जइसेन मूसा कहे रहा। धूप अउ आगी लइ लिहे क पाछे उ मनइयन क बीच दौड़िके पहाँचा। मुला मनइयन मँ बेरामी पहिले ही सुरू होइ चुकी रही। तब हारून मुदाँ मनइयन क बीच अउ जउन जिअत रहेन खड़ा भवा। हारून लोगन क प्रायस्चित बरे सुगन्धि सुलगाइ दिहस। अउर तब बेरामी रुकि गइ। १९ मुला हारून क पापे स प्रायस्चित स पहिले १४,७०० लोग उ महामारी स मरि गए रहेन। उ कोरह क कारण मरे भवा लोगन क अतिरिक्त अहइ। २० तब हारून मिलापवाला तम्बू क दुआर प मूसा क लगे लउटा। मनइयन मँ भयंकर महामरगी रोक थाम दीन्ह गइ।

यहोवा परमान देत हीं कि हारून महा याजक अहइ

१७ यहोवा मूसा स कहेस, २ “इस्राएल क मनइयन स कहा। आपन लोगन स बारह लकड़ी क कुबरी लइ लेईं। बारह परिवार समूहन मँ स हर एक नेता स एक कुबरी ल्या। हर एक मनई क कुबरी प नाउँ लिखि द्या। ३ अउ लेवी क कुबरी प हारून क नाउँ लिखि द्या। बारह परिवार समूहन क हर एक मुखिया क कुबरी होइ चाही। ४ इ टहरइ

वाली कुबरियन क मिलापवाला तम्बू मँ करार क सन्दूख क अगवा धइ द्या। इ उहइ ठउर अहइ जहाँ मइ तोहसे भेंटत अहउँ। ५ मई एक मनई क सच्चा होइवाला याजक चुनव। तू जानि लेब्या कि कउने मनई क मई चुनेउँ ह। काहे की उ कुबरी मँ नई पाती निकरब सुरू होइ। इ तरह मई मनइयन क आपन अउ तोहरे खिलाफ सदा ओराहना देइ स रोकब।”

६ तउ मूसा इस्राएली मनइयन स बात किहस। प्रधान मँ स हर एक ओका एक टु कुबरी दिहस। सब कुबरियन क गनती बारह रही। हर ए परिवार दल क नेता क एक कुबरी ओहमाँ रही। हारून क कुबरी ओहमाँ रही। ७ मूसा करार क मिलापवाला तम्बू मँ यहोवा क समन्वा कुबरियन क धइ दिहस।

८ अगला दिन मूसा तम्बू मँ घुसा। उ लखेस कि हारून क उ कुबरी, जउन लेवी बंस क रही, सिरिफ एक अइसी रही कि जेहसे नई पाती निकरब सुरू भई रहिन। उ कुबरी मँ डारि फूटि आइन अउ ओहमा बदाम लग गए रहेन। ९ एह बरे मूसा यहोवा क ठउर स सबहिं कुबरियन क लइ आवा। मूसा इस्राएल क मनइयन क कुबरियन देखँएस अउ हर एक मनई आपन कुबरी वापिस लइ लिहस।

१० तब यहोवा मूसा स कहेस, “हारून क कुबरी क करार वाला सन्दूखे क समन्वा रख द्या। इ ओनँ मनइयन क चिताउनी होइ जउन हमेसा मोरे खिलाफ जात हीं। इ ओनकइ मोरे खिलाफ सिकाइत क रोकी। इ तरह उ पचे मरिहीं नाहीं।” ११ तउ मूसा ओन हुकुमन क मानेस जउन यहोवा दिहे रहा।

१२ इस्राएल क मनइयन मूसा स कहेस, “हम पचे जानित ह कि हम सबइ मरि जाव। हम विनास होइ गए। हम सबहिं विनास होइ गवा। १३ कउनो मनई जउन यहोवा क पवित्तर ठउर क निअरे आवत ह मरि जाइ। का इ फुरइ बा कि हम सबइ मरि गएन?”

याजकन अउ लेवी बंसी लोगन क कारज

१८ यहोवा हारून स कहेस, “तू, तोहार पूतन, अउ तोहरे पिता क परिवारे क सब मनई कउनो पाप जउन पवित्तर ठउरे क सम्बंधित कीन्ह ग अहइ क जिम्मेदार अहइ। तू अउ तोहार पूत याजकिये स सम्बन्धि कउनो भी बरे जिम्मेदार

होइहीं।^{११} दूसर लेवी मनइयन क आपन साथ देइ बरे आपन परिवार समूह स लइ आवा। उ सबइ तोहार अउ तोहरे पूतन क मदद साच्छी क तम्बू क काम करइ मँ करिहीं।^{१२} लेवी परिवार क उ सबइ मनई तोहरे मातहत अहइँ। उ पचे उ सबहिं कामे क करिहीं जेनका तम्बू मँ किया जाव अहइ। मुला उ पचेन क वेदी या पवित्रर ठउर क बर्तनन क लगे न जाइ चाही। जदि उ पचे अइसा करिहीं तउ उ सबइ मरि जइहीं अउ तू भी मरि जाव्या।^{१३} उ पचे तोहरे संग होइहीं अउ तोहरे संग काम करिहीं। उ पचे मिलापवाला तम्बू क देखइ रेखइ क जिम्मेदार होइहीं। सब कारज, जेका तम्बू मँ कीन्ह जाइ चाही, उ पचे करिहीं। दूसर कउनो भी उ ठउर क नगिचे न आइ जहाँ तू अहा।

^{१४} “पवित्रर ठउर अउ वेदी क देख-रेख करइ क जिम्मेदार तू अहा। मइँ इस्राएल क मनइयन प फुन कोहाइ नाहीं चाहत हउँ।^{१५} मइँ खुद तोहरे मनइयन यानी लेवी बंस क लोगन क खुद इस्राएल क सबहिं मनइयन मँ स चुनेउँ ह। उ पचे यहोवा क दीन्ह गवा उपहार अहइ अउर उ पचन्क परमेस्सर क सेवा करइ अउर मिलापवाला तम्बू क काम करइ बरे आपिर्त कीन्ह गवा अहइ।^{१६} मुला सिरिफ तू अउ तोहार पूत याजकन क रूप मँ सेवा कइ सकत हीं। अकेले तू ही वेदी क लगे जाइ सकत ह। तू अकेले महापवित्रर ठउर क पर्दा क भितरे जाइ सकत ह। याजक क रूप मँ तोहार सेवा एक ठु उपहार जेका मइँ तोहका देत हउँ। कउनो भी दूसर, जउन पवित्रर ठउर क लगे आइ, मारि डावा जाइ।”

^{१७} तब यहोवा हारून स कहेस, “मइँ खुद तोहका मनइयन जउन खास भेंट चढ़ाएन ह जिम्मेदारी दिहेउँ ह। इस्राएल क लोग जउन सारी भेंट मोका देइहीं उ मइँ तोहका देत अहउँ। तू अउ तोहार पूत इ पवित्रर भेंटन क आपुस मँ बाटि सकत ह। इ हमेसा तोहार होइ।^{१८} इ ओन सबहिं पवित्रर भेंटन मँ इ तोहार आपन हीसा होइ जेका जलावा नाहीं गवा ह। हरेक भेंटन, हरेक अन्नबलि, हरेक पापबलि अउ हरेक दोखबलि जउन उ मोरे लगे लइ आवत हीं, इ सबइ तोहर अउ तोहरे पूतन बरे बहोत पवित्रर भेंटन होइ हीं।^{१९} उ सबन चीजन क महापवित्रर ठउरे मँ खा। तोहरे परिवार क हर मरद मनसेधू एँका खाइ सकत ह मुला तोहका सुमिरइ चाही कि उ सबइ भेंट पवित्रर अहइँ।

^{२०} “अउर उ सबहिं चीजन जेका इस्राएली उत्तोलन बलि क रूप मँ देइहीं, तोहरइ होइहीं। मइँ एँका तोहका, तोहार पूतन अउ तोहार बितियन क देत हउँ। इ तोहार हीसा अहइ। तोहरे परिवार क हर एक मनई जउन सुद्ध होई, एँका खाइ सकी।

^{२१} “अउर मइँ सारा बढिया जइतून क तेल अउ सबन त बढिया नीक नई दाखरस अउ अनाज तोहका देत अहउँ। इ सबइ उहइ चीजन बाटिन जेका इस्राएल क लोग मोका यानी आपन यहोवा क देत हीं। इ सबइ उ चीजियन बाटिन जेका उ पचे आपन फसिल पाक जाए प बटोरत हीं।^{२२} सबइ चीज जउन तोहार भूइँया स आवत ही क पहिला फल परमेस्सर क अहइ। एह बरे इ चीजन क मइँ तोहका देब। अउर हर एक मनई जउन परिवार मँ सुद्ध होई एँका खाइ सकी।

^{२३} “अउर हर एक इस्राएल मँ जउन यहोवा क दीन्ह जात हीं, तोहार बा।

^{२४} “कउनो भी परिवारे मँ पहिलौटी क पूत या गोरु परमेस्सर क भेंट होइ। उ तोहार होइ। मुला तोहका हर एक पहिलौटी लरिका अउ पहिला पइदा भवा असुद्ध गोरु क फुन स वापिस लइ लेइ चाही। तब पहिला पइदा बच्चा फुन उ परिवार क होइ जाइ।^{२५} जब लरिका बच्चा एक महीना क होइ जाई तब्बइ तोहका ओकर बरे दाम लइ लेइ चाही। ओका मुक्त करावइ क मूल्य पाँच सेकेल चाँदी पवित्रर स्थान क अधिकारिक माप अनुसार होइ चाहीं। एक सेकेल बीस गेरा क बराबर होत ह।

^{२६} “मुला तोहका पहिलौटी क गइया या भेड़ी या बोकरा क दाम नाहीं लेइ चाही। उ सबइ गोरु तउ पवित्रर बाटेन। ओनकइ रकत वेदी प छिछकारा अउर ओनकइ चर्बी बारा। इ भेंट आगी क जरिए दीन्ह जात ह। इ भेंट क महकव मोरे बरे यानी यहोवा बरे सोहइवाली गंध होइ।^{२७} मुला इ गोरुअन क गोस तोहार होइ जइसे कि उत्तोलन बलि क छाती तोहार होइ अउर भेंटन क दहिनी जाँघन तोहार होइ।^{२८} कउनो भी चीज, जेका लोग पवित्रर भेंट क रूप मँ मोका चढ़ावत ही, मइँ यहोवा ओका तोहका देत हउँ। इ तोहार हीसा अहइ। मइँ एँका तोहका, तोहार बेटहनन अउ तोहार बितिहिनियन क देत अहउँ। इ यहोवा क संग किया गवा करार अहइ जउन हमेसा बना

^{११} १८:१ तू ... होइहीं जदि अचानक कउनो अजोग्य याजक पवित्रर स्थान, मँ दाखिल होत ह या बलि चढ़ावत ह।

रही। मई इ बचन तोहका अउ तोहरे सन्तानन क देत अहउँ।”

२० यहोवा हारून स इ भी कहेस, “तू कउनो भी भुइयाँ न पउब्या। अउर अइसी कउनो भी चीज नाही रखब्या जइसी दूसर लोग राखत हीं। मई तोहार अंस अउ मई इस्राएल क लोगन क बीच तोहार उत्तरधिकार अहइ।

२१ “इस्राएल क लोग जउन कछू ओनके लगे होइ ओकर दसवाँ हीसा देइही। इ तरह मई लेवी बंस क सन्तानन क दसवाँ हीसा देत अहउँ। इ ओनके उ काम क मजूरी अहइ जउन उ पचे मिलापवाला तम्बू मँ सेवा करत भए करत रहत हीं। २२ मुला इस्राएल क दूसर लोगन क मिलापवाला तम्बू क निअरे कबहुँ नाही जाइ चाही। जदि उ पचे अइसा करत हीं तउ ओनका अपने आप मरइ क होइ। २३ जउन लेवी बंसी मिलापवाला तम्बू मँ काम करत अहइ उ पचे एँकरे खिलाफ पाप क जिम्मेदार होइही। इ कनून हमसा बरे होइ। लेवीबंसी उ भुइया क न लेइही जेका मई इस्राएल क दूसर लोगन क बचन दिहेउँ ह। २४ मुला इस्राएल क लोगन क लगे जउन कछू होइ ओकर दसवाँ हीसा मोका देइही। इ तरह मई लेवी बंसी मनइयन क दसवाँ हीसा देब। इहइ कारण अहइ कि मई लेवीबंसी मनइयन बरे कहेउँ ह: उ पचे उ भुइया क न पइही जेका मई इस्राएल क मनइयन क देइ क वचन दिहेउँ ह।”

२५ यहोवा मूसा स कहेस, २६ “लेवी बंसी मनइयन स बात करा अउ ओनसे कहा, ‘इस्राएल क लोग हर एक चीज क दसवाँ हीसां यहोवा क देइही। उ दसवाँ हीसा लेवी बंसी मनइयन क होइ। मुला ओकर दसवाँ हीसा यहोवा क ओनकी भेंट क रूप मँ देइ चाही। २७ अउर उ दसवाँ हीसा क इ समुझा जाब कि तू खरिहान स अनाज या दाखरस क कोलहू स दाखरस भेंट किहे रहा। २८ इ तरह तू यहोवा क वइसेन ही भेंट देब्या जइसे इस्राएल क दूसर लोग देत हीं। तू इस्राएल क मनइयन क दीन्ह गवा दसवाँ हीसां पउब्या। अउर तू ओकर दसवाँ हीसां याजक हारून क देब्या। २९ जब इस्राएल क लोग आपन हर एक चीज क दसवाँ हीसा देइँ तउ तोहका ओहमाँ स सबन त जियादा पवित्तर हीसा चुनइ चाही। उहइ दसवाँ हीसा अहइ जेका तोहका यहोवा क देइ चाही।’

३० “मूसा, लेवी लोगन स इ कहा, ‘लोग जउन कछू तोहका देत ह ओका सबन त अच्छा हीसा जब तू भेंट करब। तउ इ अइसा होइ जइसा तू एका खरिहान स आनाज या दाखरस क कोलहू स

दाखरस भेंट किहे रहा। ३१ जउन बाकी बची ओका तू अउ तोहार परिवार एँका कउनो जगह खाइ सकत ह। इ तू मनइयन क उ काम बरे मजूरी अहइ जउन तू पचे मिलापवाला तम्बू मँ करत बाट्या। ३२ अउर अगर तू एँकर सब स बढिया हीसां यहोवा क देत रहब्या तउ तू कबहुँ दोखी न होब्या। तू इस्राएल क मनइयन क पवित्तर भेंट क बरे दूसित न करब्या अउर तू मरब्या नाही।”

लाल गइया क राखी

१ यहोवा मूसा अउ हारून स बात किहेस अउ कहेस, २ “इ सबइ कनून अउर नेमँ अहइ जेका यहोवा इस्राएल क मनइयन क दिहे अहइ। ओनका बिना दोखे क एक लाल गइया तोहार लगे लिआवइ। उ गइया क कउनो खोचा भी नाही लागी रहइ चाही। अउर न ही कबहुँ ओका काँधे पइ कउनो जुआ धर दीन्ह गवा ह। ३ इ गइया क याजक एलीआज़ार क द्या। एलीआज़ार गइया क सिबिर स बाहेर लइ जाइ अउ हुवाँ गइया क मारी। ४ तब याजक एलीआज़ार एँकर कछू रकत आपन अँगुरी प लगाइ। तब ओका कछू रकत पवित्तर तम्बू क ओर छिछकारइ चाही। ओका इ सात दाई करइ चाही। ५ तब पूरी गइया क उ समइ जलाइ चाही जब उ लखत ह। चाम गोस, रकत अउ गोबर सबन क फूँकि देइ चाही। ६ तब याजक एक ठु देवदारु क लकड़ी, हिस्सप क डार अउ एक लाल ताँत लेइ चाही। याजक क इ चीजन क उ आगी मँ नावइ चाही जेहमाँ गइया बरत होइ। ७ तब याजक क अपने क अउ अपने ओढ़ना क धोवइ चाही। तब ओका सिबिर मँ लउटइ चाही। याजक साँझ तलक असुद्ध रही। ८ जउन मनई गइया क फूँकि ओका आपन क आपन ओढ़ना क पानी स धोवइ चाही। उ साँझ तलक असुद्ध रही।

९ “तब एक मनई जउन सुद्ध होइ, गइया क राखी बटोरी। उ इ राखी क सिबिर क बाहेर एक सुद्ध ठउरे प राखी। इ राख ओनका असुद्धता क सुद्धीकरण क उपयोग क लइ इस्राएलियन दुआरा रखइ जाब्या।

१० “उ मनई जउन गइया क राखी बटोरेस, आपन ओढ़ना धोइ। उ साँझ तलक असुद्ध रही।

“इ नेमँ सदा चलतइ रही। इ नेमँ इस्राएल क नागरिक लोगन बरे अहइ अउर ओन बिदेसी मनइयन बरे भी बाटइ जउन तोहरे बीच रहत हीं। ११ जदि एक मनई कउनो मरे मनई क छुअत ह तउ उ सात दिन बरे असुद्ध होइ जाइ। १२ ओका

आपन क तीसरे दिन अउ फुन सतएँ दिन पानी स धोवइ चाही। जदि उ अइसा नाहीं करत तउ उ सुद्ध नाहीं होइ।^{१३} जदि कउनो मनई ल्हास क छुअत ह तउ उ मनई जउन असुद्ध अहइ। जदि उ मनई जउन असुद्ध अहइ पवित्र तम्बू क जात ह तउ पवित्र तम्बू अपवित्र होइ जात ह। एह बरे उ मनई क इस्राएलियन स निकारइ दीन्ह जाइ। जदि सुद्धीकरण क जल उ असुद्ध मनई प नाहीं छिरकइ जात ह, उ असुद्ध ही रहब्या।

^{१४} “इ नेमँ ओन लोगन स जुड़ा बाटइ जउन तम्बू मँ मरि जात हीं। जदि कउनो व्यक्ति तम्बू मँ मरि जात ह तउ तम्बू क हर एक मनई अउर हर एक चीज असुद्ध होइ जाइ। उ सबइ सात दिना तलक असुद्ध रहहीं।^{१५} अउर हर बे ढकना क कूड़ा या बासन असुद्ध होइ जात ह।^{१६} जदि कउनो ल्हास क छुअत ह तउ उ मनई सात दिना तलक असुद्ध रही। इ तब भी लागू होइ जब ल्हास खुला मैदान मँ या जुद्ध क मइदान मँ मरा होइ। जदि कउनो मनई मरा भवा मनई क हाइ या कबर क छुअत ह तउ उ मनई सात दिना तलक असुद्ध रहब्या।

^{१७} “एह बरे तोहका बारी भइ गइया क राखी क प्रयोग उ मनई क फुन सुद्ध करइ बरे करइ चाही। बहता भवा जल गगरी मँ धरी राखी प डावा।^{१८} सुद्ध मनई क एक हिस्सप डार लेइ चाही अउ एँका पानी मँ बोरइ चाही। तब ओका तम्बू, घारी अउ तम्बू मँ जउन मनइयन होई ओन पइ इ पानी छिरकइ चाही। तोहका ओन मनइयन क संग इहइ करइ चाही जउन ल्हासे क छुअई। तोहका इ ओकरे संग भी करइ चाही जउन लराइ मँ मारे मनइयन क ल्हासे क छुअत ह। या उ कउनो क संग भी जउन कउनो मरे मनई क हाडे क या कबर क छुअत ह।

^{१९} “तउ कउनो सुद्ध मनई इ जल क असुद्ध मनई प तीसरे दिन अउ फुन सतएँ दिन छिरकइ। सतएँ दिन उ मनई सुद्ध होइ जात ह। ओका आपन ओढ़ना क पानी मँ धोवइ चाही। उ साँझ तलक पवित्र होइ जात ह।”

^{२०} “जदि कउनो मनई असुद्ध होइ जात ह अउ सुद्ध नाहीं होत तउ ओका इस्राएल क मनइयन स निकारइ दीन्ह जाइ। उ मनई प सुद्धीकरण क जल नाहीं छिरका गवा। उ सुद्ध नाहीं भवा। एह बरे उ पवित्र तम्बू क असुद्ध कइ सकत ह।^{२१} इ नेमँ तोहरे बरे सदा होइ। जउन मनई इ सुद्धीकरण क जल क छिरकत ह ओका भी आपन ओढ़ना जरुर धोइ लेइ चाही। जउन मनई इ सुद्धीकरण क जल क छुइ उ साँझ तलक असुद्ध रही।^{२२} जदि कउनो

असुद्ध मनई कउनो दूसर क छुअइ तउ भी असुद्ध होइ जाइ। उ मनई साँझ तलक असुद्ध रही।”

मिरियन मरत ह

२० ^१ इस्राएल क मनई सीन रेगिस्तान मँ पहिले महीना मँ पहाँचेन। लोग कादेस मँ रुकि गएन। मिरियम क मउत भइ अउ उ हुवाँ दफनाई गइ।

मूसा क गलती

^२ उ जगह प मनइयन बरे पानी जियादा नाहीं रहा। एह बरे लोग मूसा अउ हारून क खिलाफ सिकाइत करइ बटुर गएन।^३ मनइयन मूसा स बहस किहेन। उ सबइ केहन, “इ नीक होत कि हम आपन भइयन क तरह यहोवा क समन्वा मर गए होतेन।^४ तू यहोवा क मनइयन क इ रेगिस्तान मँ काहे लियाया? का तू चाहत ह कि हम अउ हमार गोरु हिआँ मरि जाई? ^५ तू हम पचन क मिस्र स काहे लिआया? तू हम पचन क बुरे ठउर प काहे लिआया ह? हिआँ कउनो अनाज नाहीं अहइ, कउनो अंजीर, अंगूर या अनार नाहीं अहइ। अउर हिआँ पिअइ बरे पानी नाहीं अहइ।”

^६ एह बरे मूसा अउ हारून उ मनइयन क तेज दिहन अउ उ पचे मिलापवाला तम्बू क दुआरे पहाँचेन। उ पचे हुआँ पैलगी किहेन। यहोवा क मौजूदगी क तेज ओन पइ परगट भवा।

^७ यहोवा मूसा स बात किहेस। उ कहेस,
^८ “आपन भाई हारून अउ मनइयन क भीड़ क संग ल्या अउ उ चट्टान तलक जा। आपन टहरइ वाली कुबरी क ल्या। मनइयन क समन्वा चट्टान स बात करा। तबहि चट्टान स पानी बही। अउर तू उ पानी आपन मनइयन अउ जानवरन क दइ सकत ह।”

^९ टहरइ वाली कुबरी यहोवा क समन्वा पवित्र तम्बू मँ रही। जइसा यहोवा कहे रहा, मूसा टहरइवाली कुबरी लिहस।^{१०} मूसा अउ हारून मनइयन स चट्टाने क समन्वा मिलइ क केहेन। तब मूसा कहेस, “तू लोग सदा बिद्रोह करत ह। अब मोरउ सुना। का हम इ चट्टाने स पानी बहाउब?”^{११} मूसा आपन भुजा उठाएस अउ दुइ दाई चट्टाने प चोट किहेस। चट्टान स पानी बहइ लाग। मनइयन अउ गोरुअन पानी पिएन।

^{१२} मुला यहोवा मूसा अउ हारून स कहेस, “इस्राएल क सबहि मनइयन चारिहुँ कइँती बटुरा रहेन। मुला तू पचे मोका उ लोगन क समन्वा पवित्र नाहीं ठहराया। तू पचे मनइयन क नाहीं

बताएस कि मई चट्टान स पानी कइसा बहाएस ह। तू सबइ मनइयन क नाही बताया कि तू सबइ मोहे प पतियाना ह। मई ओन मनइयन क उ देस देब जेका देइ क मई बचन दिहेउँ ह। मुला तू सबइ उ देस मँ ओनका पहुँचावइ वाला न रहब्या।”

१३ इ ठउर क नाउँ मरीबा क पानी कहा जात रहा। इ उहइ ठउर अहइ जहाँ इस्राएल क मनइयन यहोवा स वाद-विवाद किहन। अउर इ उहइ ठउर रहा जहाँ यहोवा इ देखेँ रहा कि उ पवित्र रहा।

एदोम इस्राएल क पार नाही होइ दिहस

१४ जब मूसा कादेस मँ रहा, उ कउनो मनइयन क एदोम क राजा क लगे एक संदेसा क संग पठाएस। संदेसा इ रहा :

“तोहरे भाई लोग तोहसे इ कहत हीं : तू जानत ह कि हम पचे केतनी तकलीफ उठावा ह। १४ बहोत बहोतइ बरिस पहिले हमार पुरखन मिस्र चला ग रहेन। अउर हम पचे हुवाँ देर बरिस रहेन। मिस्र क मनई हम सबन बरे निर्दयी रहेन। १६ मुला हम पचे यहोवा क मदद क बिनती कीन्ह। अउर उ हम सबन क मदद बरे एक सरगदूत पठाएस। यहोवा हम पचन क मिस्र स बाहेर लइ आएन ह।

“अब हम पचे कादेस मँ अही जहाँ स तोहार पहुँटा सुरु होत ह। १७ कृपा कइके आपन देस स हम पचन क जात्रा करइ देई। हम पचे कउनो खेत या अंगूरे क बाग स जात्रा नाही करब। हम पचे तोहरे कउनो इनारा स पानी नाही पिअब। हम पचे सिरिफ राजपथ स जात्रा करब। हम पचे राजपथ क तनिके दाहिन बाएँ नाही बढब। हम पचे तब तलक राजपथ प ठहरब जब तलक तोहरे धरती क पार नाही कइ जाइत।”

१५ मुला एदोम क राजा उत्तर दिहस, “तू हमरे देस स होइके जात्रा नाही कइ सकत्या। जदि तू हमरे देस स जात्रा करइ क कोसिस करत ह तउ हम पचे आउब अउ तोहसे तरवारे स लइब।”

१९ इस्राएल क मनइयन जवाब दिहन, “हम पचे बड़की सड़क स जात्रा करब। जदि हम या हमार गोरु तोहार कछू पानी पीही तउ हम पचे ओकरे दाम क भुगतान करब। हम सबइ तोहरे देस स सिरिफ चलिके पार जाइ चाहित ह। हम सबइ एँका आपन बरे लेइ नाही चाहित।”

२० मुला एदोम फिन जवाब दिहस, “हम पचे आपन देस स होइके तोहका जाइ नाही देब।”

तब एदोम क राजा एक ठु बहोत बड़वार अउ ताकतवर फउज बटोरेस अउ इस्राएल क मनइयन स लइइ बरे निकर पड़ा। २१ एदोम क राजा इस्राएल क मनइयन क अपने देस स जात्रा करइ बरे मना कइ दिहस। अउर इस्राएल क लोग मुड़ गए अउर दूसरे राहे स चल पड़न।

हारून मरि जात ह

२२ इस्राएल क सब मनइयन कादेस स होर पहाड़े तलक जात्रा किहन। २३ होर पहाड़ एदोम क चौहद्दी प रहा। यहोवा मूसा अउ हारून स कहेस, २४ “अब हारून क मरि क समइ अउर आपन पुरखन क लगे जा मिलइ क समइ आ गवा ह। इ उ पहुँटा मँन जाइ जेका देइ क मई इस्राएल क मनइयन क बचन दिहेउँ ह। मूसा, मई इ तोहसे कहत हउँ काहेकि मरीबा क पानी क बारे मँ तू अउ हारून मोरे दीन्ह ग हुकुम क खिलाफ बिद्रोह किहस।

२५ “हारून अउ ओकरे पूत एलीआज़ार क हॉर पहाड़े प लिआवा। २६ हारून क खास ओढ़ना क ओसे ल्या अउ ओन ओढ़नन क ओकर पूत एलीआज़ार क पहिरावा। हारून हुवाँ पहाड़े प मरी। अउर उ आपन पुरखन क संग होइ जाइ।”

२७ मूसा यहोवा क हुकुम क मानेस। मूसा, हारून अउ एलीआज़ार हॉर पहाड़े प गएन। इस्राएल क सब मनइयन ओका जात लखन। २८ मूसा हारून क ओढ़ना उतार लिहस अउ ओन ओढ़ना क हारून क पूत एलीआज़ार क पहिराएस। तब हारून पहाड़े क चोटी प मरि गवा। मूसा अउ एलीआज़ार पहाड़े स उतरि आएन। २९ तबहिं इस्राएल क सब मनइयन जान लिहन कि हारून गुजर गवा। एह बरे इस्राएल क हर मनई तीस दिना तलक हारून बरे गमी मनाएस।

कनानीयन स जुद्ध

२१ १ एक कनानी अराद क राजा रहा। उ नेगेव रेगिस्तान मँ रहत रहा। अराद क राजा सुनेस कि इस्राएल क मनइयन अथारीम कइती जाइवाली सड़क स आवत अहइँ। एह बरे राजा बाहेर निकरा अउ इस्राएल क मनइयन प हमला किहस। उ ओहमाँ स कछू क धइ लिहस अउ ओनका बंदी बनाएस। २ तब इस्राएल क मनइयन यहोवा क इ बचन दिहन, “हे यहोवा! इ मनइयन

कहरावड मँ हमार मदद करा। एँनका हमरे मातहत कइ द्या। जदि तू अइसा करब्या तउ हम पचे ओनके सहन क पूरी तरह बरवाद कइ देब।”

३ यहोवा इस्राएल क मनइयन क बिनती सुनेस। अउर यहोवा इस्राएल क लोगन स कनानी मनइयन क हरवाइ दिहस। इस्राएल क मनइयन कनानी लोगन अउ ओनके सहन क पूरी तरह नास कइ दिहन। एह बरे उ ठउरे क नाउँ होरगा पड़ा।

काँसा क साँप

४ इस्राएल क मनइयन होर पहाड़े क तजेन अउ लाल सागर क जाइवाली सड़क स जात्रा प गएन। उ पचे अइसा एदोम क देस क चारिहुँ कइती जाइ बरे किहेन। मुला मनइयन क धीरा नाही रहा। ५ उ सबइ परमेस्सर अउ मूसा क खिलाफ ओराहना सुरु किहन। मनइयन कहन, “तू हम सबन क मिसर स बाहेर काहे लिआया ह? हम पचे हिआँ रेगिस्तान मँ मरि जाब! हिआँ रोटी नाही मिलत! हिआँ पानी नाही! अउर हम पचे इ सड़ाइध खइया स घिना करित ह।”

६ एह बरे यहोवा मनइयन क बीच बिखैला साँपन पटाएस। साँपन ओन मनइयन क डस लिहस अउ बहोत स लोग मरि गएन। ७ लोग मूसा क लगे आएन अउ ओसे कहन, “हम पचे जानित ह कि जब हम पचे यहोवा अउ तोहरे खिलाफ बोलइ क पाप किहे अहउँ। यहोवा स पराथना करा अउ ओसे कहा कि इ साँपन क दूर करइ।” एह बरे मूसा लोगन बरे पराथना किहस।

८ यहोवा मूसा स कहस, “एक टु काँसा क साँप बनावा अउ ओका एक टु खम्बा प धरा। अगर कउनो मनई क साँप डसइ तउ उ मनई क खम्बा क ऊपर काँसा क साँप लखइ चाही। तब इ तरह उ मनई मरी नाही।” ९ एह बरे मूसा यहोवा क हुकुम मानेस अउ एक काँसा क साँप बनाएस अउ ओका एक खम्बा प धरेस। तब जब कबहुँ कउनो मनई क साँप डसत रहा तउ ओका खम्बा पइ काँसा क साँप क लखइ क होइ रहा। अउ जिअत रहत रहा।

होर पहाड़े स मोआब क घाटी तलक क जात्रा

१० इस्राएल क लोग उ जगह क तजि दिहेन अउ ओबोत नाउँ क जहग प सिबिर डाएन। ११ तब मनइयन ओबोत स इये अबारीम तलक क जात्रा किहन। अउर हुआँ सिबिर डाएन। इ मोआब क पूरब रेगिस्तान मँ रहा। १२ तब मनइयन उ ठउर क छोड़ दिहन अउर जेरद घाटी क जात्रा किहन।

उ पचे हुवाँ सिबिर डाएन। १३ तब उ पचे चलेन अउ रेगिस्तान क अनोन नदी क ओह पार सिबिर डाएन। इ नदी एमोरियन क चउहदी स सुरु होत रही। घाटी मोआब क चउहदी अउ एमोरी क बीच बीच रही। १४ इहइ कारन अहइ कि यहोवा क जुद्ध कितावे मँ नीचे लिखा भवा हाल मिलत ह।

“अउर सूपा मँ बाहेब, अनोन क घाटी।

१५ अउर अर क बस्ती तलक पहाँचावइ वाली घाटी क किनारे क पहाड़ी। इ ठउर मोआब क चउहदी प अहइ।”

१६ इस्राएल क मनइयन उ ठउर क तजेन अउर उ पचे बीर क जात्रा किहन। इ ठउर प एक टु इनार रहा। यहोवा मूसा स कहस, “हिआँ सबहि मनइयन क बटोरा अउर मइँ ओनका पानी देब।”

१७ तब इस्राएल क मनइयन गीत गाएन:

“ए नारा! उमईके पानी बहाउ।

एकर गीत गावा।

१८ महा पुरखन इ नारा क खोदेन।

सज्जन लोग इ नारा क खोदेन।

उ पचे आपन राज-दण्डियन अउर लाठियन स एँका खोदेन।

इ रेगिस्तान मँ एक टु भेंट अहइ।”

(तउ मनइयन एँका “मत्ताना” नाउँ क इनारा कहन।)

१९ तब मनइयन मत्ताना स नहलीएल क जात्रा किहन। फुन उ पचे नहलीएल स बामोत क जात्रा किहन। २० मनइयन बामोत स मोआब मँ घाटी तलक क जात्रा किहन। इ ठउरे प पिसगा पहइ क चोटी रेगिस्तान क ऊपर देखाँइ पड़त ह।

सिहोन अउ ओगँ

२१ इस्राएल क मनइयन कछू मनइयन क एमोरी लोगन क राजा सीहोन क लगे पटाएस। इ मनइयन राजा स कहन,

२२ “आपन देस स होइ के हमका जात्रा करइ द्या। हम पचे कउनो खेत या अंगूरे क बगिया स होइके न जाब। हम पचे तोहरे कउनो इनारा क पानी न पिअब। हम सबइ सिरिफ राज-पथ स होइके जात्रा करब। हम सबइ तब तलक उ सड़क प टहरब जब तलक हम पचे तोहरे देसे स होइके जात्रा पूरी नाही कइ लेइत।”

२३ मुला राजा सीहोन इस्राएल क लोगन क आपन देस स होइके जात्रा करइ क रजामन्दी नाही दिहस। राजा आपन फउज बटोरेस अउ

रेगिस्ताने कईती चल पड़ा। उ इस्राएल क खिलाफ हमला करत रहा। यहज नाउँ क एक ठउरे प राजा क फउज इस्राएल क लोगन क संग लड़ाई लड़ेस।

२४ मुला इस्राएल क लोगन राजा क मारि डाएन। तब उ पचे अनोर्न घाटी स लइके यब्बाक इलाका तलक ओकरे पहुँटा प कब्जा कइ लिहें। इस्राएल क मनइयन अम्मोनी लोगन क हद तक क पहुँटा प कब्जा किहन। उ पचे अउर जियादा इलाका प कब्जा नाही किहन काहे की उ हद अम्मोनी लोगन क जरिए सुरच्छित रही। २५ मुला इस्राएल अम्मोनी लोगन क सबहिं सहरन प कब्जा कइ लिहें। उ पचे हेसबोन नगर तलक अउ ओकरे चारिहुँ कईती क छोटके सहरन क भी हराइ दिहें। २६ हेसबोन उ सहर रहा जेहमा राजा सीहोन रहत रहा। एकरे पहिले सीहोन मोआब क राजा क हराए रहा अउ सीहोन अनोर्न घाटी ताई सब पहुँटन प कब्जा कइ लिहे रहा। २७ इहइ कारण अहइ कि गवइया इ गीत गावत हीं :

“आवा हेसबोन क एँका फुन स बसावइ क बाटइ। सीहोन क सहरन क फुन स बनइ द्या।

२८ काहेकि आगी हेसबोन सहर स बाहेर चले गएस,

अउर सोला सीहोन सहर स बाहेर चला गवा।

आगी मोआब मँ आर क नस्ट कइ दिहस।

इ अनोर्न नदी क ऊपरी पहाड़ियन क सासकन क बार दिहस।

२९ हे मोआब ! इ तोहरे बरे बुरा बाटइ, कामोस क मनई बरबाद कइ दीन्ह ग बाटेन।

ओकर पूतन भाग पराइ गएन।

ओकर बिटियन बन्दी बनाइ गइन।

अमानीत लोगन क राजा सीहोन क जरिये।

३० मुला हम पचे ओनँ एमोरियन क हरावा,

हम सबइ ओनका हेसबोन स दिवान तलक सहरन क, नसिम स नोपह तलक जउन मेदाब क निचके अहइ मिटाइ द्या।”

३१ एह बरे इस्राएल क मनइयन एमोरियन लोगन क देस मँ रहेन।

३२ मूसा कछू खुफिया लोगन क याजेर प नजर धरइ बरे पटाएस। मूसा क अइसा करइ क पाछे इस्राएल क मनइयन उ सहर प कब्जा कइ लिहें। उ पचे ओकरे चारिहुँ कईती क छोटके सहरन प भी कब्जा कइ लिहें। इस्राएल क मनइयन उ ठउरे प बसइया एमोरी लोगन क उ ठउर तजि देइ क मजबूर किहें।

३३ तब इस्राएल क लोग बासान कईती जाइवाली सड़क प जात्रा किहें। बासान क राजा ओग आपन फउज लिहस अउ इस्राएल क लोगन क मुकाबाला करइ निकरा। उ एद्रेइ नाउँ क पहुँटा मँ ओनके खिलाफ लड़ा।

३४ मुला यहोवा मूसा स कहेस, “उ राजा स जिन सिबिरअ। मई तोहका ओका हरावइ देब। तू ओकर पूरी फउज अउ पहुँटा क पउब्या। तू ओकरे संग उहइ करा जउन तू एमोरी लोगन क राजा सिहोन क संग किहा ह।”

३५ एह बरे इस्राएल क लोगन ओग अउ ओकर फउज क हाराया। उ सबइ ओका, ओकर बेटवन अउ ओकर सारी फउज क हराएन। तब इस्राएल क मनइयन ओकरे पूरे देस क कउनो क बिना जितत छोड़इ क कब्जा कइ लिहें।

बिलाम अउ मोअब क राजा

२२ १ तब इस्राएल क मनइयन मोआब क समतल स होइ के यरदन नदी क पार यरीहो तलक जात्रा किहें। २-३ सिप्पोर क पूत बालाक उ सब लखेस जेका इस्राएल क मनइयन एमोरी मनइयन क संग किहे रहेन। मोआब बहोतइ जियादा डेराइ ग रहा काहे की हुवाँ इस्राएल क बहोत मनई रहेन। मोआब इस्राएल क लोगन स बहोत ससान रहा।

४ मोआब क राजा मिद्यान क नेता लोगन स कहेस, “मनइयन क इ बड़का झुण्ड हमरे चारिहुँ कईती क सब चीज क वइसे ही बरबाद कइ देइ जइसे कउनो गइया खेते क घास चरि जात ह।”

इ टेमें सिपोर क पूत बालाक मोआब क राजा रहा। ५ उ कछू मनइयन क वोर क पूत बिलाम क बोलावइ बरे पटाएस। बिलाम फरात नदी क निअरे पतोर नाउँ क पहुँटा मँ रहा। बालाक कहेस,

“मनइयन क एक नवा रास्ट्र मिस्र स आवा ह। उ पचे एँतना जियादा अहइ कि समूचइ प्रदेश मँ संचर सकत हीं। उ पचे ठीक हमरे निअरे सिबिर डाए अहइ। ६ आवा अउ इ मनइयन क संग भिड़इ मँ मोर मदद करा। उ पचे मोर ताकत स जियादा बरिआर ताकत वाला अहइ। इ होइ सकत ह कि तब मई एँनका हराइ सकउँ। तब मई ओनका आपन देस छोड़इ क मजबूर कइ सकउँ। मई जानत अहउँ कि तू बड़की ताकत धरत ह। अगर तू कउनो मनई क आसीबाद देइ तउ उ आसीसित होइ, अगर तू कउनो मनई क

सराप देइ तउ उ मनई सापित होइ। ११॥ एह बरे आवा अउ इ मनइयन क सराप देइ।”

१० मोआब अउ मिद्यान क नेतन बालाम स मिलइ बरे गएन अउर आपन संग जादूइ सेवा क फीस भी लइ गएन। तब उ पचे, बालाक जउन कछू कहे रहा, ओसे कहें।

५ बिलाम ओनसे कहेस, “हिआँ रात भइ ठहरा। मई यहोवा स बात करब अउर जउन जवाब, उ पचे मोका देइही, उ तोहसे कहब।” एह बरे उ रात मोआबियन क नेता ओनके संग ठहरेन।

१ परमेस्वर बिलाम क लगे आवा अउ उ पूछेस, “तोहरे संग इ सबइ कउन लोग अहइ?”

१० बिलाम परमेस्वर स कहेस, “मोआब क राजा सिपोर क पूत बालाक एक संदेसा मोका देइ बरे ओनका पठए अहइ। ११ संदेसा इ अहइ: मनइयन क एक ठु नवा रास्टर मिस्र स आवा अहइ। उ पचे एतना जियादा अहइ कि समूचइ देस मँ फइलि सकत ही। एह बरे आवा अउ इ मनइयन क खिलाफ कछू कहा। इ होइ सकत ह ओनसे लइइ मँ मई समर्थ होइ सकउँ अउ आपन देस तजि देइ क ओनका मजबूर कइ सकउँ।”

१२ मुला परमेस्वर बिलाम स कहेस, “ओनके संग जिन जा। तू ओनका सराप नाही देइ चाही, काहेकि उ आसीबांद पाएस ह।”

१३ दूसर दिन बिलाम उठा अउ बालाक क नेता स कहेस, “अपने देस क लउटि जा। यहोवा मोका तोहरे संग नाही जाइ देइही।”

१४ एह बरे मोआबी नेता बालाक क लगे लउटि गएन अउ ओसे इ बात किहेन। उ पचे कहें, “बिलाम हम सबन क संग आवइ स मना कइ दिहे अहइ।”

१५ एह बरे बालाक दूसर नेता लोगन क बिलाम क लगे पठाएस। इ दाई उ पहिली दाई क अपेच्छा बहोत ढेर क मनई पठाएस। अउर इ नेता लोग पहिली दाई क अपेच्छा जियादा सम्मान् रहेन।

१६ उ सबइ बिलाम क निअरे गएन अउ कहें: “जिपोर क पूत बालाक तोहसे कहत ह: कृपा कइके आपन क हिआँ आवइ स कउनो क रोकइ जिन द्या। १७ जउन मई तोहसे माँगत अहउँ जदि तू उ करब्या तउ मई तोहका बहोत जियादा भुगतान करब। आवा अउ इ मनइयन क खिलाफ मोरे बरे कछू कहा।”

१५ मुला बिलाम उ मनइयन क जवाब दिहस। उ कहेस, “मोका यहोवा मोरे परमेस्वर क आग्या मानइ चाही। मई ओकरे हुकुम क खिलाफ कछू नाही कइ सकत हउँ। मई बड़का-छोटका कछू भी तब तलक नाही कइ सकत जब तलक परमेस्वर नाही कहत कि मई ओका कइ सकत हउँ। अगर राजा बालाक आपन सोना चाँदी भी सुन्दर घर क भी दइ देइ तउ भी मई आपन परमेस्वर यहोवा क हुकुम क खिलाफ कछू नाही करब। १९ मुला तू भी ओन दूसर लोगन क तरह आज क रात हिआँ ठहर सकत ह। अउ रात मँ मई जान जाब कि यहोवा मोहसे क कहवावइ चाहत ह।”

२० उ रात परमेस्वर बिलाम क लगे आवा। परमेस्वर कहेस, “इ लोग अपने संग लइ जाइ बरे कइ खातिर फुन आवा अहइ। एह बरे तू ओनके संग जाइ सकत ह मुला सिरिफ उहइ करा जउन मई तोहसे करइ क कहउँ।”

बिलाम अउ ओकर गदहा

२१ दूसरे भिन्सारे बिलाम उठा अउ अपने गदहा प काठी धरेस। तब उ भी मोआबी नेता लोगन क संग गवा। २२ बिलाम आपन गदहा प सवार रहा। ओकरे नउकरन मँ स दुइ ठु ओकर संग रहेन। जब बिलाम जात्रा करत रहा तउ परमेस्वर ओन प कोहाइ गवा। एह बरे यहोवा क सरगदूत बिलाम क समन्वा सड़के प खड़ा होइ गवा। सरगदूत बिलाम क रोकइ जात रहा।

२३ बिलाम क गदहा यहोवा क सरगदूत क सड़क प खड़ा देखेस। सरगदूत क हाथ मँ एक तरवार रही। एह बरे सड़क स मुड़ा अउ खेत मँ चला गवा। बिलाम सरगदूत क नाही लख सकत रहा। एह बरे उ गदहा प बहोत कोहान। उ गदहा क पीटेस अउ ओका सड़क प लउटइ क मजबूर किहस।

२४ पाछे यहोवा क सरगदूत अइसी जगह प खड़ा भवा जहाँ सड़क संकरी होइ गइ रही। इ दुइ अंगूर क बगियन क बीच क ठउर रहा। हुवाँ सड़क क दुइनउँ ओर देवार रहिन। २५ गदहा यहोवा क सरगदूत क फुन निहारेस। एह बरे गदहा एक देवारे स चिपकके निकरा। एहसे बिलाम क गोड़ देवारे स पिचक गवा। एह बरे आपन गदहा क फुन स पीटेस। २६ एकरे पाछे यहोवा क सरगदूत दूसर ठउर प खड़ा भवा। इ दूसर जगह रही जहाँ सड़क सँकराइ ग रही। हुवाँ कउनो अइसी जगह

११२२ : ६ अगर तू ... होइ इ उ वाचा क कइती इसारा करत ह जउन परमेस्वर इब्राहीम क संग उत्पत्ति १२ : ३ मँ किहस ह “मई ओका आसिस देब जउन तोहका आसिस देत ह, मई ओका सराप देब जउन तोहका सराप देत ह।”

नाहीं रही जहाँ गदहा मुड़ सकइ ।^{२७} गदहा यहोवा क सरगदूत क लखेस । एह बरे गदहा बिलाम क आपन पीठ प लइके जमिन प बइठि गवा । बिलाम गदहा पर बहोतइ कोहान रहा । एह बरे उ ओका लाठी स पीठि डाएस ।

^{२८} तब यहोवा गदहा क बोलइवाला बनाएस । गदहा बिलाम स कहेस, “तू मोहे प काहे कोहान अहा । मई तोहरे संग का किहउँ ह ? तू मोका तीन दाई मार्या ह ।”

^{२९} बिलाम गदहा क उत्तर दिहस, “तू मोर मज़ाक उड़ाएस ह, तू मोका गलत ठहराएस ह । जदि मोरे हाथे मँ अबहि सिरिफ एक तरवार होत तउ मई अबहि तोहका मारि डाइत ।”

^{३०} मुला गदहा बिलाम स कहेस, “मई तोहार आपन गदहा अहउँ, जेह प तू आपन सारा जिन्नगी सवार भवा ह । अउर तू जानत ह कि मई अइसा एकरे पहिले कबहुँ नाहीं किहेउँ ह ।”

“इ सही अहइ ।” बिलाम कहेस ।

^{३१} तब यहोवा बिलाम क सड़क प खड़ा सरगदूत क लखइ दिहस । बिलाम सरगदूत अउ ओकर तरवारि निहारेस । तब बिलाम निहुरिके पैलगी किहस ।

^{३२} तब यहोवा क सरगदूत बिलाम स पूछेस, “तू आपन गदहा क तीन दाई काहे मार्या ह ? मई तोहका रोकइ बरे हिआँ आवा अहउँ । काहेकि तोहार जात्रा मोर आदेस क खिलाफ अहइ ।

^{३३} गधा मोका लखेस । अगर गदहा न मुड़ा होत तउ मई तोहका मारि डाए होतेउँ । मुला मोका तोहरे गदहा क नाहीं मारइ क रहा ।”

^{३४} तब बिलाम यहोवा क सरगदूते स कहेस, “मई पाप किहेउँ ह । मई इ नाहीं जानत रहेउँ कि तू सड़क प खड़ा अहा । अगर मई बुरा करत अहउँ तउ मई घर लउटि जाब ।”

^{३५} यहोवा क सरगदूत बिलाम स कहेस, “नाहीं, तू इ मनइयन क संग जाइ सकत ह । मुला होसियार रहा । सिरिफ उ बातन क कहा जउन मई तोहसे कहइ बरे कहुब ।” एह बरे बिलाम बालाक क जरिये पठए गए नेता लोगन क संग गवा ।

^{३६} बालाक सुनेस कि बिलाम आवत अहइ । एह बरे बालाक ओसे मिलइ बरे अर्नोन नदी क निअरे मोआबी सहर गवा । इ ओकरे देस क उत्तरी छोरे प रहा ।^{३७} जब बालाक बिलाम क लखेस तउ उ बिलाम स कहेस, “मई एकरे पहिले आप स आवइ क कहेउँ रहा अउर इ भी बताएउँ रहा कि इ बहोत जियादा महत्व स भरा बाटइ । आप हमरे लगे काहे

नाहीं आएन ? का मई तोहका धन देइ क जोग्य नाहीं अहइ ?”

^{३८} मुला बिलाम उत्तर दिहस, “मई अब तोहरे लगे आवा अहउँ । मुला मई, जउन तू करइ क कहू रहा ओहमाँ स, साइद, कछू भी न कइ सकउँ । मई सिरिफ उहइ बातन तोहसे कइ सकत हउँ जउन यहोवा परमेस्सर मोसे कहइ क बताएस ह ।”

^{३९} तब बिलाम बालाक क किर्यथूसोत गवा ।^{४०} बालाक कछू गोरु अउ कछू भेड़िन ओकरे भेंट क रूप मँ मारेस । उ कछू गोस बिलाम अउ कछू ओकरे संग क नेता लोगन क दिहस ।

^{४१} दूसरे भिन्सारे बालाक बिलाम क बमोत बाल नगर लइ गवा । उ सहर स उ पचे इस्राएली मनइयन क कछू सिबिर क लखि सकत रहेन ।

बिलाम क पहिली भविस्सबाणी

२३ ^१ बिलाम कहेस, “हिआँ सात टु वेदी बनावा । अउ मोरे बरे सात टु बर्धा अउ सात भेड़ा तइयार करा ।”^२ बालाक उ सब किहस जउन बिलाम कहेस । तब बिलाम अउ बालाक हर एक वेदी प एक टु बर्धा अउ एक भेड़ा मारेस ।

^३ तब बिलाम बालाक स कहेस, “इ वेदी क लगे ठहरा । मई दूसर जगह जाब । तब साइद यहोवा मोरे लगे अहहीं अउर बतइहीं कि मई का कहउँ ।” तब बिलाम एक ऊँचा जगह प गवा ।

^४ परमेस्सर उ ठउर प बिलाम क लगे आवा । अउर बिलाम कहेस, “मई सात टु वेदी तइयार किहेउँ ह । अउर मई हर एक वेदी प एक टु बर्धा अउ एक भेड़ा मारेउँ ह ।”

^५ तब यहोवा बिलाम क इ बताएस जउन ओका कहइ चाही । तब यहोवा कहेस, “बालाक क लगे जा अउ इ बातन क कहा जउन मई कहइ बरे बताएउँ ह ।”

^६ एह बरे बिलाम बालाक क लगे लउटा । बालाक तब तलक वेदी क निचके खड़ा रहा । अउर मोआब क सबहि नेता लोग ओकरे संग खड़ा रहेन ।^७ तब बिलाम इ सब बातन क कहेस:

“मोआब क राजा बालाक

मोका अरम स बोलाएस पूरबिया पहाइन स ।

बालाक मोसे कहेस:

‘आवा अउ मोरे बरे याकूब क खिलाफ कहा आवा अउ इस्राएल क लोगन क खिलाफ कहा ।’

^८ परमेस्सर ओन मनइयन क खिलाफ नाहीं अहइ, एह बरे मई भी ओनके खिलाफ नाहीं कहि सकत हउँ ।

यहोवा ओनका बुरा होइ बरे नाहीं कहेस ह ।

एह बरे मई भी वइसा नाही कइ सकत हउँ ।
 १ मई ओन सबन क पहाड़े स लखत हउँ ।
 मई अइसे मनइयन क लखत हउँ
 जउन अकेले रहत हीं ।
 इ मनइयन कउनो दूसरे रास्टर क अंग नाही
 अहईं ।

१० कउन याकूब क मनइयन क गन सकत ह ?
 उ सबइ बालू क कणे क तरह ढेर क बाटेन ।
 इस्राएल क मनइयन क एक चउथाई क भी
 कउनो गन नाही सकत ।
 मोका एक ठु नीक मनई क तरह मरइ द्या,
 मोका ओन मनइयन क तरह मरइ द्या ।”

११ बालाक बिलाम स कहेस, “तू हमरे बरे का
 किहा ह ? मई तोहका आपन दुस्मनन प सारप देइ
 बरे बोलाएउँ रहा । तू आपन सबन क आसीबाद
 दिहा ह ।”

१२ मुला बिलाम जवाब दिहस, “यहोवा मोहसे
 जउन कहइ क चाहत ह ओका मोका जरूर कहइ
 चाही ।”

१३ तब बालाक ओसे कहेस, “तउ मोरे संग कउनो
 दूसर ठउर प आवा । जहाँ तू ओन लोगन क लखि
 सकत ह । मुला तू ओनके एक हिंसा क लखि सकत
 ह, सबहिं क नाही लखि सकत ह । अउर उ ठउर स
 मोरे बरे ओनका सराप दइ सकत ह ।” १४ एह बरे
 बालाक बिलाम क जोफिम क मइदान १११ लइ
 गवा । इ पिसगा पहाड़े क चोटी प रहा । बालाक
 उ ठउर प सात वेदी बनाएस । तब बालाक हर एक
 वेदी प बलि क रूप मँ एक ठु बर्धा अउ एक भेड़ा
 मारिस ।

१५ एह बरे बिलाम बालाक स कहेस, “इ वेदी प
 खड़ा रहा । मई उ ठउरे प परमेस्सर स भेटइ जाव ।”

१६ तउ यहोवा बिलाम क लगे आवा अउ उ
 बिलाम क बताएस कि उ का कहइ । तब यहोवा
 बिलाम क बालाक क लगे लउटि आवइ अउ ओन
 बातन क कहइ बरे कहेस । १७ एह बरे बिलाम
 बालाक क लगे गवा । बालाक तब वेदी क लगे
 खड़ा रहा । मोअँब क नेता ओकरे संग रहेन ।
 बालाक बिलाम क आवत भवा लखेस अउ ओसे
 पूछेस, “यहोवा का कहेस ह ?”

बिलाम क दूसर भविस्सबाणी

१८ तब बिलाम इ बातन क कहेस:

“खड़ा ह्वा अउ मोर बात सुना ।
 सिप्पार क पूत बालाक ! मोरउ सुना ।

१९ परमेस्सर मनई नाही ;
 उ लबार न बोली ।
 परमेस्सर मनई स पइदा पूत नाही,
 ओकर फइसला बदली नाही ।
 अगर यहोवा कहत ह कि उ कछू करी
 तउ उ ओका जरूर करी ।
 जदि यहोवा बचन देत ह
 तउ आपन बचन क जरूर पूरा करी ।
 २० यहोवा मोका ओनका आसीबाद देइ क हुकुम
 दिहेस ह ।

यहोवा ओनका आसीबाद दिहेस ह, एह बरे मई
 ओका नाही बदल सकित ।
 २१ परमेस्सर याकूब क मनइयन मँ कउनो दोख
 नाही पाएस ।

इस्राएल क लोगन मँ कउनो पाप नाही रहा ।
 यहोवा ओनकइ परमेस्सर अहइ अउ ओनके संग
 बाटइ ।

महाराजा क पुकार ओनके संग अहइ ।

२२ परमेस्सर ओनका मिस्र स बाहेर लिआवा ।
 इस्राएल क उ सबइ लोग जंगली साँडे क तरह
 बलवान अहइं ।

२३ कउनो ताकत नाही जउन याकूब क लोगन क
 हराइ सकइ ।

कउनो जादू इस्राएल क लोगन क नाही रोकइ
 सकत ह ।

याकूब क बारे मँ अउ इस्राएल क लोगन क बारे
 मँ भी मनइयन इ बात कहब्या,
 “परमेस्सर जउन महान काम किहे अहइ ओन पइ
 धियान द्या ।”

२४ मनई सेर क नाई सकतीवाला होइहीं ।

उ सबइ सेर जइसे लडिहीं ।

अउर इ सेर कबहुँ नाही आराम करी, जब तलक उ
 सिकार क खाइ नाही लेअत ।

जब तलक उ ओनकइ खून नाही पिअत जउन जुद्ध
 मई मारा गवा ह ।”

२५ तब बालाक बिलाम स कहेस, “तू नाही
 ओका सराप द्या अउर नाही ओका आसीबाद ।”

२६ बिलाम जवाब दिहस, “मई पहिले तोहसे
 कहि दिहेउँ ह कि मई सिरिफ उहइ करब जउन
 यहोवा मोका करइ बरे कहत ह ।”

२७ तब बालाक बिलाम स कहेस, “एह बरे तू मोर
 संग दूसर ठउर प चला । साइद कि ओनका उ जगह
 स सराप देइ स परमेस्सर खुस होइ ।” २८ एह बरे

११२३ :१४ जोफिम क मइदान पहाड़ा पइ उ जगह जहाँ स चोकीदार दूर क चिजियन क लख सकत ह ।

बालाक बिलाम क पेऑर पहाड़े प लइ गवा। इ पहाड़ रेगिस्तान मँ दिखाँइ देत रहा।

२९ बिलाम कहेस, “हिआँ सात वेदी बनावा। तब सात ठु साँड़ अउ सात भेड़ा क वेदी प बलि बरे तइयार करा।” ३० बालाक उहइ किहस जउन बिलाम कहेस। बालाक बलि क रूप मँ हरेक वेदी प एक ठु साँड़ अउ एक भेड़ा भारेस।

बिलाम क तीसरी भविस्सबाणी

२४ १ बिलाम क मालूम भवा कि यहोवा इस्राएल क आसीबाद देइ चाहत ही। एह बरे बिलाम कउनो किस्म क जादू टोना क प्रयोग कइके ओका बदलइ नाहीं चाहेस। मुला बिलाम मुड़ा अउ उ रेगिस्तान कइँती लखेस।

२ बिलाम रेगिस्तान क पार तलक लखेस अउ इस्राएल क सबहिं लोगन क लखेस। उ पचे आपन अलग-अलग परिवार समूहन क पहुँटा मँ सिबिर डाए भए रहेन। तब परमेस्सर क आतिमा बिलाम प उतरी। ३ अउर बिलाम इ शब्दन क बोला :

“बोर क पूत बिलाम क सँदेसा अहइ जउन मइँ साफ-साफ निहारत हउँ

उहइ क बारे मँ बोलत हउँ

४ मइँ इ सँदेसा क परमेस्सर स सुनेउँ ह।

मइँ लखेउँ ह जउन सर्वसक्तीमान परमेस्सर मोका देखोँएस ह।

मइँ मूँड़ि निहुराइके बतावत हउँ जउन मइँ साफ-साफ देखत हउँ।

५ “याकूब क मनइयो! तोहार तम्बू बहोतइ सुन्नर अहइँ!

इस्राएल क मनइयो! तोहार घर बहोतइ सुन्नर अहइँ!

६ तोहार तम्बू बगिया क नाई अहइँ

जउन नदी क आगे लगावा गवा ह।

तोहार घर उ बगिया क नाई बाटेन

जउन नदी क किनारे बाढ़त रहत ह।

तोहार घर मीठी महकउआ झाड़ी क नाई

अहइँ जेका यहोवा उगाए बाटइ।

तोहार घर सुन्नर बिरवा क नाई

अहइँ जउन पानी स बाढ़त रहत ही।

७ तोहका पिअइ क पानी हमेसा मिलत रही।

तोहका खूब इफरात पानी बिआ क बाढ़इ बरे मिली।

तोहार सबन क राजा अगग स बड़ा होइ।

तोहरे राज्ज क बड़की महिमा होइ।

८ “परमेस्सर ओन लोगन क मिस्र स बाहेर लिआवा।

उ एँतना बरिआर सक्तीवाला

अहइ जेतना एक ठु अनेर साँड़।

उ पचे आपन सबहिं दुस्मनन क नास कइ देब।

उ ओकर हइयिन क तोड़ देब

अउ आपन तीरन स ओनका भेद देब।

९ उ सबइ सेर क नाई अहइँ जउन गुटुर-मुटुर बइटा अहइ अउर सोअत अहइ।

कउनो मनई ओका जगावइ नाहीं चाहत।

कउनो मनई जउन तोहका आसीबाद देइ, असीस पाइ।

अउर कउनो मनई जउन तोहका सराप देइ उ पचे सराप पाइ।”

१० तब बिलाम प बालाक बहोत कोहान। बालाक बिलाम स कहेस, “मइँ तोहका आपन दुस्मनन पइ सराप देइ बरे हिआँ बोलाएँ रहा। मुला तू ओनका आसीबाद दिहे अहा। तू ओनका तीन दाई आसीबाद दिहे अहा। ११ अब बिदा हूा अउ घरे जा। मइँ कहेउँ रहा कि मइँ तोहका बहोत जियादा अमीर बनाउब। मुला यहोवा तोहका इनाम पावइ स रोक रखे बाटइ।”

१२ बिलाम बालाक स कहेस, “का मइँ ओन संदेसवाहकन क जेनका तू मोरे लगे पटाएँस रहा नाहीं कहेस रहा : १३ बालाक आपन सोना चाँदी स भरा आपन घर मोका दइ सकत ह। मुला मइँ तब भी सिरिफ उहइ बात कहि सकत हउँ जेका कहइ बरे यहोवा हुकुम दिहे अहइ। मइँ नीक या बुरा खुद कछू नाहीं कइ सकत हउँ। मोका उहइ करइ चाही जउन यहोवा क हुकुम होइ।” का तोहका याद नाहीं कि मइँ इ बातन तोहरे मनइयन स कहेउँ। १४ अब मइँ आपने लोगन क बीच जात अहउँ; मुला मइँ तोहका एक चिताउनी देब। मइँ तोहसे कहब कि भविस्स मँ इस्राएल क इ लोग तोहरे संग अउ तोहरे लोगन क संग का करिहीं।”

बिलाम क आखिरी भविस्सबाणी

१५ तब बिलाम इ बातन क कहेस:

“बोर क पूत बिलाम क इ सब्द अहइँ।

इ सबइ सब्द उ मनई क अहइँ जउन चीजन क साफ साफ लिखि सकत ह।

१६ मइँ परमेस्सर स इ सँदेसा सुनेउँ ह।

मइँ गियान पाएँउ ह जउन सर्वोच्च परमेस्सर दिहेस ह

जेका सर्वसक्तीमान परमेस्सर दिहेस ह।

मइँ उ निहारेउँ ह।

मई दण्डवत कइके कहत हउँ जउन मई निहारेउँ ह।

१७ "मई लखत अहउँ कि यहोवा आवत बा, मुला अबहिं नाही।

मई ओकर अवाई लखत हउँ, मुला हाली नाही।

याकूब क परिवार स एक तारा आई।

इस्राएल क मनइयन मँ स एक नवा राजा आई।

उ राजा मोआबी मनइयन क मूँड खूँद देइ।

उ सेथ क सबहिं पूतन क मूँडन क चकना-चूर कइ देइ।

१८ इस्राएल ताकतवर होइ।

उ एदोम क राज्ज पाई।

उ आपन दुस्मन सेइर क राज्ज पाई।

१९ "उ याकूब क परिवार स सासन करब।

सहर मँ उ सबन लोगन क नास करी जउन जिअत बचा भवा बाटेन।"

२० तब बिलाम आपन अमालेकी मनइयन क लखेस अउ इ बातन क कहेस:

"सब रास्टरन मँ स अमालेकी सबन त जियादा बरिआर रहा।

मुला अमालेकी भी बरबाद कइ दीन्ह जाइ।"

२१ तब बिलाम केनित मनइयन क लखेस अउ ओसे इ सब बात किहेस:

"तू सबइ पतियात ह कि तोहार देस उहइ तरह सुरच्छित बा,

जइसे कउनो ऊँचे पहाड़े प एक चिरइया क झोझ।

२२ मुला तू कनित लोगो नस्ट होइ जाब्या जइसे यहोवा केन क नास किहेस ह।

अससूर तोहका बन्दी बनाइ लेइ।"

२३ तब बिलाम इ बतिया कहेस:

"कउनो मनई नाही जी सकत जब परमेस्सर अइसा करत ह।

२४ कित्तियन क घाट स जहाज अइहीं।

उ सबइ अससूर अउ एबर क हरइहीं।

मुला तब सब जहाज नस्ट कइ दीन्ह जइहीं।"

२५ तब बिलाम उठा अउ आपन घर लउटि गवा अउ बालाक भी आपन राहे चला गवा।

पेऑर मँ इस्राएल

२५ १ इस्राएल क लोग अबहिं सिक्तीम क इलाका मँ सिबिर डाए रहेन। उ समई इस्राएली मनसेधूनन मोआबी मेहररूनन क संग वेस्यावृत्ति करइ लागेन। २-३ मोआबी मेहररूनन मनसेधुअन क आवइ अउ आपन मिथ्य देवतन क भेंट चढ़ावइ मँ मदद करइ क न्यौतेन। इस्राएली लोगन हुवाँ भोजन किहन अउ देवतन क पूजन।

उ ठउरे प इस्राएल क लोग इ तरह लवार देवता-पोर क बाल क पूजा सुरु किहन। यहोवा इ लोगन प किरोध किहेस।

४ यहोवा मूसा स कहेस, "इ मनइयन क नेता लोगन क लिआवा। ओनका धूप मँ यहोवा क समन्वा लटकाइ द्या। तब यहोवा इस्राएल क मनइयन पन कोहाइ।"

५ तउ मूसा इस्राएल क जजन स कहेस, "तू पचन मँ स हर एक क आपन परिवार समूह मँ ओन लोगन क हेरिके निकारब अहइ जउन मनइयन क पेऑर क लवार देवता बाल क आराधना खातिर अगुअइ किहन ह। तब तोहका उ मनइयन क जरूर मारि डावइ चाही।"

६ उ समइ मूसा अउ सबहिं इस्राएल क नेतन मिलापवाला तम्बू क दुआरे प एक संग बटुरा रहेन। एक इस्राएली मनई एक मिद्यानी मेहरारू क आपन परिवारे मँ आपन घरे लिआवा। उ इ हुवाँ किहेस जहाँ ओका मूसा अउ सारे देवता लखि सकत रहेन। मूसा अउ नेतन मिलापवाला तम्बू क समन्वा रोवत रहेन। ७ याजक हारून क पोता अउ एलीआज़ार क पूत पीनहास एँका लखेन। एह बरे बइठक क तजि दिहस अउ आपन भाला उटाएस। ८ उ इस्राएली मनई क पाछे पाछे ओकरे तम्बू मँ गवा। तब उ इस्राएली मनसेधू अउ मिद्यानी मेहरारू क आपन भाला स मारि डाएस। उ तम्बू मँ आपन भाला क दुइनउँ क बदन स भोंकि के पार कइ दिहस। उ टेमँ इस्राएल क लोगन मँ एक बड़की बेरामी सँचरी रही। मुला जब पीनाहास इ दुइनउँ मनइयन क मारि डाएस तउ बेरामी रुकि गइ। ९ इ बेरामी स २४,००० मनई मरि गवा रहेन।

१० यहोवा मूसा स कहेस, ११ "याजक हारून क पोता अउ एलीआज़ार क पूत फिनहस इस्राएल क लोगन क मोरे किरोध स बचाइ लिहस। उ लोगन क बीच मँ मोर बरे व्यग्रसील रहा। एह बरे मई लोगन क आपन व्यग्रता मँ नाही मारब्या। १२ एह बरे फिनहम स कहा कि मई ओकरे संग एक सान्ति क करार करइ चाहत हउँ। १३ उ अउ ओकरे पाछे बंसे मँ जन्मा मोरे संग एक करार करिहीं। उ पचे सदा याजकन रइहीं। काहे की उ आपन परमेस्सर क सम्मान बरे व्यग्रसील रहा उ इस्राएल क लोगन क पाप बरे प्रायश्चित किहेस।"

१४ जउन इस्राएली मनई मिद्यानी मेहरारू क संग मारा गवा रहा ओकर नाउँ ज़िमिर रहा। उ साल क पूत रहा। उ सिमोन क परिवार समूह क नेता रहा। १५ अउर मिद्यानी मेहरारू क मारी गइ

रही ओकर नाउँ कोजबी रहा। उ जूर क बिटिया रही। उ अपने परिवार क मुखिया रहा। अउर उ मिद्यानी परिवार समूह क नेता रहा।

१६ यहोवा मूसा स कहेस, १७ “मिद्यानी लोग तोहार दुस्मन अहई। तोहका ओनका मारि डावइ चाही। १८ उ पचे पहिले ही तोहका आपन दुस्मन बनाइ लिहै अहई। उ पचे तोहका ललचाएस अउ तू आपन लबार देवतन क पोर मँ पूजवाया। उ पचे तोहमाँ स एक मनई क कोजबी क संग वेस्यावृत्ति क अपराध करइ बरे बहकाएस। उ मिद्यानी नेता क बिटिया रही। मुला इहइ मेहरारू तब मारी गइ जब इस्राएली लोगन मँ महामारी फइली। इ महामारी एह बरे सँचर गइ काहेकि लोगन क संग लबार देवता बाल-पेऑर क आराधना करइ बरे छल कीन्ह ग रहा।”

दूसर जन-गणना

२६ १ बड़की बेरामी क पाछे, यहोवा मूसा अउ हारून क पूत याजक एलीआज़ार स बात किहस। २ उ कहेस, “सबहिँ इस्राएली लोगन क गनती करा। हर एक परिवार क लखा अउ बीस बरिस या ओसे जियादा उमर क हर एक मनसेधू क गना जउन इस्राएल क फउज मँ सेवा करइ जोगग अहई।”

३ इ टेमँ लोग मोआब क मइदानन मँ सिबिर डाए रहेन। इ जारिको स लइके यरदन नदी क उस पार तलक बसा भवा रहा। एह बरे मूसा अउ याजक एलीआज़ार मनइयन स बात किहन। उ पचे कहेन, “तोहका बीस बरिस या ओसे जियादा उमर क हर एक मनसेधू क गनइ चाही। इहइ उ हुकुम रहा जउन यहोवा मूसा क मानइ बरे दिए रहा।”

हिआँ ओन इस्राएल क लोगन क सूची बाटइ जउन मिस्र स आए रहेन:

४ इ सबइ रूबेन परिवार क लोग रहेन। (रूबेन इस्राएल क पहिलौटी क पूत रहा) इ सबइ परिवार रहेन:

ह्नोक—ह्नोकी परिवार

पल्लू—पल्लियत परिवार

६ हेस्रोण—हेस्रोनी परिवार।

कर्मी—कर्मी परिवार।

७ रूबेन क परिवार समूह मँ उ सबइ परिवार रहेन।

जोड़ मँ सब ४३,७३० मनसेधू रहेन।

८ पल्लू क पूत एलीआब रहा। ९ एलीआब क तीन पुत्र रहेन—नमूएल, दातान अउ अबीराम। इ याद राखा कि दातान अउ अबीराम दुइ नेता

रहेन जउन मूसा अउ हारून क खिलाफ होइ गएन। उ पचे कोरह क मनवइया रहेन अउ कोरा यहोवा क बिरोधी होइ गवा। १० उहइ टेमँ रहा जब धरती फाटि गइ अउ कोरह अउर ओकरे सबहिँ मनवइयन क धरती लील लिहैस। सब २५० मनसेधू मरि गएन। इ इस्राएल क सब मनइयन बरे एक संकेत अउ चिताउनी रही। ११ मुला कोरह क परिवार क दूसर लोग नाहीं मरेन।

१२ सिमोन क परिवार समूह क इ परिवार रहेन।

नमूएल—नमूएल परिवार

यामीन—यामीन परिवार

याकीन—याकीन परिवार

१३ जेरह—जेराही परिवार

साऊल—साऊल परिवार।

१४ सिमोन क परिवार समूहन मँ उ सबइ परिवार रहेन। एहमाँ कुल २२,२०० मनसेधू रहेन।

१५ गाद क परिवार दलन मँ इ सबइ परिवार रहेन:

सपोन—सपोन परिवार

हाग्गी—हाग्गी परिवार

सुनी—सुनी परिवार

१६ ओजनी—ओजनी परिवार

एरी—एरी परिवार

१७ अरोद—अरोद परिवार

अरेली—अरेली परिवार

१८ गाद परिवार समूह क उ सबइ परिवार रहेन।

एहमँ कुल ४०,५०० मनसेधू रहेन।

१९-२० यहूदा परिवार समूह क इ सबइ परिवार रहेन:

सेला—सेलनी परिवार

पेरेस—पेरेस परिवार

जेरह—जेरह परिवार

(यहूदा क दुइ पूत एर अउ ओनान कनान मँ मर गए रहेन।)

२१ पेरेस क इ सबइ परिवार रहेन:

हेस्रोण—हेस्रोनी परिवार

हामूल—हामूल परिवार

२२ यहूदा क परिवार समूह क उ सबइ परिवार रहेन। एँके कुल मनसेधुअन क गनती ७६,५०० रही।

२३ इस्साकर क परिवार समूह क इ सबइ परिवार रहेन:

तोला—तोला परिवार

पुव्वा—पुव्वा परिवार

२४ यासूब—यासूब परिवार

सिम्रोण—सिम्रोण परिवार

२५ इस्साकार परिवार समूह क इ सबइ परिवार रहेन । एहमाँ कुल मनसेधुअन क गनती ६४,३०० रही ।

२६ जबूलून क परिवार समूह क इ सबइ परिवार रहेन:

सेरेद—सेरेद परिवार

एलोन—एलोन परिवार

यहलेल—यहलेल परिवार

२७ जबूलून क परिवार समूह क उ सबइ परिवार रहेन । एहमाँ कुल मनसेधुअन क गनती ६०,५०० रही ।

२८ यूसुफ क दुइ पूत मनस्से अउ एप्रैम रहेन । हर एक पूत आपन परिवार क संग परिवार समूह बन गवा । २९ मनस्से क परिवार मँ इ सबइ रहेन:

माकीर—माकीर परिवार । (माकीर गिलाद क बाप रहा ।)

गिलाद—गिलाद परिवार

३० गिलाद क परिवार क इ सबइ रहेन:

ईएजेर—ईएजेर परिवार

हेलेक—हेलेकी परिवार

३१ अस्रीएल—अस्रीएली परिवार

सेकेम—सेकेमी परिवार

३२ समीदा—समीदा परिवार

हेपेर—हेपेरी परिवार

३३ हेपेर क पूत सलोफाद रहा । मुला ओकर कउनो पूत नाहीं रहा । सिरिफ बिटिया रही । ओकरी बिटियन क नाउँ महला, नोआ, होगला, मिल्का अउ तिसाँ रहेन ।

३४ मनस्से परिवार समूह क इ सबइ परिवार रहेन । एहमाँ कुल मनसेधुअन ५२,७०० रहेन ।

३५ एप्रैम क परिवार समूह क इ सबइ परिवार रहेन:

सूतेलह—सूतेलही परिवार

बेकरे—बेकरी परिवार

तहन—तहनी परिवार

३६ एरान सुतेलह परिवार क रहा । ओकर परिवार एरनी रहा ।

३७ एप्रैम क परिवार समूह मँ उ सबइ परिवार रहेन । कुल मनसेधुअन क गनती ३२,५०० रही । उ पचे अइसे सब लोग रहेन जउन जौसेफ क परिवार समूह क रहेन ।

३८ बिन्ध्यामीन क परिवार समूह क परिवार इ सबइ रहेन:

बेला—बेला परिवार

असबेल—असबेली परिवार

अहीरम—अहीरमी परिवार

३९ सपूपाम—सपूपाम परिवार

हूपाम—हूपामी परिवार

४० बेला क परिवार मँ इ सबइ रहेन:

अर्द—अर्दा परिवार

नामान—नामानी परिवार

४१ बिन्ध्यामीन क परिवार समूह क इ सबइ परिवार रहेन । एहमाँ मनइयन क कुल गनती ४५,६०० रही ।

४२ दान क परिवार समूह मँ इ सबइ परिवार रहेन: सूहाम—सूहामी परिवार समूह ।

दान क परिवार समूह स उ परिवार समूह रहा ।

४३ सुहमीत परिवार-दल मँ बहोत स परिवार रहेन । एहमाँ मनसेधुअन क गनती ६४,४०० रही ।

४४ आसेर क परिवार समूह क इ सबइ परिवार रहेन:

यिम्ना—यिम्नी परिवार

यिसर—यसरी परिवार बरीआ-बरीआ परिवार ।

४५ बरीआ क इ सबइ परिवार अहडँ :

हेबेर—हेबेरी परिवार

मल्कीएल—मल्कीएली परिवार ।

४६ (आसेर क एक बिटिया सेरा नाउँ क रही ।)

४७ आसेर क परिवार समूह मँ उ सबइ परिवार रहेन । एहमाँ मनसेधुअन क गनती ५३,४०० रही ।

४८ नेपताली क परिवार समूह क इ सबइ परिवार रहेन:

यहसेल—यहसेली परिवार

गूनी—गुनी परिवार

४९ येसेर—येसेरी परिवार

सिल्लेम—सिल्लेमी परिवार

५० नेपताली क परिवार समूह क उ सबइ परिवार रहेन । एहमाँ मनसेधुअन क कुल गनती ४५,४०० रही ।

५१ इ तरह इस्राएल क कुल मनसेधुअन क गनती ६,०९,७३० रही ।

५२ यहोवा मूसा स कहेस, ५३ “हर एक परिवार क धरती दीन्ह जाइ । इ उहइ प्रदेस अहइ जेकरे बरे मइ बचन दिहेउँ ह । हर एक परिवार समूह ओन मनइयन बरे ढेर क धरती पाइ जइहीं जेनका गना गवा । ५४ बड़कवा परिवार समूह जियादा भुइयाँ पाई अउ छोटा परिवार समूह कमती भुइयाँ पाई । मुला हर एक परिवार समूह क भुइयाँ मिली, जेकरे बरे मइ बचन दिहेउँ ह । अउर जउन भुइयाँ क उ पचे पइहीं । उ ओनके गनी भइ गनती क बराबर होइ । ५५ हर एक परिवार समूह क पाँसा डाइ के आधार प तय कइके धरती दीन्ह जाइ । अउर उ पहाँटा क उहइ नाउँ होइ जउन उ परिवार समूह

क होइ। ५६ उ पहुँटा जेका मइँ लोगन क देइ क बचन दिहेउँ ह, ओकरे बपोती मँ होइ। इ बड़के अउ छोटेके परिवार समूह क दीन्ह जाइ। तय करइ बरे तोहका पाँसा फेंकइ क होइ।”

५७ लेवी क परिवार समूह भी गना गवा। लेवी क परिवार समूह क इ परिवार अहई :

गेसॉन—गेसॉन परिवार

कहात—कहात परिवार

मरारी—मरारी परिवार

५८ लेवी क परिवार समूह स इ भी परिवार रहेन:

लिब्नी परिवार

हेब्रानी परिवार

महली परिवार

मुसी परिवार कहात परिवार

अम्राम कहात क परिवार समूह क रहा।

५९ अम्राम क मेहरारु क नाउँ योकेबेद रहा। उ भी लेवी क परिवार समूह क रही। ओकर जन्म मिस्र मँ भवा रहा। अम्रान अउ याकेबेद क पूत हारून अउ मूसा रहेन। ओनकइ एक बिटिया मिरियम भी रही।

६० हारून नादाब, अबीहू, एलीआज़ार अउ इतामार क बाप रहा। ६१ मुला नादाब अउ अबीहू मर गएन। काहे की उ पचे यहोवा क उ आगी स भेंट चढ़ाएन जउन ओनके बरे ओनकइ अधिकार नाही रहा।

६२ लेवी परिवार समूह क सबहिँ मनइयन क गनती २३,००० रही। मुला इ सबइ इस्राएल क दूसर लोगन क संग नाही गना गएन उ धरती नाही पाइ सकेन जेका दूसर लोगन क देइ क बचन यहोवा दिहे रहा।

६३ मूसा अउ याजक एलीआज़ार इ सबहिँ मनइयन क गनेन। उ पचे इस्राएल क लोगन क मोआब क मइदान मँ गनेन। इ यरीहो स यर्दन नदी क पार रहा। ६४ बहोत टेमँ पहिले मूसा अउ याजक हारून इस्राएल क मनइयन क रेगिस्तान, मँ गने रहेन। मुला उ सबइ लोग मरि गवा रहेन। मोआब क मइदान मँ मूसा जउन लोगन क गनेन। उ पचे पहिले गना गए भए मनइयन स अलग रहेन। ६५ इ एहू बरे भवा कि यहोवा इस्राएल क लोगन स इ कहे रहा कि उ सबइ रेगिस्तान मँ मरिही। ओकर मारइ क पाछे जउन सिरिफ दुइ बचा रहेन उ यपुन्ने क पूत कालेब अउ नून क पूत यहोसू रहेन।

सलोफाद क बिटियन

२७ १ सलोफाद हेपेर क पूत रहा। हेपेर गिलाद क पूत रहा। गिलाद माकीर क पूत रहा। माकीर मनस्से यूसुफ क पूत रहा। सलोफाद क पाँच बिटियन रहिन। ओनकइ नाउँ महला, नोवा, होगला, मिल्का अउ तिसाँ रहा। २ इ पाँचउ मेहररुअन मिलापवाला तम्बू मँ गइन अउ मूसा याजक एलीआज़ार, नेता लोग अउ एक संग बटुरे मनइयन ओनका लखेन।

पाँचउ बिटियन कहेन, ३ “हमार बाप उ सबइ मरि गएन जब हम पचे रेगिस्तान मँ जात्रा करत रहिन। ओकर मउत ओकर पाप बरे भइ। उ ओन मनइयन मँ नाही रहा जउन कोरह क दल मँ मिलि गवा। (कोरह उहइ रहा जउन यहोवा क खिलाफ होइ गवा रहा।) हमरे बाप क कउनो बेटवा नाही रहा। ४ एँकर इ अरथ भवा कि हमरे बाप क नाउँ न चली। इ ठीक नाही कि हमरे पिता क नाउँ नाही चलइ। ओकर नाउँ मेट जाइ काहे की ओकरे कउनो पूत नाही अहइ। एहू बरे हम पचे माँग करित ह कि हमका कछू भुइयाँ उ भुइयाँ क अलवा दीन्ह जाइ जेका हमरे पिता क भाई लोग उत्तराधिकार क रूप मँ पइही।”

५ एहू बरे मूसा यहोवा स पूछेस कि उ का करइ। ६ यहोवा ओसे कहेस, ७ “सलोफाद क बिटियन फुरे कहत हीं। तोहका ओनके चाचा क संग संग ओनका भी धरती क हीँसा देइ चाही, जउन तू ओनके बाप क देत्या।

८ “एहू बरे इस्राएल क मनइयन बरे एँका कनून बनइ द्या : ‘जदि कउनो मनई क पूत न होइ अउर उ मरि जात ह तउ हर एक चीज ओकर बाटइ ओकरे बिटिया क होइ। ९ जदि ओका कउनो बिटिया न होइ तउ जउन कछू भी होइ ओकरे भइयन क दीन्ह जाइ। १० जदि ओकर कउनो भाई न होइ तउ जउन कछू ओकर होइ ओकरे पिता क भाइयन क दीन्ह जाइ। ११ अगर ओकरे बाप क कउनो भाई न होइ तउ जउन कछू ओकर होइ ओकरे परिवार क सबन न निचेक क नातेदाद क दीन्ह जाइ। इस्राएल क लोगन मँ इ कनून होइ चाही। यहोवा मूसा क इ हुकुम देत ह।”

यहोसू नवा नेता अहइ

१२ तब यहोवा मूसा स कहेस, “उ पहाड़न क कतारन मँ एक क ऊपर चढ़ा जउन यरदन नदी क पूरब रेगिस्ताने मँ बा। तउ धरती क निहरब्या जेका मइँ इस्राएल क मनइयन क देत अही।

१३ जब तू इ पहुँटा क लखि लेब्या तब तू आपन भाई हारून क तरह मरि जाब्या। १४ उ बात क सुमिरा जब लोग सीन क रेगिस्तान में पानी बरे कोहान रहेन। तू अउ हारून दुइन उँ मोर हुकुमबदली किहा ह। तू पचे मोर मान नाही किहा अउ मनइयन क अगवा पवित्तर नाही बनाया रहा।” (इ पानी जिन क रेगिस्तान में कादेस क भीतर मरीवा में रहा।)

१४ मूसा यहोवा स कहेस, १६ “यहोवा परमेस्सर अहइ। उहइ जानत ह कि लोग का सोचत अहइ। यहोवा मोर बिनती अहइ कि तू इ मनइयन बरे एक नेता चुना। १७ मई बिनती करत हउँ कि यहोवा एक अइसा नेता चुनी जउन ओनका इ प्रदेश स बाहर लइ जाइ अउर ओनका नवा पहुँटा में पहुँचाई। तब यहोवा क लोग बे गइरिया क भेड़ी क नाई न होइहीं।”

१५ एह बरे यहोवा मूसा स कहेस, “नून क पूत यहोसू नेता होइ। यहोसू बहोत बुद्धिमान अहइ। ओवा नवा नेता बनावा। १९ ओसे याजक एलीआज़ार अउ पूरा धामिकं मण्डली क समन्वा खड़ा होइ क कहा। तब ओका सबहि लोगन क समन्वा नवा नेता बनावा।

२० “मनइयन क इ देखौवा कि तू ओका नेता बनावत अहा, तब सबहि ओकर हुकुम मनिहीं। २१ जदि यहोसू कउनो खास निर्णम लेइ चाही तउ ओका याजक एलीआज़ार क लगे जाइ क होइ। एलीआज़ार उरिम क प्रयोग यहोवा क जवाब जानइ बरे करी। तब यहोसू अउ इस्राएल क सब लोग उ करिहीं जउन परमेस्सर कइहीं। जदि परमेस्सर कहत ह ‘बाहर जा।’ तब उ पचे ओनका बाहर लइ जाइ, अउर अगर उ कहत ह, ‘घरे प अराम करा।’ तउ उ पचे घर में आराम करिहीं।”

२२ मूसा यहोवा क आग्या मानेस। मूसा यहोसू याजक एलीआज़ार अउ इस्राएल क सब लोगन क समन्वा खड़ा होइके कहेस। २३ तब मूसा आपन हाथे क ओकरे मूँडे प देखौवइ बरे धरेस कि उ नवा नेता अहइ। उ वइसे ही किहेस जइसा यहोवा कहे रहा।

रोज क भेंट

२८ १ तब यहोवा मूसा स बात किहेस। उ कहेस, २ “इस्राएल क मनइयन क इ हुकुम द्या। ओनसे कहा कि उ पचे मोर बलिदानन अउर अन्नबलि क भोजन जेकर सुगन्ध मोका प्रसन्न करत हीं क भेंट बारी गइ भेंट दुआरा चढ़ावई। इ निहित करे कि ओका उचित समइ मँ भेंट करइ चाही। ३ इ होमबलि क ओनका यहोवा

बरे चढ़ावइ चाही। ओनका दोख क बिना एक बरिस का दुइ ठु मेमना रोज भेंट क रूप मँ चढ़ावइ चाही। ४ मेमनन मँ स एक क भिन्सारे चढ़ावा अउ दूसर मेमना क सयांस्त क टेमं। ५ एँकरे अलावा एपा क दसवाँ हींसा अन्नबलि हीन क चौथाई जइतून क तेल क संग मिला भवा आटा क द्या।” ६ (इ रोज क होम बलि अहइ जउन सीनै पहाइ प प्रथम दाईं सरू किहे गवा रहेन। इ बारी गइ भेंट रही जउन यहोवा बरे सुहावना सुगन्ध अहइ।) ७ “मनइयन क बारी गइ भेंट क संग पयेबलि करइ चाही। ओनका हर एक भेड़ क संग हीन क एक चौथाई दाखरस देइ चाही। उ पयेबलि क पवित्तर ठउरे मँ वेदी प डावा। इ यहोवा क भेंट अहइ। ८ दूसरे भेड़ा क भेंट गोधूरि क टेमं चढ़ावा। एँका भिन्सारे क भेंट क तरह चढ़ावा। अन्नबलि अउ दाखरस क एक ही तरीका स भेंट करिहीं। इ बारी गइ भेंट रही जउन यहोवा बरे सुहावना सुगन्ध अहइ।

सबित भेंट

९ “सबित क दिन एक बरिस क बेदोखे क दुइ मेमना जइतून क तेल क संग मिला एपा क दुइ दसवाँ हींसा बढ़िया आटा क अन्नबलि अउ पयेबलि अउ दाखरस भी चढ़ावा। १० इ हरेक सबित क दिन क खास भेंट अहइ। इ भेंट रोजाना राजे क भेंट अउ दाखरस क भेंट क अलावा अहइ।”

नवा चन्द्रमा क भेंट

११ “हर एक महीना क पहिले दिन तू यहोवा क होमबलि चढ़उब्या। इ भेंट बेदोखे क दुइ बर्धा, एक भेड़ा अउ एक बरिस क सात मेमना होइ। १२ हर एक बर्धा क संग जइतून क तेल क संग जेहमा एपा क तीन दसवाँ हींसा बढ़िया आटा क भेंट भी चढ़ावा। हर एक भेड़ा क संग जइतून क तेल क संग मिला एपा क दुइ दसवाँ हींसा बढ़िया आटा क भेंट भी चढ़ावा। १३ हर एक भेड़ क बच्चा क संग जइतून क तेल क संग मिला भवा एपा क दसवाँ हींसा बढ़िया आटा क भेंट भी चढ़ावा। इ होमबलि अहइ जे आगी मँ तइयार भवा अहइ इ यहोवा बरे सुहावना सुगन्ध अहइ। १४ पयेबलि मँ आधा हीन दाखरस हर एक बर्धा क संग, तिहाई हीन दाखरस हर एक भेड़ा क संग अउ चौथाई हीन दाखरस हर एक मेमना क संग होइ चाही। इ होमबलि अहइ जउन बरिस क हर एक महीना चढ़ावइ जाइ चाही। १५ हमेसा रोजाना क

होमबलि अउ पयेबलि क अलावा तोहका यहोवा क एक बोकरा देइ चाही। उ बोकरा पापबलि होइ।

फसह त्यौहार

१६ “पहले महीना नीसान क चउदहवाँ दिन यहोवा क सम्मान में फसह पर्व होइ। १७ उ महीना क पन्द्रहवाँ दिन बे खमीरे क रोटी क दावत सुरु होत ह। इ पवित्तर जलसा सात दिनाँ तलक रहत ह। तू सिरिफ उहइ रोटी खाइ जउन बे खमीरे क होइ। १८ इ पवित्तर जलसा क पहिले दिन तोहका खास बइठक बोलावइ चाही। उ दिन तोहका कउनो काम नाहीं करइ चाही। १९ तू यहोवा क होमबलि देब्या। इ होमबलि दोख क बिना दुइ बर्धा, एक ठु भेड़ा अउ एक बरिस क सात ठु मेमना होइ। २०-२१ हर एक बर्धा क साथ जइतून क तेल क साथ साना भवा एपा क तीन दसवाँ हीसा बढिया आटा, भेड़ा क संग जइतून क तेल क संग साना भवा एपा क दुइ दसवाँ हीसा बढिया आटा अउर हर एक मेमना क संग एपा क दसवाँ हीसा जइतून क तेल क संग साना भवा बढिया आटा क अन्नबलि भी होइ। २२ तोहका एक बोकरा भी देइ चाही। उ बोकरा तोहरे बरे पापबलि होइ। इ तोहरे पाप क ढाँपि देइ। २३ तू पचन क ओन भेंटन क अलावा देइ चाही जउन तू हर एक भिन्सारे होमबलि क रूप में देत रहत ह।

२४ “उहइ तरह तोहका सात दिनाँ तलक बलि भेंट देइ चाही। इ आगी क दुआरा होमबलि क रूप में अन्न भेंटन होइ। इ यहोवा बरे सुहावना सुगन्ध अहइ। तू नेम स होमबलि अउ एकर दाखरस भेंट चढ़उब्या। एकरे अलावा तू भोजन चढ़उब्या। होमबलि क अलावा इ भेंट क तोहका देइ चाही जउन तू रोज देत ह।

२५ “तब फसह क सतएँ दिन तू एक पवित्तर सभा बुलाउब्या, अउर उ दिन तू कउनो काम नाहीं करब्या।

हफता क त्यौहार (पिन्तेकुस्त)

२६ “पहिले फल क उत्सव क अवसर पइ तोहका यहोवा क एक नवा अनाज क भेंट जरूर देइ चाही। उ टेमें प तोहका एक खास बइठक बोलावइ चाही। तू उ दिन कउनो काम नाहीं करब्या। २७ तू पचे होमबलि चढ़उब्या। उ बलि यहोवा बरे सुहावानी सुगन्ध होइ। तू सबइ बे दोखे क दुइ साँड़, एक-एक बरिस क भेड़ा अउ सात मेमना क भेंट चढ़उब्या। २८ तू हर एक साँड़ क संग जइतून क तेल क संग

साना भवा एपा क तीन दसवाँ हीसा बढिया आटा, हर एक भेड़ा क संग एपा क दुइ दसवाँ हीसा २९ अउ हर एक मेमना क संग एपा क दसवाँ हीसा आटा क भेंट चढ़उब्या। ३० तोहका आपन पापे क ढाँपइ बरे एक ठु बैकरा क बलि चढ़ावइ चाही। ३१ तोहका इ भेंट रोजाना क दग्ध-भेंट अउ एकर अन्नबलि क अलावा चढ़ावइ चाही। ठान ल्या कि गोरुअन में कउनो दोख नाहीं हो। अउर इ निहचय करि ल्या कि पयेबलि ठीक बाटइ।

तुरहियन क त्यौहार

२९ “सातवाँ महीना क पहिले दिन एक खास बइठक होइ। तू सबइ उ दिन कउनो काम नाहीं करब्या। उ तुरही बजावइ क दिन अहइ। २ तू पचे होमबलि चढ़उब्या। इ भेंटन यहोवा बरे सुहावनी सुगन्ध होइ। तू बेदोखे क एक साँड़ एक भेड़ा अउ एक-एक बरिस क सात मेमना चढ़उब्या। ३ तू पचे एपा क तीन दसवाँ हीसा तेल स सना भवा नीक आटा हरेक बर्धा क संग, अउ एपा क दुइ दसवाँ हीसा भेड़ा क संग चढ़ाउब्या। ४ सात मेमना में स हरेक क संग एपा क दसवाँ हीसा आटा क भेंट चढ़उब्या। ५ एकरे अलावा पापबलि बरे एक बोकरा भी चढ़उब्या। इ तोहरे पापे क ढाँपी। ६ इ भेंटन नवा चन्द्रमा भेंट अउ ओकरे अन्नबलि क अलावा होइ। अउर इ रोज क भेंट, एकर अन्नबलि अउ पयेबलि क अलावा होइहीं। इ नेम क मुताबिक कीन्ह जाइ चाही। एनका आगी बारइ चाही। इ यहोवा क बरे सुहावनी सुगन्ध होइ।

प्रायश्चित्त क दिन

७ “सतएँ महीना क दसवाँ दिन एक खास बइठक होइ। उ दिन तू उपवास रखब्या अउर तू कउनो काम नाहीं करब्या। ८ तू होमबलि भेंट करब्या। इ यहोवा बरे सुहावनी गन्ध होइ। तू बे दोखे क एक ठु साँड़ एक ठु भेड़ा अउ एक बरिस क सात मेमना भेंट चढ़उब्या। ९ हर एक बर्धा क संग जइतून क तेले स साना भवा एपा क तीन दसवाँ हीसा आटा, भेड़न क संग एपा क दुइ दसवाँ हीसा आटा। १० अउ हर एक सातहु मेमना क संग एपा क दसवाँ हीसा आटा क भेंट चढ़उब्या। ११ तू एक बोकरा भी पापबलि क अलावा भेंट करब्या। इ पाप बरे प्रायश्चित्त क अतिरिक्त होइ। इ रोजाना क बलि, अन्नबलि अउ पयेबलि क अलावा भी होइ।

कुटीर क त्यौहार

१२ “सतएँ महीना क पन्द्रहवाँ दिन एक खास बइठक होइ। इ कुटीर क त्यौहार होइ। तू उ दिना कउनो काम नाही करब्या। तू यहोवा बरे खास छुट्टी सात दिना तलक मनउब्या।^{१३} तू होमबलि चढ़उब्या। इ यहोवा बरे सुहावनी सुगन्ध होइ। तू तेरह बर्धा, दुइ भेड़ा अउ एक बरिस क चउदह मेमना चढ़उब्या।^{१४} तू तेरह बर्धा मैं स हर एक बरे जइतून क तेल क संग साना भवा एपा क तीन दसवाँ हीसा आटा, दुइनउँ भेड़न मैं स हर एक बरे एपा क दुइ दसवाँ हीसा^{१५} अउ चउदह भेड़न मैं स हर एक बरे एपा क दसवाँ हीसा आटा क भेंट चढ़उब्या।^{१६} तोहका एक ठु बोकरा भी पाप भेंट क रूप मैं अर्पित करइ चाही। इ रोजाना क भेंट अउ एकर अनाज अउ दाखरस भेंट क अलावा होइ।

१७ “इ पवित्तर दिन क दूसरे दिन तोहका बारह बर्धा, दुइ भेड़ा अउ चउदह एक बरिस क मेमना चढ़ावइ चाही। इ सबइ बिना दोख क होइ चाही।^{१८} तोहका साँड़, भेड़ा अउ मेमना क संग गनती क मुताबिक तउले मैं अन्नबलि अउ पयेबलि भी चढ़ावइ चाही।^{१९} तोहका पापबलि क रूप मैं एक ठु बोकरा क भी भेंट चढ़ावइ चाही। इ रोजाना क भेंट अउ अन्न अउ पयेबलि क अलावा भेंट होइ।

२० “इ पवित्तर दिन क तीसर दिन तोहका बे दोखे क गियारह साँड़, दुइ भेड़ा अउ एक-एक बरिस क मेमना क भेंट चढ़ावइ चाही।^{२१} तोहका बर्धा, भेड़ा अउ मेमना क ठीक गनती क मुताबिक अन्न अउ पयेबलि चढ़ावइ चाही।^{२२} तोहका पापबलि क रूप मैं एक बोकरा क भी देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

२३ “इ पवित्तर दिन क चउथा दिन तोहका बे दोखि क दस साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही।^{२४} तोहका बर्धा, भेड़ा अउ मेमना क ठीक सख्याँ क मुताबिक अन्न अउ पयेबलि चढ़ावइ चाही।^{२५} तोहका पापबलि क रूप मैं एक बोकरा क भी चढ़ावइ चाही। इ रोजाना क भेंट अउ अन्नबलि अउ पयेबलि क अलावा होइ चाही।

२६ “इ पवित्तर दिन क पँचएँ दिन तोहका बेदोख क नौ साँड़, दुइ भेड़ा अउ एक-एक बरिस क चउदह मेमना भेंट चढ़ावइ चाही। इ सबइ बेदोख होइ चाही।^{२७} तोहका बर्धा, भेड़ा अउ मेमना क ठीक संख्याँ क मुताबिक अन्न अउ पयेबलि चढ़ावइ चाही।^{२८} तोहका पापबलि क रूप मैं एक बोकरा

क भी भेंट चढ़ावइ चाही। इ रोजाना क भेंट अउ अन्नबलि अउ पयेबलि क अलावा होइ चाही।

२९ “इ पवित्तर दिन क छठएँ दिन तोहका बे दोखे क चउदह साँड़, दुइ भेड़ा अउ एक-एक बरिस क चउदह मेमना क भेंट चढ़ावइ चाही।^{३०} तोहका बर्धा, भेड़ा अउ मेमना क संग जेतना होइ चाही उ मात्रा मैं अन्न अउ पयेबलि चढ़ावइ चाही।^{३१} तोहका पापबलि क रूप मैं एक बोकराँ क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ।

३२ “इ पवित्तर दिन क सतएँ दिन तोहका बेदोख क सात साँड़, दुइ भेड़ा, अउ एक-एक बरिस क चउदह मेमना क भेंट चढ़ावइ चाही।^{३३} तोहका बर्धा, भेड़ा अउ मेमना क संग गनी भइ गनती मैं अन्न अउ पयेबलि चढ़ावइ चाही।^{३४} तोहका पापबलि क रूप मैं एक बोकरा क भी भेंट देइ चाही। इ रोजाना क भेंट अउ अन्नबलि तथा पयेबलि क अलावा भेंट होइ।

३५ “इ पवित्तर दिन क अठवाँ दिन तोहका एक समापन बइठक करइ चाही। तोहका उ दिन कउनो काम नाही करइ चाही।^{३६} तू होमबलि अउ आगी क भेंट चढ़ावा। इ यहोवा बरे सुहावनी सुगंध होइ। तोहका बेदोखे क एक साँड़, एक भेड़ा अउ एक एक बरिस क सात मेमना भेंट मैं चढ़ावइ चाही।^{३७} तोहका साँड़, भेड़ा अउ भेड़ी क बच्चा बरे गनी भइ मात्रा मैं अन्न अउ पयेबलि देइ चाही।^{३८} तोहका पापबलि क रूप मैं एक बोकरा क भी भेंट देइ चाही। इ रोजाना क भेंट अउ अन्नबलि अउ पयेबलि क अलावा भेंट होइ चाही।

३९ “उ सबइ तोहार खास दिन यहोवा क सम्मान बरे अहइ। तोहका एपा क दसवाँ हीसा ओन बचन भेंट, आपन स्वेच्छा भेंट, होमबलि, अन्नबलि, पयेबलि अउ मेलबलि क अलावा इ पवितर दिनन म मानइ चाही।”

४० मूसा इस्राएल क लोगन स ओन सबहिं बातन क कहेस जउन यहोवा ओका हुकुम दिहे रहा।

दीन्ह गवा खास बचन

३० ? मूसा सबहिं इस्राएली परिवार समूहन क नेता लोगन स बात किहेस। मूसा यहोवा क इ आदेस क बारे मैं ओनसे कहेस।

२ “अगर कउनो मनई परमेस्सर क खास बचन देइ चाहत ह या जदि उ मनई परमेस्सर क कछु खास न्यौछावर करइ क बचन देत ह तउ ओका

वइसे ही करइ द्या। मुला ओन मनई क ठीक वइसेन ही करइ चाही जइसा उ बचन दिहे अहइ।

३ “होइ सकत ही कि कउनो जवान मेहरारू आपन पिता क घर रहत होइ जउन जवान अहइ। अउ उ मेहरारू यहोवा क कछू चढ़ावइ क बचन देत होइ। ४ अउ ओकर बाप इ बचन क बारे मँ सुनत ह अउ ओकर बरे (बचन क रद्द करइ बरे) कछू नाही कहत ह तउ उ जवान मेहरारू क बचन तउ जरूर पूरा कइ देइ चाही जेका करइ क उ बचन दिहे अहइ। ५ मुला अगर ओकर बाप ओकर दीन्ह गवा बचन क बारे मँ सुनिके ओका पूरा करइ स मना करत ह तउ उ मेहरारू क उ बचन पूरा नाही करइ चाही जेका उ बचन लिहेस ह। काहेकि ओकर बाप ओका रोकेस। एह बरे यहोवा ओका छिमा करिही।

६ “होइ सकत ह कि कउनो मेहरारू बात ही बातन मँ बे सोचे बिचारे कउनो किरिया खाइ लेत ह अउ पाछे ओकर बियाह होइ जात ह। ७ अउ भतार दीन्ह गवा बचन क बारे मँ सुनत ह अउ अउ ओकर (बचन क रद्द करइ) बरे कछू नाही कहत ह। तउ उ मेहरारू क आपन दीन्ह गवा बचन क मुताबिक काम क पूरा कइ लेइ चाही। ८ मुला जदि भतार दीन्ह गवा बचन क बारे मँ सुनत ह अउ ओका अंगीकार नाही करत ह तउ मेहरारू क दीन्ह गवा बचन क पूरा नाही करइ क पड़ी। ओकर भतार ओकर बचन रोकि दिहन-उ ओका कही गइ बात क पूरा नाही करइ दिहस। एह बरे यहोवा ओका छिमा करिही।

९ “कउनो रौंइ या तलाक दीन्ह गइ मेहरारू खास बचन दइ सकत ह। अगर उ अइसा करत ह तउ ओका आपन ठीक बचन क मुताबिक करइ चाही।

१० “एक बियाही मेहरारू यहोवा क कछू चढ़ावइ क बचन, या कछू स अपने आप क बचाइ क बचन दइ सकत ह। ११ अदि ओकर भतार दीन्ह गए बचन क बारे मँ सुनत ह अउ ओका आपन बचन क पूरा करइ देत ह तउ ओका ठीक आपन दीन्ह गए बचनन क मुताबिक ही उ काम करइ चाही। १२ मुला अगर ओकर भतार ओकर दीन्ह गए बचन क सुनत ह अउ ओका बचन पूरा करइ स मना कइ देत ह तउ ओका आपन दीन्ह गए बचन क मुताबिक उ काम पूरा नाही करइ क होइ। एकर कउनो महत्व न होइ काहे की उ का बचन दिहे रहा, ओकर भतार उ बचन क भगं कइ सकत ह। अगर ओकर भतार उ बचन क तोड़ देत ह तउ यहोवा ओका छिमा करिही। १३ एक बियाही

मेहरारू यहोवा या परमेस्सर क कउनो खास बचन दइ सकत ह। भतार ओकरे बचन मँ स कउनो क रोक सकत ह या भतार उ बचन मँ स कउनो क पूरा करइ देइ सकत ह। १४ भतार आपन मेहरारू क कइसे बचन पूरा करइ देइ? अगर उ दीन्ह ग बचन क बारे मँ सुनत ह अउ ओनका रोकत नाही तउ मेहरारू क आपन दीन्ह ग बचन क मुताबिक काम क पूरा करइ चाही। १५ अगर भतार दीन्ह ग बचन क बारे मँ सुनत ह अउ ओकर पाछे ओका बचन पूरा करइ स रोकत ह तउ ओकर बचन तोड़इ क जिम्मेदारी भतार प होइ।”

१६ इ सबइ हुकुम अहइ जेनका परमेस्सर मूसा क दिहेस। इ सब आदेस एक मनई अउ ओकरे मेहरारू क बारे मँ अहइ अउ बाप अउ ओकरे विटिया क बारे मँ अहइ जउन उ जवान मेहरारू रहइ अउ अपने बाप क घरे मँ रहत होइ।

इस्राएल मिदियनन क
खिलाफ फुन हमला किहेस

३१ १ यहोवा मूसा स बात किहेस। उ कहेस,
२ “मइँ इस्राएल क लोगन क संग मिद्यानी लोग जउन किहे बाटइँ, ओकरे बरे मइँ सजा देब।” ओकरे पाछे मूसा तू मरि जाब्या।”

३ एह बरे मूसा मनइयन स बात किहेस। उ कहेस, “आपन कछू मनइयन क जुद्ध बरे तइयार करा। यहोवा ओन मनइयन क प्रयोग मिदियानी लोगन क सजा देइ मँ करिही। ४ अइसे १,००० मनइयन क इस्राएल क परिवार समूहन स चुना। ५ इस्राएल क सर्बहि परिवार समूहन स १२,००० सिपाही होइहीं।”

६ मूसा ओन १२,००० मनइयन क जुद्ध बरे पठाएस। उ याजक एलीआज़ार क पूत पनीहास क ओनके संग पठाएस। पनीहास आपन संग पवित्तर चीजन, सीगं अउ तुरहियन लइ लिहेस। ७ इस्राएल क लोग मिदियानी लोगन क नरसिंग वइसेन ही लइने जइसा यहोवा मूसा क हुकुम दिहे रहा। उ पचे सर्बहि मिद्यानी मनइयन क मारि डाएन। ८ जउन मनइयन क उ पचे मारि डाएन ओहमाँ एवी, रकैम, सूर, हूर अउ रेबा इ सबइ पाँच मिद्यानी राजा रहेन। उ पचे बेआँर क पूत बिलाम क भी तरवारे स मारि डाएस।

९ इस्राएल क लोग मिद्यानी मेहरारूअन अउ गदेलन, ओनकइ सब भेड़ी, गइयन अउ सब चीजन क बन्दी बनाइ लिहन। १० तब उ पचे ओनके सब डेरन मँ अउ सहरन मँ आगी लगाइ दिहन जहाँ उ पचे रहत रहेन। ११ उ पचे सब मनइयन

अउ गोरुअन क लइ लिहन, ^{१२} अउर ओनका मूसा, याजक एलीआज़ार अउ इस्राएल क सब लोगन क लगे लइ गएन । उ पचे ओन सबहिं इस्राएल क सिबिर मँ लाएन जेनका उ पचे हुवाँ पाइ लिहन । इस्राएल क लोग मोआब क समतल मँ बसा यरदन घाटी मँ सिबिर डाए रहेन । इ यरीहो क निचके यरदन नदी क पूरब कईती रहा । ^{१३} तब मूसा, याजक एलीआज़ार अउ मनइयन क नेता, सिपाहियन स मिलइ बरे डेरन स बाहेर गएन ।

^{१४} मूसा सेनापति लोगन प बहोत कोहान रहा । उ ओन १,००० क फउज क संचालक लोगन अउ एक सौ क फउज क संचालक लोगन प कोहान रहा जउन जुद्ध स लौटिके आए रहेन । ^{१५} मूसा ओनसे कहेस, “तू आदमी लोग मेहररुअन क काहे जिअत रहइ दिहा ? ^{१६} लखा इ अउरत ही रही जेकरे वजह स बिलाम क घरना मँ इस्राएलियन बरे समस्या पइदा भइन अउ पेऑर मँ यहोवा क खिलाफ होइ गएन जेहसे इस्राएल क मनइयन क महामारी भोगइ क पड़ी । ^{१७} तउ अब मिद्यानी नर गदेलन क मारि डावा । अउर ओन सबहिं मिद्यानी मेहररुअन क मारि डावा जउन कउनो मनई क संग रही होइ । ओन सब मेहररुअन क मारि डावा जेकर कउनो मनई क संग सारीरिक सम्बंध होइ । ^{१८} तू सिरिफ ओन सबहिं बिटियन क जिअइ द्या जेकर कउनो मनई क संग सारीरिक सम्बंध नाही भइ । ^{१९} तब एकर बाद तू सबइ सिपाहियन क जउन लोगन क मारेस या ल्हास क छुएस सात दिना तलक सिबिर क बाहर रहइ क पड़ी । तीसरे अउ सताएँ दिनन तू अउर तोहार बन्दी सुद्ध होब्या । ^{२०} तोहका उहइ काम सातवें दिन फिर करइ क होइ । तोहका आपन सबहिं ओढ़ना धोवइ चाही । तोहका चाम क बनी हर चीज ऊनी अउ काटे क बनी चीजन क भी धोवइ चाही । तोहका सुद्ध होइ जाइ चाही ।”

^{२१} तब याजक एलीआज़ार सिपाहियन स कहेस कउन जुद्ध क लउटेस ह । उ कहेस, “इ उहइ नेम बाटेन जेका यहोवा मूसा क दिहे रहा । ^{२२-२३} मुला जउन चीजन आगी मँ डाइ जाइ सकत हीं ओकरे बारे मँ अलग-अलग नेम अहइ । तोहका सोना, चाँदी, काँसा, लोहा, टिन या सीसा क आगी मँ डावइ चाही । जब तू ओनका सुद्धीकरण बरे लाल गाय क राख मिला भवा पानी स धोवा उ सबइ सुद्ध होइ जइहीं । जदि चीजन आगी मँ न नाई जाइ सकइ तउ तोहका ओनका पानी स धोवइ चाही । ^{२४} सतएँ दिन तोहका आपन सारा ओढ़ना धोवइ चाही । जब तू सुद्ध होइ जाब्या । ओकरे बाद तू पचे सिबिर मँ आइ सकत ह ।”

^{२५} तब यहोवा मूसा स कहेस, ^{२६} “मूसा तोहका याजक एलीआज़ार अउ सबहिं नेता लोगन क चाही कि तू पचे ओन बन्दिजन, गोरुअन अउ सबहिं चीजन क गना जेनका फउजी लोग जुद्ध स लाए होइ । ^{२७} तब ओन सबहिं चिजियन क जुद्ध मँ भाग लेइ वालन आधा फउजी लोगन अउ बाकी आधा इस्राएल क मनइयन मँ बाँटि देइ चाही । ^{२८} जउन सिपाही जुद्ध मँ भाग लेइ ग रहेन ओनसे ओन चीजन क कर ल्या । उ हीसा यहोवा क होइ । हर एक पाँच सौ चीजन मँ स एक यहोवा क हींसा होइ । एहमाँ मनई, गाय, गदहन अउ भेड़ी सामिल अहइ । ^{२९} जउन फउजी जुद्ध मँ जउन चीजन क पाएन ह, ओनका आधी हींसा कर क रूप मँ ल्या । तब ओन चीजन क (प्रति एक पाँच सौ मँ स एक) याजक एलीआज़ार क द्या । तब हींसा यहोवा क होइ । ^{३०} अउर तब बाकी लोगन क आधा मँ स हर एक पचास चीजन मँ स एक चीज ल्या । एहमाँ मनई, गाय, गदहन, भेड़ी या दूसर जनावर सामिल बाटेन । इ हींसा लेवी बंसी मनइयन क द्या । काहे ? काहेकी लेवी बंसी यहोवा क पवित्तर तम्बू क देखत रेखत हीं ।”

^{३१} इ तरह मूसा अउ एलीआज़ार उहइ किहन जउन मूसा क यहोवा क हुकुम रहा । ^{३२} फउजी सिपाही ६,७५,००० भेड़ीन, ^{३३} बहत्तर हजार गोरु, ^{३४} इक्सठ हजार गदहन, ^{३५} बत्तीस हजार मेहररुअन लूटे रहेन । (इ सबइ अइसी मेहररुअन रहिन जेनकइ कउनो मनई क संग सारीरिक सम्बंध नाही रहा ।) ^{३६} जउन सिपाही जुद्ध मँ गए रहेन उ सबइ आपन हींसा क ३,३७,५०० भेड़िन क पाइ लिहन । ^{३७} फउजियन स लीन्ह ग यहोवा क कर ६७५ भेड़ रहा । ^{३८} फउजियन क ३६,००० गाइयन मिलि गएन । उ पचे बहत्तर यहोवा क दिहेन । ^{३९} फउजी ३०,५०० गदहा पाइ गएन । उ पचे यहोवा क इक्सठ दिहेन । ^{४०} फउजियन क १६,००० मेहरारु मिलिन । उ सबइ यहोवा क बत्तीस दिहेन । ^{४१} यहोवा क हुकुम क मुताबिक मूसा यहोवा बरे दीन्ह गइ ओन सारी भंटेन क याजक एलीआज़ार क दिहस ।

^{४२} तब मूसा मनइयन स मिला भवा आधा हींसा क गनेस । इ उ हींसा रहा जेका मूसा जुद्ध मँ जाइवालन फउजियन स लिहे रहा । ^{४३} मनइयन ३,३७,५०० भेड़ी, ^{४४} छत्तीस हजार गाइयन, ^{४५} तीस हजार पाँच सौ गदहा ^{४६} अउ १६,००० मेहरारु पाएन । ^{४७} मूसा हर एक पचास चीजन प एक चीज यहोवा बरे लिहस । एहमा गोरु अउ मनई दुइनऊ सामिल रहेन । तब ओन चीजन

कउ लेवी बंसी लोगन क दिहेस। काहेकि उ यहोवा क पवित्तर तम्बू क देखत रेखत रहेन। मूसा इ यहोवा क हुकुम क मुताबिक किहेस।

४८ तब सेना क संचालक (१,००० सिपाहियन क सेनापति अउ एक सौ सिपाहियन क सेनापति) मूसा क निअरे गएन। ४९ उ पचे मूसा स कहेन, “हम पचे आपन फउजियन क गना ह। हम पचन में स कउनो भी कम नाही अहइ। ५० एह बरे हम लोग हर एक टु सिपाही स यहोवा क भेंट लइ आवत अही। हम पचे सोना क चीज बाजूबन्द, कड़ा, मुँदरी, बाली अउ हबेल लइ आवत अही। इ सब भेंट यहोवा क समन्वा हमार पाप बरे प्रायस्चित्त बरे होइ।”

५१ एह बरे मूसा उ सबइ सोना क चीज लिहस अउ याजक एलीआज़ार क ओन चीजन्क दिहस। ५२ एक हजार फउजियन क सेनापतियन अउ एक सौ मनइ क सेनापातियन जउन सोना बटोरेन ओकर वजन १६,७५० सेकेल रहा। ५३ हर एक फउजी लड़ाई में मिली भइ बाकी चीजन क हीसा अपने लगे रख लिहस। ५४ मूसा अउ याजक एलीआज़ार एक हजार फउजियन क सेनापतियन अउर एक सौ मनइयन क सेनापातियन स सोना अंगीकार किहस। तब उ पचे सोना क मिलापवाला तम्बू में धरेस। इ भेंट एक यादगार क रूप में इस्राएल क लोगन बरे यहोवा क समन्वा रहिन।

यरदन नदी क पूरब क परिवार समूहन

३२ १ रूबेन अउ गाद परिवार समूहन क लगे ढेर तदाद में मवेशियन रहेन। ओनें मनइयन याजेर अउ गिलाद क निचके क धरती लखेन। उ पचे बिचारेन कि उ धरती ओनके गोरु बरे ठीक अहइ। २ एह बरे रूबेन अउ गद परिवार समूहन क लोग मूसा क निअरे आएन। उ पचे मूसा, याजक एलीआज़ार अउ मनइयन क नेता लोगन स बात किहेन। ३-४ उ पचे कहेन, “आपक सेवक हम सबन क लगे भारी तदाद में गोरु अहइ। अउर उ भुइयाँ जेका परमेस्सर हम लोगन क जीतइ अउर कब्जा करइ क दिहस, गोरुअन बरे एक दू बाढियाँ चरागाह अहइ। इ पहुँटा में अतारोत, दीबोन, याजेर, हेसबोन, एलाले सबाम, नबो, बोन सामिल अहइ। ५ अगर आप लोगन क रजामन्दी होइ तउ हम पचे चाहब कि इ पहुँटा हम पचन क दीन्ह जाइ। हम लोगन क यरदन नदी क दूसर कईती न लइ जाई।”

६ मूसा रूबेन अउ गाद क परिवार समूहन स पूछेस, “का तू पचे हिआँ बसब्या अउ आपन

भाइयन क हिआँ स जाइ अउ जुद्ध करइ देब्या ? ७ तू पचे इस्राएल क लोगन क उत्साह काहे भंग करइ चाहत बाट्या ? होइ सकत ह उ पचे यरदन नदी क पार जउन पहुँटा यहोवा ओनका दिसह ह नाही लेइ चाहीं। ८ तोहार बाप अउ दादा मोरे संग अइसा ही किहन। जब मई कादेसबनेरु स जासूसन क प्रदेस क छान-बीन करइ पठएउं रहेउं। ९ उ पचे ऐंस्कोल घाटी तलक गएन। उ सबइ प्रदेस क लखेन। अउर उ सबइ इस्राएल क लोगन क उ धरती प जाइ क उत्साह भंग कइ दिहस। उ पचे इस्राएल क लोगन क उ पहुँटा में जाइ क इच्छा नाही करइ दिहन जेहसे यहोवा ओनका दइ दिहे रहा। १० यहोवा मनइयन प बहोतइ कोहान। यहोवा इ कठोर निसेध अग्या क बनाएस: ११ मिस्र स आवइ वालन लोगन अउ बीस बरिस या जियादा उमर क कउनो भी मनई क उ भूइया क जेकरे बरे मई इब्राहीम, इसहाक अउ याकूब क बचन दिहेउं रहा। लखइ क आगिया नाही होब्या। मई इ भूइया क लोगन क देइ क बचन दिहेउं रहा। मुला उ पचे मोर ठीक तरह नाही मानेन। एह बरे उ पचे इ भूइया क न पइहीं। १२ सिरिफ कनजी यपुन्ने क पूत कालेब अउर नून क पूत यहोसू यहोवा क पूरी तरह मानेस।”

१३ “यहोवा इस्राएल क लोगन क खिलाफ बहोतइ कोहान रहा। एह बरे यहोवा मनइयन क ४० बरिस तलक रेगिस्तान में रोके रहा। यहोवा ओनका तब तलक रोके रहा, जब ताई उ पचे यहोवा क खिलाफ पाप किहे रहेन, मर नाही गएन। १४ अउर अब तू पचे उहइ करत अहा जउन तोहार पुरखन किहन ह। अरे पापियो! का तू चाहत ह कि यहोवा इस्राएल क लोग क खिलाफ अउ जियादा कोहाइ जाइ ? १५ अगर तू पचे ओकर पाछा करइ स मुड़ि जाब्या तउ यहोवा इस्राएल क अउर जियादा समइ तलक रेगिस्ताने में ठहराइ देइ। तब तू इ सब मनइयन क नास कइ देब्या।”

१६ मुला रूबेन अउ गाद परिवार समूहन क लोग मूसा क लाग गएन। उ सबइ कहेन, “हिआँ हम पचे आपन गदेलन बरे सहर अउ आपन गोरुअन बरे बाड़ा बनउबइ। १७ तब हमार गदेलन दूसर लोगन स सुरच्छित्त रइहीं जउन इ प्रदेस में रहत हीं। मुला ह पचे खुसी स अगवा बढिके इस्राएल क लोगन क मदद करब। हम लोग ओनका ओनके देस में लइ जाब। १८ हम पचे तब तलक घर नाही लउटव जब तलक हर एक मनई इस्राएल में आपन धरती क हींसा पाइ जात। १९ हम लोग यरदन नदी क पच्छिम में कउनो धरती नाही लेब,

हम सबन क धरती क हीसा यरदन नदी क पूरब ही बाटइ ।”

२० तउ मूसा ओनसे कहेस, “जदि तू पचे इ सब करब्या तउ इ रेगिस्तान तू पचन क होइ । मुला तोहरे फउजियन क यहोवा क समन्वा जुद्ध में जाइ चाही । २१ तोहरे सिपाहियन क यरदन नदिया पार करइ चाही अउ दुस्मनन क उ देस तजि देइ बरे मजबूर करइ चाही । २२ जब हम सबन क धरती पावइ मैं यहोवा मदद कइ चुकई तब तू सबइ धर जाइ सकत ह । तब यहोवा अउ इस्राएल तोहका अपराधी नाहीं मनिहीं । तब यहोवा तू पचन क इ पहंटा लइ लेइ देइहीं । २३ मुला अगरे तू सबइ इ बातन पूरी नाहीं करत्या तउ तू लोग यहोवा क खिलाफ पाप करब्या । अउर उ गाँठ बाँधा कि तू आपन पाप खातिर सजा पउब्या । २४ आपन गदेलन बरे सहर अउ गोरुअन बरे बाड़ा बनावा । मुला ओकरे पाछे ओका पूरा करा जेका करइ क तू पचे बचन दिहे अहा ।”

२५ तब गाद अउ रूबेन परिवार समूहन क लोग मूसा स कहेन, “हम पचे आप क सेवक अही । आप हमार सुआमी अहइ । एह बरे हम लोग उहइ करब जउन आप कहत हीं । २६ हमार मेहरारु, गदेलन अउ हमार गोरुअन गिलाद नगर में रइहीं । २७ मुला आपक सेवक हम यरदन नदी क पार करब । मुला हम पचे यहोवा क समन्वा आपन सुआमी क कहे क मुताबिक जुद्ध में कूदि पड़ब ।”

२८ मूसा याजक एलीआज़ार, नून क पूत यहोसू अउ इस्राएल क परिवार समूहन क सबहिं नेतागणन क ओकरे बारे में हुकुम दिहस । २९ मूसा ओनसे कहेस, “गाद अउ रूबेन क मनई यरदन नदी क पार करिहीं । उ पचे यहोवा क अगवा जुद्ध में धावा बोलिहीं । उ सबइ देस जीतइ मैं तोहार मदद करिहीं । अउर तू पचे गिलाद क प्रदेश ओनके हीसा क रूप मैं ओनका दोब्या । ३० मुला जदि उ पचे आपन सिपाहियन क तोहार संग पार नाहीं भेजइ तउ होइ सकत ह कि उ कनान प्रदेश मैं तोहार लोगन क बीच सिरिफ पैतृक सम्पत्ति ही पाइ ।”

३१ गाद अउ रूबेन क लोग जवाब दिहन, “हम पचे उहइ करइ क बचन देत अही जउन यहोवा क हुकुम अहइ । ३२ हम पचे यरदन नदी पार करब अउ कनान देस प यहोवा क समन्वा धावा बोलब । अउ हमरे देस क हीसा यरदन नदी क पूरब क धरती होइ ।”

३३ इ तरह मूसा उ प्रदेश क कछू भाग गाद क लोगन, रूबेन क लोगन अउ मनस्से परिवार

समूहन क आधे लोगन क दिहस । (मनस्से यूसुफ क पूत रहा ।) उ प्रदेश मैं एमोरियन क राजा सिहोन क राज्ज अउ बसान क राजा ओग क राज्ज मिला रहा । उ प्रदेश मैं उ इलाका क चारहो कईती क सहर भी मिला रहेन ।

३४ गाद क मनइयन दीबोन, अतारोत, अरोएर, ३५ अतरौत, सोपान, याजेर, योगबहा, ३६ बेतनिम्रा अउ बेथारान सहरन क बनाएन । उ पचे मजबूत चहर-देवार क संग सहरन क बनाएस अउ आपन गोरुअन क बाड़ा बनाएन ।

३७ रूबेन क मनइयन हसबोन, एलाले, किर्यातैन, ३८ नबो, बालमोन अउर तित्पा सहर । उ दूसर सहरन क नाउँ दिहस जेका उ बनाए । मुला नेबो अउ बाल मिआँन क नवा नाम स पुकारेस ।

३९ मनस्से परिवार समूह क सन्तान माकीर स जन्मा लोग गिलाद क गएन । उ पचे सहर क हराएन । उ पचे ओन एमोरी क हराएन जउन हुवाँ रहत रहेन । ४० एह बरे मनस्से क परिवार समूह क माकीर बरे मूसा गिलाद दिहस । एह बरे ओकर परिवार हुवाँ बस गवा । ४१ मनस्से क परिवार समूह क यैर नान्ह-नान्ह सहरन जेका हेवोल याईर कहा जात ह क जीत लिहस ह । ४२ तउ नोबह कनात अउ ओकरे लगे क नान्ह-नान्ह सहरन क हराएस । तब उ उ ठउर क नाउँ आपन नाउँ प नोबह धरेस ।

मिस्र स इस्राएलियन क जात्रा

३३ ? इ सबइ इस्राएली लोगन क जात्रा अहइ जउन उ मूसा अउ हारून क अगवाइ मैं आपन परिवार समूहन क संग मिस्र स बाहर आएन । २ मूसा ओनँ जात्रन क बारे मैं लिखे अहइ जेनका यहोवा हुकुम दिहस रहा । उ सबइ जात्रा हिआँ दर्ज अहइ :

३ पहिले महीना क पन्द्रहवाँ दिन उ पचे रामसेस तजेन । फसह क पाछे भिन्सारे इस्राएल क मनइयन बिजयी क संग मिस्र स बाहर गएन । मिस्र क सब मनइयन लखेन । ४ मिस्र क लोग आपन पहिलौटा पूतन क दफनावत रहेन जेका परमेस्सर मार डाए रहेन । परमेस्सर मिस्र क देवता लोगन क खिलाफ आपन निर्णय देखाए रहा ।

५ इस्राएल क लोग रामसेस क तजि दिहेन अउ सुक्कोत मैं सिबिर डाएन । ६ सुक्कोत स उ पचे एताम क जात्रा किहेन । हुवाँ प लोगन रेगिस्तान क छोर प सिबिर डाएन । ७ उ सबइ एताम क तजेन अउ

पीहहीरोत क गएन । इ बालसपोन क लगे रहा । उ सबइ मिगदोल क लगे सिबिर डाएन ।

५ लोगन पीहहीरोत तजि दिहेन अउ समुदर क बीच स चलेंन । तब उ पचे तीन दिन तलक एथम रेगिस्तान स होइके चलेंन । लोगन मरा मँ सिबिर डाएन ।

१ लोगन मरा क तजि दिहेन अउ एलीम मँ सिबिर डाएन । हुवाँ प बारह पानी क झरना रहेन अउ ७० खजूर क वृच्छ रहेंन ।

१० लोग एलीम तजेन अउ लाल-सागर क लगे सिबिर डाएन ।

११ लोग लाल-सागर तजेन अउ सीन रेगिस्तान मँ सिबिर डाएन ।

१२ लोग सीन रेगिस्तान क तजेन अउ दोपका मँ सिबिर डाएन ।

१३ लोग दोपका तजेन अउ आलूस मँ सिबिर डाएन ।

१४ लोग आलूस तजेन अउ रपीदीम मँ सिबिर डाएन । हुवाँ लोग क पानी पिअइ बरे नाही रहा ।

१५ लोग रपीदीम तजेन अउ सिनाइ रेगिस्तान मँ सिबिर डाएन ।

१६ लोग सिनाइ रेगिस्तान तजेन अउ किब्रोत्तावा मँ सिबिर डाएन ।

१७ लोग किब्रोत्तावा तजेन अउ हसेरोत मँ सिबिर डाएन ।

१८ लोग हसेरोत क तजेन अउ रिम्मा मँ सिबिर डाएन ।

१९ लोग रिम्मा क तजेन अउ रिम्मोनपेरेस मँ सिबिर डाएन ।

२० लोग रिम्मोनपेरेस क तजेन अउ लिब्ना मँ सिबिर डाएन ।

२१ लोग लिब्ना तजेन अउ रिस्सा मँ सिबिर डाएन ।

२२ लोग रिस्सा तजेन अउ कहेलाता मँ सिबिर डाएन ।

२३ लोग कहेलाता तजेन अउ सेपेर पहाड़े प सिबिर डाएन ।

२४ लोग सेपेर पहाड़ तजेन अउ हरादा मँ सिबिर डाएन ।

२५ लोग हरादा तजेन अउ मखेलोत मँ सिबिर डाएन ।

२६ लोग मखेलोत तजेन अउ तहत मँ सिबिर डाएन ।

२७ लोग तहत तजेन अउ तेरह मँ सिबिर डाएन ।

२८ लोग तेरह तजेन अउ मिक्का मँ सिबिर डाएन ।

२९ लोग मिक्का तजेन अउ हसमोना मँ सिबिर डाएन ।

३० लोग हसमोना तजेन अउ मोसेरोत मँ सिबिर डाएन ।

३१ लोग मोसेरोत तजेन अउ बने-याकन मँ सिबिर डाएन ।

३२ लोग बने-याकन तजेन अउ हॉर होर्हिंगिदगाद मँ सिबिर डाएन ।

३३ लोग होर्हिंगिदगाद तजेन अउ योताबात मँ सिबिर डाएन ।

३४ लोग योतबात तजेन अउ अबरोना मँ सिबिर डाएन ।

३५ लोग अबरोना तजेन अउ एस्योनगेबेर मँ सिबिर डाएन ।

३६ लोग एस्योनगेबेर तजेन अउ सीने रेगिस्तान मँ कादेस मँ सिबिर डाएन ।

३७ लोग कादेस तजेन अउ हॉर मँ सिबिर डाएन । इ एदोम देस क सिवाने प एक पहाड़ रहा । ३८ याजक हारून यहोवा क आग्या मानेस अउ उ हॉर पहाड़े प चढ़ा । हारून पाँचवाँ महीना क पहिले दिन मरा । उ मिस्र क इस्राएल क लोगन क जरिया तजि देइ क चालिसवाँ बरिस रहा । ३९ हारून जब हॉर पहाड़े प मरा तब उ १२३ बरिस क रहा ।

४० अरात कनान क नेगेव प्रदेश मँ रहा । कनानी राजा हुवाँ सुनेस कि इस्राएली लोगन आवत अहई । ४१ लोग हॉर पहाड़े क तजेन अउ सलमोना मँ सिबिर डाएन ।

४२ लोग सलमोना क तजेन अउ पूनोन मँ सिबिर डाएन ।

४३ लोग पूनोन तजेन अउ ओबोस मँ सिबिर डाएन ।

४४ लोग ओबोस तजेन अउ इये अबारीम मँ सिबिर डाएन । इ मोआब देस क चउहद्दी प रहा ।

४५ लोग इयीन (इये अबारीम) क तजेन अउ दिबोन-गाद मँ सिबिर डाएन ।

४६ लोग दिबोन-गाद तजेन अउ अल्मोनदिबलातैम मँ सिबिर डाएन ।

४७ लोग अल्मोनदिबलातैम तजेन अउ नबो क लगे अबीराम पहाड़न प सिबिर डाएन ।

५८ लोग अबीराम पहाड़न क तजेन अउ यरदन नदी क लगे मोआब क प्रदेस में सिबिर डाएन। इ जेरिको क निअरे रहा। ५९ उ पचे मोआब में यरदन घाटी में यरदन नदी क निअरे सिबिर डाएन। ओनकइ डेरन वेत्यसीमोत स अबेलसितीम चरागाह तलक फइला रहेन।

५० उ ठउरे प यहोवा मूसा स बात किहेस, ५१ “इस्राएल क लोगन स कहा। ओनसे इ बातन क बतावा : तू सबइ यरदन नदी पार करब्या। तू पचे कनान देस में जाब्या। ५२ तू पचे ओन लोगन स भुइयाँ लइ लेब्या जउन हुवाँ रहत ह तू पचन क ओनकइ खोदी भइ मूरत अउ प्रतितमा क नस्ट कइ देइ चाही। तोहका ओनके सबहिँ ऊँच ठउरे क नास कइ देइ चाही। ५३ तू पचे उ देस लेब्या अउ हुवाँ बसि जाब्या। काहे ? काहे की इ देस मइँ तू सबन क देत अहउँ। इ तोहरे परिवारे क होइ। ५४ तोहार हर एक परिवार भुइयाँ क हींसा पाई। तू पचे इ बात बरे गोटी दुउब्या कि देस क कउन सा हींस कउन परिवारे क मिलत ह। बड़का परिवार भुइयाँ क बड़का हिंसा पाइ। नान्ह परिवार देस क नान्ह नान्ह हींसा पाइ। भुइयाँ ओन लोगन क दीन्ह जाइ जेकर नाउँ गोटी तय करी। हर एक परिवार समूह आपन भुइयाँ पाइ।

५५ “तू पचन क दूसर लोगन स देस खाली कराइ लेइ चाही। अगर तू पचे ओन लोगन क आपन देस में ठहरइ देब्या तउ उ पचे तोहरे बरे बहोतइ परेसानी पइदा करिहीं। उ पचे तोहरी आँखी क पिन या तोहरी कखरी क काँटा क तरह होइहीं। उ पचे तोहका परेसानी देइहीं जहाँ तू रहब्या। ५६ अगर अइसा ह तउ इ होइ सकत ह मोका तू लोगन क संग भी उहइ करइ क होइ जउन जोजना मइँ ओन लोगन संग करइ बरे किहउँ।”

कनान क चउहदी

३४ १ यहोवा मूसा स बात किहेस, उ कहेस, २ “इस्राएल क लोगन क इ हुकुम द्या : तू पचे कनान देस में आवत अहा। तू लोग इ देस क हरउब्या। तू पचे पूरा कनान देस लइ लेब्या। ३ दक्खिनी अउ तू लोग एदोम क निअरे सीन रेगिस्तान क हींसा पाइ लेब्या। दक्खिनी सिवान मृत-सागर क दक्खिनी छोर स सुरु होइ। ४ इ बिच्छूदरे क दक्खिन कइँती स गुजरी। इ सीन रेगिस्तान स होइके कादेसबर्ने तलक जाइ, अउर तब हसरदार तथा तब इ अस्मोन स होइके चली। ५ अस्मोन स सिवान मिस्र नदी तलक जाइ

अउ एकर आखिर भूमध्य सागर प होइ। ६ तोहार पच्छिउ क सिवान भूमध्य सागर होइ। ७ तोहार उत्तरी सीमा भूमध्य सागर प सुरु होइ अउ होर पहाड़ तलक जाइ। लबानोन में ८ इ लबानोन में हार पहाड़ स लबोहामात तलक जाइ क प्रवेस दुआर अहइ। एकर बाद इ सदद तक जाइ। ९ तब इ चउहदी जिप्रोन क जाइ अउर इ हसेरनान प खतम होइ। इ तरह इ तोहार उत्तरी चउहदी होइ। १० तोहार पुबिहा चउहदी एनान प सुरु होइ अउर इ सपान तक जाइ। ११ सपान स चउहदी ऐन क पूरब रिबला तलक जाइ। किन्नेरत समुद्र गलील क सागर क संग क पहाड़ियन क संग सिवान चलत रही। १२ तब सिवान यरदन नदी क संग संग चली। एकर अन्त मृत-सागर प होइ। तोहरे देस क चारिहुँ कइँती क चउहदी हिअँइ बा।”

१३ मूसा इस्राइल क लोगन क हुकुम दिहेस, “इहइ उ देस अहइ जेका तू पउब्या। तू लोग नौ परिवार समूहन अउ मनस्से परिवार समूह क आधा मनइयन बरे धरती बाँटइ खातिर ओनके नाउँ क गोटी डउब्या। १४ रूबेन, गाद अउ क परिवार समूहन मनस्से क आधा परिवार समूह क मनइयन पहिलेन ही आपन प्रदेस लइ लिहे अहइ। १५ उ अढ़ाई परिवार समूहन यरीहो क निचके यरदन नदी क पूरब आपन पहेटा लइ लिहे अहइ।”

१६ तब यहोवा मूसा स बात किहेस, उ कहेस, १७ “इ सबइ उहइ लोग अहइ जउन भुइयाँ बाँटइ में तोहार मदद करिहीं : याजक एलीआज़ार, नून क पूत यहोसू, १८ अउ हर एक परिवार समूहन स तू पचे एक ठु नेता चुनब्या। इ लोग भुइयाँ क बँटवारा करिहीं। १९ नेता लोगन क नाउँ इ अहइ : यहूदा क परिवार समूह स युपुन्ने क पूत कालेब। २० सिमोन क परिवार समूह स, अम्मीहूद क पूत समूएल।

२१ बिन्यामीन क परिवार समूह स, किसलेस क पूत एलीहदद।

२२ दान क परिवार समूह स, योगिल क पूत बुक्की। २३ मनस्से (यूसुफ क पूते) क परिवार समूह स, एपोद क पूत हन्नीएल।

२४ एप्रैम (यूसुफ क पूते) क परिवार समूह स, सिप्तानी क पूत कमूएल।

२५ जबूलन क परिवार समूह स, पनाक क पूत एलीसापान।

२६ इस्साकार क परिवार समूह स, अज्जान क पूत पलतीएल।

२७ आसर क परिवार समूह स, सलोमी क पूत अहीदूद।

२८ नपताली क परिवार समूह स, अम्मीहूद क पूत पदहेल।”

२९ यहोवा इ मनइयन क इस्राएल क लोगन मँ कनान क भुइँया बाँटइ बरे चुनेस।

लेवी बंस क सहर

३५ १ यहोवा मूसा स बात किहस। इ यरीहो क पार मोआब मँ यरदन घाटी मँ यरदन नदी क निचके रहा। यहोवा कहेस, २ “इस्राएल क लोगन स कहा कि ओनका आपन हीसा क देस मँ कछू सहर लेवी-बंस क लोगन क देइ चाही। इस्राएल क लोगन क सहर अउ ओकरे चारिहुँ कइँती क चरागाह लेवी-बंस क देइ चाही।

३ लेवी बंसी लोग ओन सहरन म रइहीं। अउ सब गोरुअन, अउ दूसर जनावर, जउन लेवी बंसी मनइयन क होइहीं, सहर क चारिहुँ कइँती क चरागाह मँ चरि सकिहीं। ४ तू पचे केतनी भुइयाँ लेवी बंसी मनइयन क देब्या? सहर क देवार स १,५०० फुट बाहेर सहर क पूरब मँ नापत जा ५ अउ सहर क दक्खिन मँ ३,००० फुट अउ सहर क पच्छिउँ मँ ३,००० फुट, पूर्व ३,००० फुट अउ उत्तर मँ ३,००० फुट उ सारी भुइयाँ लेवी बंसियन क होइ। उ भुइयाँ क बीच सहर होइ। ६ ओन सहरन मँ छः सहर सरण क सहर होइहीं। जदि कउनो मनई कउनो क कतल कइ डावत ह तउ उ सुरच्छा बरे ओन सहरन मँ पराइ सकत ह। ओन छः सहरन क अलावा तू लेवी बंसियन क बियालीस दूसर सहर देब्या। ७ इ तरह तू पचे कुल अरचालीस सहर लेवी बंसी लोगन क देब्या। तू पचे ओन सहरन क चारिहुँ कइँती भुइँया भी देब्या। ८ इस्राएल क बड़का परिवारन क भुइँया क बड़का भाग देइहीं। इस्राएल क नान्ह परिवारन क भुइँया क छोटा भाग देइहीं। सबहिँ परिवार समूहन लेवी बंसी मनइयन क आपन सहरन मँ स कछू सहर देइहीं।”

९ तब यहोवा मूसा स बात किहस। उ कहेस, १० “मनइयन स इ कहा: तू पचे यरदन नदी क पार करब्या अउ कनान देस मँ जाब्या। ११ तोहका ‘सरण-सहर’ बनावइ बरे सहरन क चुनइ चाही। जदि कउनो मनई संजोग स कउनो क मारि डावत ह तउ इ सुरच्छा बरे इ सहरन मँ स कउनो मँ पराइके जाइ सकत ह। १२ उ ओ कउनो मनई स बचा रही जउन मरे परिवार क होइ अउ ओका धरइ चाहत होइ। उ तब तलक सुरच्छत रही जब तलक अदालन मँ ओकरे बारे मँ फइसला नाही होइ जात। १३ अउ छः सहर जेका तू चुनिहीं उ तोहार ‘सरण-नगर’ होइहीं। १४ ओन सहर मँ

स तीन सहर यरदन नदी क पूरब मँ होइहीं। अउर तीन दूसर सहर कनान प्रदेश मँ यरदन नदी क पच्छिउँ मँ होइहीं। १५ उ सबइ सहर नागरिक लोगन, स्थाई निवासियन अउ अस्थाई निवासियन बरे सरण-ठउर होइहीं। कउनो भी मनई संजोग स कउनो क मारि डावत ह, इ कउनो एक सहर मँ पराइके जाइ सकत ह।

१६ “जदि कउनो मनई कउनो क मारइ बरे लोहा क हथियार बइपरत ह तउ मनई क मारि जाइ चाही। १७ अउर जदि कउनो मनई एक पाथर उठावत ह अउ कउनो क मारि डावत ह तउ ओका भी मरइ चाही। पाथर उ आकार क होइ चाही जेका मनइयन क मारइ बरे अवसर बइपरा जात ह। १८ अगर कउनो मनई कउनो लकड़ी का प्रयोग करत ह अउ कउनो क मारि डावत ह तउ ओका मरइ चाही। लकड़ी एक हथियार क सेकेल मँ होइ चाही जेकर प्रयोग अक्सर लोग मनइयन क मारि डावइ बरे करत हीं। १९ मरे भए मनई क परिवार क निअम्बर उ हत्यारा क पाछा कइ सकत ह अउ ओका मार सकत ह।

२०-२१ “कउनो मनई कउनो प हाथ स हमला कइ सकत ह अउ ओका मारि डाइ सकत ह। या कउनो मनई कउनो क धकियाइ सकत ह अउ ओका मारि डाइ सकत ह। या कउनो मनई कउनो प कछू बहाइ सकत ह अउ ओका मारि सकत ह। अगर उ मरवइया घिना स अइसा किहस तउ उ हत्यारा अहइ। उ मनई क मारि डावइ चाही। मरे भए परिवार क कउनो मनई उ हत्यारा क पाछा कइ सकत ह अउ ओका मार सकत ह।

२२ “मुला जदि कउनो मनई संजोग स कउनो क मारि सकत ह। उ मनई उ मनई स घिना नाही करत रहा, उ होनी संजोग स होइ गइ। या कउनो मनई कछू लोकाइ सकत ह अउ संजोग स कउनो क मार सकत ह, उ मारइ क इरादा नाही किहे रहा। २३ या कउनो मनई कउनो बड़वार पाथर बहाइ सकत ह। अउ उ पाथर कउनो अइसे मनई प भहराइ पड़इ जउन ओका न लखत होइ अउ उ ओका मारि डावइ। उ मनई कउनो क मारि डावइ क इरादा नाही किहे रहा। उ मृतक मनई बरे घिना नाही राखत रहा। इ सिरिफ संजोग स भवा रहा। २४ जदि अइसा होइ तउ बिरादरी फइसला करी कि का कीन्ह जाइ। जाति बिरादर क अदालत इ फइसला देइ कि मृतक मनई क परिवार क निअम्बर ओका मारि डाइ सकत ह। २५ अगर अदालत क इ फइसला देइ क होइ कि उ जिअत रहइ तउ ओका आपन ‘सरण-सहर’ मँ

जाइ चाही। ओका हुवाँ तब तलक रहइ चाही जब तलक महा याजक मरि जाइ। इ महा याजक उहइ होइ चाही जेकर अभिसेक पवित्र तेल स भवा होइ।

२६-२७ “उ मनई क आपन ‘सरण-सहर’ क चउहदी स कवहुँ बाहेर नाही जाइ चाही। अगर उ सिमान पार करत ह अउ मृतक मनई क परिवार क निअम्बर ओका धरत ह अउ ओका मारि डावत ह तउ उ मनई हत्या क अपराधी नाही होत। २५ उ मनई क जेका, जउन संजोग स कउनो क मारि डाएस ह, ‘सरण-सहर’ मँ महा याजक क मरि तलक रहइ सकत ह। महा याजक क मरइ क पाछे उ मनई आपन भूइया क लउटि सकत ह। २९ तू जउन कहुँ भी रहा इ नेमँ तोहार आवइ वाले नसलन बरे कानून क तरह होइ जाव।

३० “हत्तियारा क तबहिँ मउत-सजा दीन्ह जाइ सकत ह। जब ओकरे बिरोध मँ एक स जियादा गवाही होइहीं। जदि एक टु ही गवाह होइ तउ कउनो मनई क मउत क सजा नाही दीन्ह जाइ।

३१ “जदि कउनो मनई हत्तियारा अहइ तउ ओका मारि डावइ चाही। धन क बदले ओका नाही छोड़ दीन्ह जाइ चाही। उ हत्तियारे क मार दीन्ह जाइ चाही।

३२ “अगर कउनो मनई कउनो क मारेस अउ उ पराइके कउनो ‘सरण-सहर’ मँ गवा तउ घर लउटइ बरे ओसे धन जिन ल्या। उ मनई क उ नगर मँ तब तलक रहइ क पड़ी जब तलक महायाजक न मरइ।

३३ “भोले मनइयन क खून स आपन देस क जिन दुसित करा। जदि कउनो मनई कउनो क मारि डावत ह तउ इ अपराध क बदला इहइ अहइ कि उ मनई क मार दीन्ह जाइ। दूसर कउनो अइसा बदला उ जुमँ बरे नाही बा कि हत्तियारा क जान स मारि डावा जाइ। दूसर कउनो चारा नाही कि उ देस क अजाद कइ सकइ। ३४ मइँ यहोवा हउँ! मइँ इस्राएल क लोग क बीच तोहरे देस मँ सदा रहत रहवइ। मइँ उ देस मँ रहत रहव। एह बरे बे अपराधी मनइयन क खून स उ देस क दुसित जिन करा।”

सलोफाद क बिटियन क देस

३६ १मनस्से यूसुफ क पूत रहा। माकीर मनस्से क पूत रहा। गिलाद माकीर क पूत रहा। गिलाद परिवार क नेता मूसा अउ इस्राएल क परिवार समूहन क नेता लोगन स बात करइ गएन। २ उ पचे कहेन, “महोदय, यहोवा हमलोगन

क लौटरी क आधार पइ भूइया बाटई क हुकुम दिहस ह। अउर महोदय, यहोवा हुकुम दिहस कि सलोफाद क भुइयाँ ओकरी बिटियन क मिलइ। सलोफाद हम लोगन क भाई रहा। ३ इ होइ सकत ह कि कउनो दूसर परिवार समूह क मनई सलोफाद क कउनो बिटिया स बियाह करइ। का उ भूइया हमरे परिवारे स निकरि जाइ? का उ दूसरे परिवार समूह क मनई उ भूइया क पाइ लेइहीं? का हम लोग उ भूइया क खोइ देब जेका हम लोग लौटरी क आधार प पावा ह। ४ लोग आपन भूइया बेच-बिकिन सकत हीं। मुला जुबली क बरिस मँ सारी धरती उ परिवार समूह क लउटी जात ह जउन एकर असली मालिक होत ह। उ टेमँ सलोफाद क बिटियन क भुइयाँ कउन पाई? अगर वइसा होत ह तउ हमार परिवार उ भुइयाँ क सदा न पाइ सकी।”

५ मूसा इस्राएल क लोगन क इ हुकुम दिहस। इ हुकुम यहोवा क रहन “यूसुफ क परिवार समूह क इ सबइ मनई ठीक कहत हीं। ६ सलोफाद क बिटियन बरे इ हुकुम अहइ: जदि तू कउनो स बियाह करइ चाहति हउ तउ तोहका आपन परिवार समूह क कउनो मनई क संग बियाह करइ चाही। ७ इ तरह इस्राएल क लोगन मँ भुइयाँ एक परिवार समूह स दूसर परिवार समूह मँ नाही जाइ। हर एक इस्राएली आपन पुरखन क भूइया क ही आपन लगे रखी। ८ अउर जदि कउनो बिटिया बाप क भूइया पाइ जात ह तउ ओका आपन परिवार समूह मँ स ही कउनो क संग बियाह करइ चाही। इ तरह हर एक मनई उहइ भुइयाँ अपने लगे रखी जउन ओकरे पुरखन क रही। ९ इ तरह इस्राएल क लोगन मँ एक परिवार समूह स दूसर परिवार समूह मँ न जाइ। हर एक इस्राएली उ भूइया रखी जउन ओकरे आपन पुरखन क रही।”

१० सलोफाद क बिटियन, मूसा दुआरा प्राप्त भवा यहोवा क हुकुम क पालन किहस। ११ एह बरे सलोफाद क बिटियन महला, तिसा, होगला, मिल्का अउ नोआ आपन चचेरा भाइयन क संग बियाह किहन। १२ ओनकइ भतार मनस्से क परिवार समूह क रहेन। एह बरे ओनकइ भूइया ओनके बाप क परिवार अउ परिवार समूह क बनी रही।

१३ इ तरह उ सब कनून अउ हुकुम यरीहो क पार स यरदन नदी क किनारे मोआब इलाका मँ यहोवा मूसा क दिहे रहा। मूसा यहोवा क ओन कनूनन क अउ हुकुमन क इस्राएल क लोगन क दिहस।